

宛陵先生集

一

宛陵先生集

四部叢刊初編集部

重刻宛陵梅聖俞詩集序

明賜進士嘉議大夫都察院  
右副都御史奉

勅督撫南畿吉郡宋儀望誤  
詩自三百篇後騷選繼作風  
雅斯存樂府歌謠六義兼備  
屈宋蘇李代稱宗工繇兩漢  
以還文人學士揆藻吐奇竝  
登辭苑人懷隋壁家寶靈蛇  
可謂彬彬盛矣寔及魏晉體  
裁屢更雖材難兼贍而代擅  
所長綜其實要以不詭于性

情為至律詩濫觴六朝而獨  
盛有唐然自元和而降斯軌  
復榛韓退之文雄一代而風  
人之旨缺焉餘無論矣有宋  
繼興文總徃代歐蘇曾王最  
稱大家然論其詩求所謂唐  
人之音蔑如也予在弱冠覽  
歐陽公所序梅聖俞詩未嘗  
不太息想見其為人既購其  
集讀之陶寫性靈名狀物理  
辭清而興逸頗與宋調殊致  
王文康謂二百年無此作信

矣後生末學動舌則黜宋人  
如是則登歌清廟之什至矣  
彼閭閻里巷孱夫嫠婦短謳  
微吟亦謂之風非邪夫聲成  
文而音會情觸景而感生苟  
臻其致皆足以薦宗廟而和  
神人歐公論聖俞詩使得用  
于朝廷作為雅誦以咏歌大  
宋之功德庶幾復追商周魯  
頌之音其贊慕如此聖俞既  
窮于詩竟不得廁大僚其後  
官至都官負射郎予所善大

叅梅君純甫氏守德都官族  
裔也萬曆乙亥冬再巡宣州  
相與談及良久大叅君曰先  
都官集板久訛缺明公倘有  
意焉幸甚遂以家藏繕本令  
都官裔孫鄉進士一科來呈  
予迺命宣城令姜子奇方刻  
焉刻成一科致其大叅君書  
先公集賴歐公序之流傳至  
今明公又歐公邑人倘賜之  
言則先都官假寵于公者猶  
在歐公也予不得辭輒以昔

所嚮慕于都官者序而歸之

丙子春二月



宛陵先生詩集序

予聞世謂詩人少達而多窮夫豈然哉蓋世所傳詩者多出於古窮人之辭也凡士之蘊其所存而不得施於世者多自放於山巔水涯外見蟲魚草木風雲鳥獸之狀類往往探其竒恠內有憂思感憤之鬱積其興於怨刺以道竊臣寡婦之所歎蓋愈窮則愈工然則非詩之能窮人殆窮者而後工也予友梅聖俞少以陰補為吏累舉進士抑於有司困於州縣凡十餘年年

今五十猶從辟書為人之佐鬱其所畜不得奮見於事業其家宛陵幼習於詩自為童子出語已驚其長老既長學乎六經仁義之說其為文章簡古純粹不求苟說於世世之人徒知其詩而已然時無賢愚語詩者必求之聖俞聖俞亦自以其不得志者樂於詩而發之故其平生所作於詩尤多世既知之矣而未有薦於上者昔王文康公嘗見而歎曰二百年無此作矣雖知之深亦不果薦也

若使其幸得用於朝廷作  
為雅頌以詠歌大宋之功德  
薦之清廟而追商周魯頌  
之作者豈不偉歟奈何使  
其老不得志而為窮者之  
詩迺徒發於蟲魚物類羈  
愁感歎之言世徒喜其工而  
不知其窮之久而將老也可  
不惜哉聖俞詩既多不自  
收拾其妻之兄子謝景初  
懼其多而易失也取其自  
洛陽至於吳興以來所作  
次為六十卷予嘗嗜聖俞  
詩而患不能盡得之遽喜

謝氏之能次也輒序而藏之  
慶曆六年三月右正言知制  
誥知滁州事歐陽脩序

宛陵先生集目錄卷第一

西京詩

和謝希深會聖宮

右丞李公自洛移鎮河陽

上巳日午橋石瀨中得雙鰕魚

寒食前一日陪希深遠遊大字院

遊龍門自潛溪過寶應精舍

依韻和希深遊大字院

傷白雞 尹師魯治第伐樗

尹陽尉耿傳惠新粟

和楊子聰會董尉家

嶺雲 垂澗藤

林翠 舟中遇雪

田家 四時 涂中遇雪寄希深

妾薄命 秋日同希深席上作

和希深雨後見過 和子聰夜雨

和趙員外趙韓王故宅

春日遊龍門山寺 和希深遊府學

傷桑 觀理稼

新蘭 和希深遊樂園

錦竹 廢井

茶竈 緱山子晉祠

少林寺 少姨廟

天封觀 會善寺

啓母石 輟轅道

中伏日避暑 元政上人遊終南

寄河陽富彥國 河南受代希深示詩

秋雨 白雲和子聰

同友訪郭生別墅 水菘

黃河 王氏昆仲歸寧

答子聰惠書 環州通判張殿丞

張太素之郊幕 孫屯田召爲御史

與友納涼分題 梅花

和希深立春 尹子漸歸華

初見杏花

目錄終



宛陵先生集卷第一

宋宛陵梅堯臣聖俞著

和謝希深會聖宮

三后威靈遠層巒棟宇典衣冠漢原廟歌舞魏  
西陵日月融光盛山河王氣增叢楹琢文石連  
網絡朱繩碧瓦寒鋪玉重欄瑩鏤冰粹儀神霧  
擁法袞繡龍升星斗羅容衛軒墀侍股肱宸蹤  
耀璇榜瑞羽集觚稜闕殿深珠箔雕垣界綺滕  
笙從緱嶺咽雲傍帝鄉疑龜組恭來詣貂璫肅  
奉承欲知歸厚意孝德自烝烝

右丞李相公自洛移鎮河陽

侯服齊三輔天臺聳百僚新章刻銅虎舊德冠  
金貂已作歌襦化方期執玉朝雙鞬辭洛宅千  
騎向河橋鼓角春城暮鶯花故苑遙瓜亭猶接  
吟棠芟自敷條夾道都人擁迎風駟牡驕莫隨  
文學乘空望旆飄

上巳日午橋石瀨中得雙鯪魚

脩襖洛之濱湍流得素鱗多慙折腰吏來作食

魚人水髮粘篙綠溪毛映渚春風沙暫時遠紫  
綠憶江尊

寒食前一日陪希深遠遊大字院

一百五將近千門煙火微閑過少傅宅喜見老  
萊衣晚雨竹間霽春禽花上飛禪庭清溜滿幽  
興自忘歸

遊龍門自潛溪過寶應精舍

遙愛夏景佳行行清興屬安知轉迴溪始覺來  
平谷古殿藏竹間香菴遍巖曲雲霞弄霽暉草  
樹含新綠時鳥自綿蠻山花競紛縟莫言歸路  
賒明月還相續

依韻和希深遊大字院

白傳舊宅

夫君康樂喬顧我子真派湛然懷清機超爾尋  
虛界暫來香園中共耕寒松大先生醉復吟長  
老言不壞信與賞心符寧同俗士愛杖屨恣遊  
遨池塘仍感槩焚香露連泣聞磬霜鷗邁青板  
今已空濁醪誰許載軟草當熊細低篔挂纓帶  
不覺月明歸候門僮僕怪

傷白雞

我庭有素雞翎羽白如脂日所慮狂犬未嘗憂  
孽狸嘔棲向簷隙朝啄循階基每先烏鳥鳴不  
失風雨時雖吾困廩薄尚汝稻糧遺昨宵天氣  
黑陰物恣所窺潛來嚙搏去但覺聲音悲開門  
俾馳救已過墻東睡呵叱不敢食奮然留在茲  
湧血被其頸嚼呷氣甚危皓臆變丹赤霜翅兩  
離披憫心欲之活碎腦安能治委瘞從爾命孰  
忍薑桂爲猶看零落毛蕩漾隨風吹念始託茲  
地蒙幸信可知充庖豈云患度日無苦饑如何  
遇兇獸毒汝曾不疑斯事義雖小得以深理推  
鄧生賜山鑄未免終餒而人道尚乃爾愴焉聊  
俛眉

尹師曾治第伐樗

伊人利管構思欲新其居匠築經舊址簷楹礙  
高榭且云恐不伐何以成吾廬人言此樹古百  
怪所憑依獨秉一定議自將羣俗違乃俾執柯  
者丁丁霜刃揮殲殞條百尺橫什株數圍從茲

朝夕間不聞鳥雀喧既能考子室而復高其門  
周也昔騁辯得以不材論工今誠匪度苟害安  
可存舟楫且非藉薪爨聊用燔莫比溝中斷區  
區望犧樽

尹陽尉耿傳惠新栗

金行氣已勁霜實繁林梢尺素走下隸一奩來  
遠郊中黃比玉質外刺同芟苞野人寒齋會山  
爐夜火炮梨慚小兒嗜茗憶麤官拋此焉真可  
貺遽爾及衡茅

和揚子聰會董尉家

董生方好雅茲日爲掃扉森爾延嘉賓歡然去  
塵機有客振雙袂敢言陽春暉聊停玉麈尾爲  
歌金縷衣古辭何稠疊無乃惜芳菲三閭不鋪  
糟二子自採薇雖留千載清未免當時饑吾愛  
曹公詩古來不敢非人生若朝露捨醉當何歸  
四座驚此語未狀翠觴飛胡能後天地何可恃  
輕肥沈酣且長詠白首空歔歛

嶺雲

片雨過青山，山雲歸絕嶺。林際隱微虹，溪中落  
行影。還看隴首飛，復愛山間靜。

垂澗藤

寒松偃澗濱，弱蔓垂纒綠。波縈翠帶長，水濺低  
花馥。終日採蘋人，攀條映巖曲。

林翠

鬱鬱長條抽，林間翠堪翦。背嶺山氣濃，幽人趣  
不淺。

舟中遇雪

曉風鳴大澤，春雪下長河。沙草綠堤沒，楊花拂  
水多。驚鷗不知遠，候鴈幾聞過。欲問耶溪轉，今  
朝柰興何。

田家 四時

昨夜春雷作，荷鋤理南陂。杏花將及候，農事不  
可遲。蠶女亦自念，牧童仍我隨。田中逢老父，荷  
杖獨熙熙。

草木遶籬盛，田園向郭斜。去鋤南山豆，歸灌東  
園瓜。白水照茅屋，清風生稻花。前陂日已晚，聒

聒競鳴蛙

荒村人自樂，頗足平生心。朝飯露葵熟，夜春雲  
谷深。採山持野斧，射鳥入煙林。誰見秋成事，愁  
蟬復怨砧。

今朝田事畢，野老立門前。拊頸望飛鳥，負暄話  
餘年。自從備丁壯，及此常苦煎。卒歲豈堪念，鶉  
衣着更穿。

涂中遇雪寄希深

方爲郡邑吏，日與故人違。極目千山碧，馳心一  
鳥飛。岸傍村杳杳，波上雪霏霏。欲寄洛陽信，沂  
流行客稀。

妾薄命

昔是波底沙，今爲陌上塵。曾聞清冷混金屑，誰  
謂飄揚逐路人。悠悠萬物難自保，朝看穠華暮  
衰老。須知鉛黛不足論，何必芳心競春草。草有  
再三榮，顏無一定好。冀恩寧重持，徒能亂懷抱。

秋日同希深昆仲遊龍門香山晚泛伊  
川觴詠久之席上各賦古詩以極一時

之娛

落日川上好徘徊弄孤舟鳴榔進山口清唱發  
渡頭淺瀨不可泝停橈信中流山樽對蒼翠淡  
鳥自沉浮濯足破嵐影采菱臨芳洲千龕晚煙  
寂雙壁紅樹秋細細石間泉搖搖波際樓澄潭  
若瀉鑑萬象已盈眸康樂足清尚惠連仍此遊  
摘景固無遺揮筆曾未休醉來同淵明興盡殊  
子猷歸傍漁梁靜行看夜火幽露華初滴滴夜  
吹何颼颼不犯嚴城漏誰言憐近丘

依韻和希深雨後見過小池

碧池新雨後清興一何賒有客過顏巷無貧似  
阮家白醪聊泛蟻黃菊未開花既至休辭醉君  
其柰歲華

依韻和子聰夜雨

窻燈光更迥宿霧晦層簷寒氣微生席輕風欲  
度簾濕螢依草沒暗溜想池添况值相如渴無  
嫌魯酒甜

和趙貞外良佐趙韓王故宅

開國勳庸大重城邸第寬枯楊映樓角蔓草被  
墻端不見分香妾空餘闐鴨闌誰來悲孔雀金  
翠羽毛殘

春日遊龍門山寺

還邀二三子共到鑿龍遊陰壑泉初動春巖氣  
欲浮竹藏深崦寺人渡晚川舟始覺山風急歸  
鞍不自留

依韻和希深遊府學

東府尊儒日中州進學初牲牢莫商後典籍講  
秦餘大法存無外羣英樂自如時慙遊聖末來  
駕折轆車

傷桑

柔條初變綠春野忽飛霜田婦搔蓬首水蠶絕  
繭勝名暈依麥碓戴勝繞枝翔不見羅敷騎金  
鈎自挂墻

觀理稼

稂莠日已長忽忽艾薙初來時露沾屨歸去月  
侵鋤一腹餒猶甚百骸勤有餘吾無力畊苦謬

讀古人書

新蘭

露柘林初靜煙梯不復收春蠶吐絲足工女忌  
寒休翠薄時方獻清泉緒未抽閨中能自巧繡  
作玉釵頭

依韻和希深遊樂園懷主人登封令

竹映紅蕖水榭開門閑乳雀下青苔伊人何戀  
五斗粟不作淵明歸去來

錦竹 此草也似竹而斑

雖作湘竹紋還非楚筠質化龍徒有期待鳳會  
無實本與凡草俱偶親君子室

廢井

墜廢不知年石欄蒼蘚濕渴心空自煩長綆曾  
誰汲無復語滄波坎蛙奚所及

茶竈

山寺碧溪頭幽人綠巖畔夜火竹聲乾春甌茗  
花亂茲無雅趣兼薪桂煩燃爨

緱山子晉祠 以下陪太尉錢相公遊嵩山七章

王子居玉京故山空寂寞猶聞遡月笙尚想賓

天鶴翠栢深古壇丹霞留迥壑芝庭誰款扉旌  
旗穿林薄

少林寺

紅旌過翠岑林際瞻蓮宇門對幾千巖花開第  
一祖禪庭松色寒石室苔痕古寂寂不逢人空  
簷鸞方乳

少姨廟

靈祠古殿深少室羣峯碧行雨欲隨車望巖非  
化石常聞蘭氣蒸誰莫椒香液寄謝洛川妃凌  
波定何益

天封觀

車馬雲外來衣霑半山雨弭節扣真居捫蘿笑  
塵矩迴溪響石叢靈茹抽巖鳩玉檻刻年華應  
無愧前古 殿礎石柱上有唐樊宗師石鴻禪退之盧全題名在焉今亦刻名於此

會善寺

香謁隨龍節縈紆歷寶山瑠璃開淨界薜荔啓  
禪關蒼若石泉上清吟雲壑間峯端生片雨稍

促畫輪還

啓母石

曠哉嵩室陽神怪所棲宅蒼石不知年靈能去  
無迹煙巖想桂宮昔壁疑椒掖不學舜娥悲瀟  
湘竹枝碧

輟轅道

險絕稱漢關晨躋瞻一室盤紆石路回迤邐雲  
峰出古壁挂青蒼天風起蕭颯洛城西首時望  
望平煙密

中伏日陪二通判妙覺寺避暑

時有僧敲琴於

上座

紺宇迎涼日方床御絡衣清談停玉麈雅曲弄  
金徽高樹秋聲早長廊暑氣微不須河朔飲黃  
茗自忘歸

元政上人遊終南

雉節居杜陵南山常在目今茲美行遊因以謝  
巖谷環錫恣探勝櫻棊方踐陸五門嵐翠橫八  
水秋陰覆雲峰多隱見林嶺乍回復若見採芝

人余非戀微祿

寄河陽簽判富彥國

籍籍名方遠人知第一流翻同貴公子來事外  
諸侯地險長河急天高畫角秋仲宣應自樂寧  
復賦登樓

河南受代前一日希深示詩

我昔在桐鄉伊人頗欣戴今來佐洛南事事為  
時肯自愧居下流無能謝前輩固乏橫草功當  
蒙及瓜代且遺牒許還何用吏民愛洗眼看舊  
書怡然忘宇內

秋雨

雨後秋氣早涼歸室廬清既摧蚊蠅勢任壯蛩  
蟬聲石榴墜枝熟蒼蘚綠塔生閉門且高卧畏  
向泥涂行

白雲和子聰

長憶江海間龍鳴向寒水瀉瀉蒼渚空悠悠白  
雲起是時在漁舟放溜看未已今來居洛陽埃  
塈生蹄軌羨君茲日心悵悵聊徒倚

同尹子漸王幾道訪郭生別墅不遇

秋野已澄曠偶來幽興多  
茨居隔寒水柴戶蔭  
喬柯看竹曾留鳳携朋不爲鷺人歸碧苔徑應  
識履痕過

水荇

灼灼有芳艷本生江漢濱  
臨風輕笑久隔浦淡  
粧新白鷺煙中客紅蕖水上隣  
無香結珠穗秋  
露浥羅巾

黃河

積石導淵源汙汙瀉崑閩龍門自吞險鯨海終  
涵量怒狀生萬渦驚流非一狀淺深殊可測激  
射無時壯常苦事隄防何曾息波浪川氣迷遠  
山沙痕落秋漲槎沫夜浮光舟人朝發唱洪梁  
畫鷁連古戍蒼崖向浴鳥不知清夕陽空在望  
誰當大雪天走馬堅冰上

王氏昆仲歸寧

昨夜雪霏霏梁山吟未歸關河誰道遠鴻鴈自  
相依落日人煙少寒雲驛路微共將彭澤酒稱

書向庭闈

子聰惠書備言行路及遊王屋物趣因  
以答

自我河橋來清話殊未已亟言閱通曉晨駕遠  
遵彼尺書忽見遺經由皆可紀草草始辭家忽  
忽渡河水前村客心速入暮陰風起脩路隘且  
長疲騷未能止茅居聒夜春寒犬吠墟里明發  
西北行崗巒踰迤遞叢蒸但蒙密未見山中美  
谷開逢邑間豈謂連都鄙冠帶一二同磨麋左  
右比問子矣所之俛眉聊啓齒瞥徃登天壇煙  
雲隨步趾傍臨日觀低却望高丘邇屑屑視塵  
埃紛紛若螻蟻便有林壑心期將榮宦委我昔  
愛青蒼無時常徙倚今朝羨君遊勝事空聳企  
徒嗟黃綬身莫接青霞靴安得憑羽翰幽懷寄  
如此

環州通判張殿丞 元

欲向蕭關外窮陰雪暗沙磧寒鴻鴈少冰合水  
泉賒自有從軍樂應無去國嗟春風曾不到吹

角寄梅花

張太素之邠幕

應幕向幽郊晨裝辭邠廓長亭欲少留飛鵠初  
成曲魯酒上離顏行塵生驥足悠悠關戍遙  
驪煙雲屬塞邑多苦寒國風遺舊俗寄音文  
讌餘莫待霜條綠

孫屯田召為御史

薦牘交車府恩書下建章輕軒辭瑞程危弁學  
神羊祖酌方滋桂行威欲犯霜鳳毛仍襲慶雞  
舌更含香氣鬱翔龍闕風清振鷺行今朝洛民  
思東陌盛壺漿

與諸友普明院亭納涼分題

岸幘清涼地翛然樂未窮竹陰過晚雨林表見  
殘虹花影平波上經聲小塢東還思醉吟者寧  
與此時同

梅花

似畏羣芳妬先春發故林曾無鶯蝶戀空被雪  
霜侵不道東風遠應悲上苑深南枝已零落卷

笛寄餘音

依韻和希深立春後祀風伯雨師畢過

午橋莊

青郊誰駐馬謝客思池塘野人微波綠江梅嫩  
藥黃初從莫風雨遂此樂壺觴已愛幽禽語園  
林即日芳

尹子漸歸華產茯苓若人形者賦以贈

行

因歸話茯苓父著桐君籍成形得人物具體存  
標格神岳畜粹和寒松化膏液外凝石稜紫內  
蘊瓊腴白千載忽且暮一朝成琥珀既瑩毫芒  
分不與蚊蚋隔拾芥曾未難為器期增飾至珍  
行處稀美價定多益

初見杏花

不待春風徧煙林獨早開淺紅欺醉粉肯信有  
江梅

宛陵先生集卷第一



宛陵先生集目錄卷第二

西京詩

和載陽登廣福寺閣

和歐陽永叔同遊近郊

和永叔同遊上林院

和王幾道涂次杏花

遊園晚歸馬上

留題希深美檜亭

留守相公雙桂樓

和希深避暑香山寺

和希深晚泛伊川

路中月夕

張侍郎中隱堂

太尉相公伏日宴

送臧尉

新秋普明小飲詩序

得高樹早涼歸

新秋雨夜西齋文會

秋陰

雨中移竹

希深所居

和永叔柘枝詞

和載陽郊外

和永叔得山桂

河陽秋夕

希深惠書

送河清賈主簿

和永叔雪後見寄

和永叔黃河

季父知并州

河陰中寨寒食 再至洛中寒食

同永叔遊嵩山十二題

擬玉臺體七首 無題

目錄終

宛陵先生集卷第二

宋宛陵梅堯臣聖俞著

依韻和歐陽登廣福寺閣

過聞聯騎出登覽思踰清曉漲林煙重春歸野  
水平始看僊杏發已愛袂衣輕誰見吟餘處殘  
陽上古城

依韻和歐陽永叔同遊近郊

洛水橋邊春已迴柳條萋萋眼初開無人拾翠  
過幽渚有客尋芳上古臺林邃珍禽時一囀酒  
酣紅日未西頹知君最是憐風物更約偷閑取  
次來

依韻和永叔同遊上林院後亭見櫻桃

花悉已披謝

去年君到見春遲今日尋芳是夙期祗道朱櫻  
纔弄藥及來幽圃已殘枝飄英尚有遊蜂戀著  
子唯應谷鳥知把酒聊能慰餘景乘歡不厭夕  
陽時

依韻和王幾道涂次杏花有感

馬上逢丹杏芳條拂眼過可憐荒徑少不道故  
園多艷萼粘紅蠟僊葩縹薄羅客心知易感路  
遠奈愁何

遊園晚歸馬上希深命賦

興盡夕陽天言歸躍杏鞦新陰六街樹遠目萬  
家煙歌咽樓千尺吟餘月一弦花間有遊妓醉  
去墮金鉤

留題希深美檜亭

幽深有佳趣曾不減林泉衆綠經新雨殘紅墮  
夕煙栽萱北堂近夢草故池連乘月時來往清  
歌思浩然

留守相公新剏雙桂樓

藻棟起霄間芳條俯可攀晚雲談次改高鳥坐  
中還日映城邊樹虹明雨外山唯應謝池月來  
照衮衣閑

和希深避暑香山寺

有客乘新霽雲林共扣肩輕舟過下渡遠水漲  
前汀原隰含幽藹岑嵐入杳冥誰知得深趣履

齒石苔青

和希深晚泛伊川

放溜下平波舟移不知遠稍廻溪口風恣愛雲  
中嘯水鳥靜相依蘆洲藹將晚歸路莫言賒何  
妨乘月返

路中月夕登霽景臺與唐英話別

風枝不動月光午况是高臺過新雨吳客方思  
千里歸不負洛陽塵與土到時水落鰕鱸肥香  
稻初炊鱸紅縷休言羊酪敵蓴羹我亦長吟念  
東楚平胡馬嘶誰可留去去相望富春渚

張侍郎中隱堂

疇昔人歸老於茲望白雲門高知後慶賓至誦  
先芬草樹中園秀不冠舊里聞寧同江令宅寂  
寞向淮濱

太尉相公中伏日池亭宴會

得山字

何言避徂暑清宴水軒閑竹氣陰池鳳雲峰照  
羸山玳簪方映座絲服亦承顏樂奏寒波上杯  
香綠芰間瓜浮五色爛簾捲半鈎彎今日賓裾

盛衰劉豈足攀

送臧尉

藹藹神僊尉西風躍馬歸離羣賦黃鵠拜慶着  
斑衣雨氣連關黑槐花上路飛同爲洛陽客今  
日故人稀

新秋普明院竹林小飲詩序

余將北歸河陽友人歐陽永叔與二三君具觴  
且選勝絕欲極一日之歡以爲別於是得普明  
精廬醞酒竹林間少長環席去獻酬之禮而上  
不失容下不及亂和然嘯歌趣逸天外酒旣酣  
永叔曰今日之樂無愧於古昔乘美景遠塵俗  
開口道心胸間達則達矣於文則未也命取紙  
寫普賢佳句置坐上各探一句字字爲韻以誌  
茲會之美咸曰永叔言是不爾後人將以我輩  
爲酒肉狂人乎頃刻衆詩皆就乃索大白盡醉  
而去明日第其篇請余爲敘云

得高樹早涼歸

翻然思何苦昨夜秋風高良友念將別幅巾邀

此遂清梵隔寒流亂蟬鳴古樹誰知林下遊復  
得盆中趣池上暑風收竹間秋氣早回塘莫苦  
留已變王孫草未墜高梧葉初生玉井涼愁心  
異潘岳獨自向河陽不減阮家會所嗟當北歸  
耿耿敢辭醉明發此歡非

新秋雨夜西齋文會

夜色際陰靈燈青謝客齋梧桐生靜思絡緯動  
秋懷小酌寧辭醉清言不厭諧誰憐何水部吟  
苦怨空塔

秋陰

已過蕭蕭雨猶成黯黯陰登臨潘岳思慘慄楚  
臣心遠吹鳴高樹低雲冒晚岑又爲關外客不  
忍聽疎砧

雨中移竹

荷鍾冒秋霖忽忽移翠竹欲分溪上陰聊助池  
邊綠中散林未開子猷心已足青青謝栽培豈  
愧凡草木

希深所居官舍新得相府蔬圃以廣西

園

楚相拔葵後蕭條三畝餘煙畦偶連畛蕙圃得  
增墟便欲開春沼何妨薙野蔬始添臺榭美况  
近子雲居

和永叔柘枝詞留守相公南莊按舞

漁陽三疊音隆隆紅蕖亂圻當秋風披香擁霧  
出妖嫋嫋眉壯髮翩驚鴻鏘鏘雜珮離芳渚珠  
帽紅靴振金縷相迎垂手勢如傾障袂倚詞詞  
欲吐最憐應節乍低昂便轉疾徐皆可觀飄揚  
初認雪迴風躑躅還看蠶縈緒小小寧聞怨曲  
長盈盈自解依儔侶藝奇體妙按者誰金貂大  
尹宴清池綺茵繡幄粲輝映玳簪珠履何委蛇  
是時郊原新退暑天清氣爽過林墅准王載酒  
昔嘗聞謝公攜妓那能數始知事簡樂民和不  
厭來觀柘枝舞

依韻和載陽郊外

近隔葱龍曙驚烏睥睨啼日光林杪動吹騎管  
中嘶路遶寒原古煙橫遠戍迷今來異賓孟誰

復嘆雄雞

奉和永叔得辛判官伊陽所寄山桂數  
本封殖之後遂成雅韻以見貺

團團綠桂叢本自幽巖得惠好知不忘青葱寧  
改色香生蓮幕間花白萱堂側月露夜偏滋瓊  
枝相翕赫

河陽秋夕夢與永叔遊嵩避雨於峻極  
院賦詩及覺猶能憶記俄而僕夫自洛  
來云永叔諸君陪希深祠岳因足成短

韻

夕寢北窻下青山夢與尋相歡不異昔勝事却  
疑今風雨幽林靜雲煙古寺深此二句攬衣方  
夢中得  
有感還喜問來音

希深惠書言與師魯永叔子聰幾道遊  
嵩因誦而韻之

聞君奉宸詔瑞祝疑靈岫山水聊得游志願庶  
可就豈無朋從俱况此一二秀方漸建春陌十  
刻殘晝漏初經緱氏嶺古栢尚鬱茂却過輶轅

關巨石相撐關夕齋禮神祠法袞被藻繡畢事  
登山椒常服更短後從者十數人輕齋不為陋  
是時天清陰力氣勇奔驟雲巖杳虧蔽花草藏  
澗竇榜林有珍禽驚聒若避殼盤石暫憇休泓  
泉助吞漱上窺玉女窻嶮絕非可構下玩搗衣  
碓焜燿金紋透尹子體雄狡攀緣愈冒狂歐陽  
稱壯齡疲軟屢顛踣競歡相扶持芒屨資踐蹂  
八僊存故壇三醉孰云謬鄙哉封禪碑數子昔  
鐫鏤偶誌一時事曷虞來者詎絕頂瞰諸峰隘  
然輕宇宙遙思謝塵煩欲知羣鳥獸韓公傳石  
室聞之固已舊當時興稍衰不暇苦尋究東崖  
暗壑中釋子持經呪于今二十年飲食同猿狖  
君子聆法音充爾溢膚膝嘗期躡屐過吾儕色  
先傲叶韻遂乖真諦言茲亦甘自咎中頂會幾望  
涼蟾皓如畫紛紛坐談謔草草具觴且清露濕  
巾裳誰人苦羸瘦便即忘形骸胡為戀纓綬或  
疑桂官近斯語豈狂脊歸來遊少室峭崿殊引  
脰石室迢遞過探訪仍邂逅捫蘿上岑邃僊屋

何廣袤乳水出其間涓涓自成溜凡骨此熏蒸  
靈真安可觀霞壁幾千尋四字侔篆籀咸意苦  
蘇文誠爲造化授標之神清洞民俗未嘗遽忽  
覺風雨冥無能久瞻扣忽忽遂宵征勝事皆可  
復俚歌縱喧譁怪說多駭糅凌晨關塞陽追賞  
顏匪厚窮極四百里寧憚疲左右昨朝書報予  
聞甚醉醇耐所嗟遊遠方心焉倍如疚

送河清賈主簿歸任

不遠水雲間悠悠沂鷁還分亭接雞犬舉酒對  
河山殘雪依荒磧寒煙入暝灣昔人鸞枳歎一  
併在離顏

依韻和永叔雪後見寄兼云自尹家兄  
弟及幾道散後子聰下縣久不得歸頗  
有離索之歎

常欲登芒嶺無由見洛橋雪飛關戍迴人憶剡  
溪遙廣隰嘶征鴈長河起怒飈遽言歡友散能  
使去魂銷晚日窮幽藹愁雲暝泐寥縱令佳約  
在載酒定何邀

依韻和歐陽永叔黃河八韻

少本江南客今爲河曲遊歲時憂漾溢日夕見  
奔流齧岸侵民壤飄槎閣鴈洲峻門波作箭古  
郡鐵爲牛目極高飛鳥身輕不及舟寒冰狐自  
聽源水使嘗求密樹隨灣轉長鬣刮浪收如何  
貴沈玉川興是諸侯

季父知并州

捧詔出明光飛軒陟太行玉墀分近侍虎綬給  
新童笳吹喧行陌旌旗卷夜霜鴈歸汾水綠城  
壓代雲黃土屋春風峭氍毹裘牧騎狂關山寧久  
駐刺宴柳溪傍

河陰中寒寒食

擊柝聲初絕爲魚夢已殘幽禽哢清曉宿雨度  
餘寒爨火明千竈風旗展一竿歸心慙社鷺自  
歎此微官

再至洛中寒食

西洛逢寒食依依似昔年千門方禁火九野自  
生煙飄泊梨花雨追隨杏葉羈遊人莫惜醉風

景滿伊川

同求叔子聰遊嵩山賦十二題

公路澗

我來袁公溪斷岸猶殘壘僵柳遠臨灣新蒲初  
出水行行古臺近兩兩驚禽起雞犬何處聞人  
家深塢裏

拜馬澗

王子昔凌寬國人茲拜馬依俦日夜笙聲入寒  
泉瀉空傳七日期飛鶴何時下

二室道

度嶺失羣山千峰出天際方欣左右看屢改縈  
迴勢勝事誰與同芬然有蘭蕙

自峻極中院步登太室中峯

稅駕綠巖前攀蘿不知倦人從樹杪來路向雲  
端轉忽覺在煙霓回看峰嶺變

玉女窻

玉洞倚霞壁天窻露微明聯鸞去不返啼鳥空  
相驚萬木自虧蔽捫蘿復誰情

玉女擣衣石

幽石稱擣衣擣衣人不見雲縷白飄飄巖樹長  
葱蒨猶應寒夜中山月來鋪練

天門

古壁何蒼蒼穿雲玉梯出欻然起青冥却立觀  
少室前巖復後峯陰晴狀非一

天門泉

冷冷雲外泉的的巖光入靜若僊鑑開寒疑玉  
龍蟄時應下鹿羣跡印青苔濕

天池

安知最高頂清淺水池開有時片雲出倏忽生  
風雷誰羨雙黃鵠刷羽來徘徊

三醉石

相期物外遊共醉僊壇石舉手薄高空清風生  
兩腋都忘塵世煩笑傲聊爲適

登太室中峯

日夕望蒼崖嶮巖在天外及來步其巔下見河  
如帶半壁雲樹昏山根已霧霏

峻極寺

山高路已窮，  
條爾逢蘭若。  
落日老僧閑，  
支頤古松下。  
綬步入禪庭，  
苔蒼但蕭灑。

擬玉臺體七首

欲眠

鴛鴦羅薦開，  
翡翠香幃寂。  
解帶竟羞明，  
移燈向東壁。

攜手曲

攜手出中閨，  
殷勤尅密期。  
密期雖不遠，  
迴顧步遲遲。

雨中歸

來時雲冉冉，  
去值雨霏霏。  
莫怪羅衣濕，  
荆王夢罷歸。

別後

昨日日暮別，  
今日日暮愁。  
猶認縱裙色，  
依在石榴。

夜夜曲

情來不自理，  
明月生南樓。  
坐感昔時樂，  
翻成此夜愁。

夜愁

落日窻中坐

含情獨不語，  
落日窻中時。  
妾意與君意，  
相思只自知。

領邊繡

出門重新製，  
織手行自整。  
願作花工兒，  
長年承素頸。

無題

斗覺瓊枝瘦，  
慵開寶鑑粧。  
臨風恐僊去，  
倚扇怯歌長。  
綠桂薰輕服，  
靈符佩縹囊。  
西隣空自賦，  
不解到君傍。

宛陵先生集卷第二



宛陵先生集目錄卷第三

西京詩

和希深新秋

客鄭遇曇穎

馬判官歸闕

餞彭城公赴隨州

早行道中相逢

古意

送弟歸宣城

河南張應之東齋

河南王尉西齋

劉秀才歸河內

憶洛中舊居

武陵行

西宮怨

夏夜小庭有懷

外兄施伯侃下第

鄭戴及第東歸

施判官赴饒州

楊旼赴官并州

歐陽寺丞桐城宰

祝熙載赴任東陽

彥國通判絳州

餘姚陳寺丞

明州鄭推官

聚蚊

賦秋鴻送劉衡州

流清池

弟歸覲并州

張脩赴威勝軍判官

弔唐俞

任適尉烏程

馬殿丞通判密州

夏侯彥濟武陟主簿

效昌黎體

月夜與兄納涼

隨州錢相公挽詞

僧可真東歸

廖秀才歸衡山縣

魏屯田知楚州

張子野赴鄭州

擬王維偶然作

蘇祠部通判洪州

中秋與希深別

望芒碭山

初見淮山

旌義港阻風

和劉六淮潮

舟中聞蛩

雙野鳧

和才叔岸傍古廟

山光寺

自急流入金陵

早渡長蘆江

采石懷古

望夫山

泊牛渚磯

遊響山

蕪湖口留別弟

金霞閣

送蟾上人遊南嶽

王公慥東歸

幾道隰州判官

目錄終

宛陵先生集卷第三

宋宛陵梅堯臣聖俞著

依韻和希深新秋會東堂

何必水周堂  
翛然萬木涼  
朋簪茲共樂  
節物自迎商  
巧笑承歡劇  
新詞度曲長  
驂鸞悲霧扇  
泛蟻醕雲漿  
並蒂榴房熟  
連叢桂葉香  
人初投轄  
醉客甚搵櫂  
狂鬢約寒鴉  
碧衣輕舞蝶  
黃流波閑任注  
錯席豈依行  
臺壘談寧倦  
厭厭夜未央  
良時誠可惜  
清燕此無荒

客鄭遇曇穎自洛中東歸

禪衣本壞色  
不化洛陽塵  
獨有煙霞染  
况將山水親  
西風入關戍  
宿雨過城闈  
誰羨飄然跡  
吾車亦已巾

馬判官歸闕

與君歸洛陽  
仕宦頗相偶  
在苒遷歲時  
徘徊樂文酒  
今歸已及瓜  
為贈聊折柳  
亦將隨計書  
慘別寧嗟久

餞彭城公赴隨州龍門道上作

零雨送車輪  
初清遠陌塵  
歸藩漢東國  
遮道洛陽人  
伊水照虹旆  
楚山懷玉麟  
征軒不可戀  
梗淚返城闈

早行道中相逢

黯黯雨雲晦  
駸駸車馬繁  
唯憂不及見  
及見返無言

古意

故人留雅曲  
今與新人彈  
新人聽不足  
復使後人歡

送弟良臣歸宣城

喬木句溪邊  
秋光幾曲連  
將歸三畝宅  
遠寄下江船  
伴爾唯征鴈  
悲余有暮蟬  
親朋如見問  
貧外似當年

河南張應之東齋

昔我居此時  
鑿池通竹圃  
池清少游魚  
林淺無棲羽  
至今寒窻風  
靜送枯荷  
雨雨歇  
吏人稀  
知君獨吟苦

河南王尉西齋

官舍古城隅西齋何寂寂種竹幽趣深開屏翠  
光滴青山露南牆落日明東壁危臺起其傍平  
隄坐可觀歲暮野田空天高霜隼擊更憐風月  
時幾弄林間笛

劉秀才歸河內

君家太行下應復近蘇門河氣知寒早嵐煙覺  
暮昏犬鳴林外火笛響月中村父作山陽客逢  
人爲寄言

憶洛中舊居寄求叔兼簡師魯彥國

東堂石榴下夜飲曉未還絺衣濕浩露桂酒生  
朱顏君同尹與富高論曾莫攀開吐仁義奧傲  
睨天地間以此爲朋樂衡門未嘗關自從北闕  
來擾擾時少閑登危欲引望尚不見雲山何由  
覲夫子客袂淚瀾斑

武陵行

生事在漁樵所居亦煙水野艇一竿絲朝朝狎  
清此忽自傍藤陰乘流轉山背始覺景氣佳潛  
通小溪裏常時不見春入谷驚紅藥幽興窮綠

波詭芳心莫已花外一峰明林間碧洞啓遙聞  
雞犬音漸悟人煙邇捨舟遂潛行石徑劣容礙  
豁然有田園竹果相叢倚厖眉鬢髻人條過心  
顏喜尚作秦衣裳那知漢名氏自言逢世亂避  
地因居此來時手種桃今日開如綺更看水上  
花幾度逐風委競引飯彫胡邀飲酌瓊醴復呼  
童稚前綠鬢仍皓齒翻遣念還茅思歸釣鱸  
將辭亦贈言勿道丘壑美鼓枻出僊源繁英猶  
遷迤薄暮返蒼洲微風吹白芷他日欲重過茫  
茫何處是

西宮怨

漢宮中選時天下誰爲校寵至莫言非恩移難  
恃貌一朝居別館悔如何由效買賦豈無金其  
如君不樂

夏夜小亭有懷

西南雨氣濃林上昏月色寒影不隨人寥寥空  
露白

外兄施伯侃下第赴并門叔父招

共是干時者同為失意人言趨太原召如慰死  
陵親茄鼓聽臨塞琴書未離身別君無斗酒當  
識士安貧

鄭戢及第東歸後赴洋州幕

卻生方得桂王粲始從戎一舸辭吳會單車入  
漢中亂山雲木古側徑野泉通欲識風煙美心  
知故國同

施判官赴饒州

昔日里中舊今為幙下英煙波歸楚國風月滿  
都城食有江魚美時無羽檄驚他年儻行縣肯  
使折腰迎

楊旼赴官并州

嘗聞地近胡寒氣盛中都車馬行臨塞關山見  
落榆吳鉤皆尚壯章甫幾為儒寄謝西曹掾能  
吟秀句無

歐陽寺丞桐城宰

葉落淮南樹青山徧馬頭人煙將近郭松竹不  
知秋夜虎林間嘯溪泉舍下流門前仲卿廟遺

跡待君求 朱邑冢  
祠在焉

祝熙載赴任東陽 李都尉客

東陽美山水之子本風流稍去何平叔還追沈  
隱侯清江飛晚雨斜日半滄洲縣道行無愧煙  
蘿有勝遊

彥國通判絳州

結友時未久情親心已照氛埃外自遭風月還  
同調復與任浮沉未嘗趨近要以此雖處貧寧  
防俗者誚今將辭我去盡日來談笑窮巷敝茅  
茨高言出廊廟且作朱轍行聊能發光耀當亦  
就銅墨遠之江海徼山郭寂無喧雲川不妨釣  
所嗟胡越人千里煩登眺

餘姚陳寺丞

試邑來勾越風煙復上游江湖自迎客山月亦  
隨舟海貨通閭市漁歌入縣樓絃琴無外事坐  
見浦帆收

明州推官鄭先輩

應幕海邊郡秋風千里歸隨潮吳榜駛轉浦楚

山微野橘霜前熟江螿露下肥還家候靈鵲人  
想罷鳴機

聚蚊

日落月復昏飛蚊稍離隙聚空雷殷舞庭煙  
羅羅蛛網徒爾施蟾斧詎能磔猛蝎亦助惡腹  
毒將肆螫不能有兩翅索索綠暗壁貴人居大  
第蚊緝圍枕席嗟爾於其中寧奈背如戟忍哉  
傍窮困曾未哀癰瘡利吻競相侵飲血自求益  
蝙蝠空翱翔何嘗爲屏獲鳴蟬飽風露亦不慙  
喙息薨薨勿久恃會有東方白

賦秋鴻送劉衡州

沈

秋鴻整羽翮去就自因時往春南方來遂止天  
泉池天泉水清泚鴛鴦日追隨蒲藻豈不樂江  
湖信所宜今朝風色便暫向衡陽歸洞庭逢葉  
下瀟湘先客飛渚有蘭杜美心無稻糧卑罾繳  
勿爾念鷹隼寧爾窺煙波千萬里足以資盤嬉  
峰前想回日青冥生路岐

清池

泠泠清水池藻荇何參差美人留采掇玉鮪自  
揚馨波瀾日已淺龜鼈日復滋蝦蟆縱跳梁得  
以緣其涯競此長科斗凌亂滿澄澗空有文字  
質非無簡策施僂鯉勿苦羨寧將麤蛤卑徒剖  
腹中書悠悠誰爾知聊保性命理遠潛江海湄  
泚泚曷足道任彼蛙黽爲

弟得臣歸觀并州

知君歸去心已逐秋風起明發登太行遙將望  
汾水藹藹白雲下吾親正居此拜慶曷爲榮新  
除一官美

張脩赴威勝軍判官

青驪渡河水俠氣動刀環入幕沙塵暗臨風鼓  
角開地形通栢谷秋色滿榆關誰復輕儒者難  
淹筆硯間

弔唐俞

通閨年最少才俊罕能雙鵬去塵栖室魂歸霧  
起窻慈親留漢水愛妾返荆江一稚纔能語孰  
然寄達邦

任適尉烏程

俛作程鄉尉折腰還自甘  
卞峰晴照黛雪水曉  
澄藍葑上春田關蘆中走吏參到時蘋葉長柳  
憚在江南

馬殿丞通判密州

晨裝辭北關懷紱貳東侯  
地本全齊勝風仍變  
魯優危帆淮上去古木海邊秋相送江潭客曾  
同十載遊

夏侯彥濟武陟主簿

懷縣曾余往風謠為爾知  
寒先太行近潤接大  
河早實酒裁公秫晨羹翦露葵簿書行正委何  
似布衣時

余居御橋南夜聞秋鳥鳴效昌黎體

都城夜半陰雲黑忽聞轉轂聲  
啾啾嘗憶楚鄉  
有祆鳥一身九首如贅疣或時月暗過閭里緩  
音低語若有求小兒藏頭婦滅火閉門雞犬不  
爾留我問楚俗何苦爾云是鬼車載鬼遊鬼車  
載鬼奚所及抽人之筋繫車軸昔聽此言未能

信欲訪上天終無由今來中土百物正安得遠  
與南方儔上帝因風如可達願令驅逐出九州  
月夜與兄公度納涼閑行至御橋

夕月吐澄明陰雲淨如掃空庭引天翠爽氣生  
懷抱家近御橋頭因為橋畔遊倚欄波上影不  
共水東流思歸此清夜何處是江樓四望遠寂  
歷微風動颼颼觀闕垂萬象山河趨九州壯哉  
帝王宅顧我一蜉蝣富貴非可取田園今向秋  
明當拂衣去試與問扁舟

隨州錢相公挽詞

築巖無往夢遊岱有飛魂墮淚墮侯國遺金漢  
帝恩文章流日域忠孝在王門天道何由問秋  
風徧九原

昔日傷歸國今朝歎舉輜憂愁傳楚些殄悴感  
周詩文草明時訪忠言故吏知居常嗚咽涕齮  
作衆人悲

去年伊水上傾府望雲岑路轉猶廻首人誰不  
殞心可憐飛語後擠恨九幽深從此埋英骨空

令淚滿襟

僧可真東歸因謁范蘇州

仲淹

姑蘇臺畔去雲壑付清機野策過寒水山童護  
衲衣松門正投宿竹笠帶餘暉誰愛村山句使  
君應姓韋

廖秀才歸衡山縣

千里倦為客秋歸鳥榜輕過林湘橘暗收潦楚  
江清晚泊親鷗鷺殘芳襲杜蘅長沙幾日到天  
際見高城

魏屯田知楚州

淮南木葉驚淮上使君行天外高帆出沙頭候  
吏迎夜潮通廢堞秋月滿孤城正遲文翁化從  
來楚俗輕

張子野赴官鄭州

畫室寄東里一官辭上都只應乘小駟寧肯躡  
雙鳧秋雨生陂水高風落廟梧梅山為余訪還  
有舊家無

擬王維偶然作

嵇康任天性傲散喜端居自云安卑者竊比老  
莊歎一月十五日頭面忘洗梳危坐恣搔虱於  
時懶作書一曲情自寄一杯歡有餘尚子志所  
慕阮生甘不如黃精可養壽廣澤且觀魚不堪  
行作吏章服褻猿狙

蘇祠部通判洪州

飛鷁去江西秋飈滿桂旗蘆洲花白處楓岸葉  
丹時沙鳥看來沒雲山愛後移高才屬滕閣家  
擅子卿詩

中秋與希深別後月下寄

薄霧生寒水寥寥艤畫船人傷千里別桂吐十  
分圓把酒非前夕追歡憶去年南樓足佳興好  
在謝林川

望芒碭山

出舟眺古岸林外見脩岡迴頭問榜子前巘是  
芒碭其顛有高廟松栢鬱蒼蒼迤邐堆阜屬蕭  
條茆葉黃千古收王氣一川平夕陽人家纔四  
五雞犬自相望尚爾想新豐誰復思沛鄉臨流

一舉酒可以喻悲傷

初見淮山

遊宦久去國扁舟今始還朝來汴口望喜見淮  
上山斷嶺碧峰出平沙白鳥閑南歸不厭遠况  
在水雲間

旌義港阻風

清晨下長淮忽值秋風惡渺瀰雲霧昏掀合魚  
龍作方驚白浪高又以寒潮落遠渚時出沒輕  
舟自前却將投古戍迷偶得孤港泊下纜寄蘆  
林尋村步芒屨儻有白醪沽聊為野田酌茆屋  
何颼颼瓦罍空索索却持杖頭歸相顧還寂寞  
一夕不能眠孤吟當狂藥

依韻和劉六淮潮

汐潮如有信時向舊痕生始覺回波定還看曲  
渚平舞鷗隨下上寒日共浮傾後夜人無寐遙  
聽入浦聲

舟中聞蛩

秋月滿行舟秋蟲響孤岸豈獨居者愁當令客

心亂展轉重興嗟所嗟時節換時節不苦留川  
涂行已半霜落草根枯清音從此斷誰復過江  
南哀鴻為我伴

雙野鳧

野水雙紋翼雲蘿謾自謀驚飛帶波起行唳拂  
萍開暖日浮還沒寒汀去復來王喬如可挹僂  
焉此徘徊

和才叔岸傍古廟

樹老垂纓亂祠荒向水開偶人經雨踏古屋為  
風摧野鳥棲塵坐漁郎莫竹杯欲傳山鬼曲無  
柰楚辭哀

山光寺煬帝故宮

古橋經廢寺蒼蘚舊離宮栢殿秋陰冷蓮堂暮  
色空鳥啼山藹裏僧語竹林中寂寞蕪城近蕭  
蕭牧笛風

自急流口至長蘆江入金陵

始發碧江口曠然諧遠心風清舟在鑑日落水  
浮金瓜步逢潮信臺城過鴈音故鄉何處是雲



外卽喬林

早渡長蘆江

帶月出寒浦殘星浸水濱帆開風色正舟急浪花分霧氣橫江白雞聲隔岸聞天晴建業近鍾岫起孤雲

采石懷古

青峰來合沓勢壓大江雄舟渡神兵後城荒王氣空山根魚浪白巖壁石蘿紅弄月人何在孤墳細草中

望夫山

亭亭千古質曾是念征夫一作山頭石畏看天際途猶如託蘿蔓不似采蘼蕪時有江雲近儂衣挂六銖

泊牛渚磯

所謂鼓吹山也  
有竹可作笙竿

落帆牛渚前便為牛渚宿波搖殘照中采翠浮巖谷巖谷足幽篁石上羅寒玉裁作媧氏笙堪吹鳳凰曲楚客夕無眠獨將清籟續更看江月來還想燃犀燭

遊響山

久憶門前勝聊乘逸興遊寒雋進溪曲古木暗城頭鳥過空潭響船隨碧瀨流梅花三疊罷煙火起滄洲

蕪湖口留別弟信臣

少也遠辭親俱為異鄉客昨日偶同歸今朝復南適南適畏簡書叨茲六百石重念我當去送我江之側溪山遠更清溪水深轉碧因知惜別情愈賒應愈劇

金霞閣

登臨無盡興清燕日徘徊霞影綠觚落嵐光入牖來離宮分碧瓦太液俯青槐好待邀明月瑤琴為一開

送蟾上人遊南嶽

葉下瀟湘闊盃浮豈道遲賓鴻不到處危狎獨行時翠嶺祝融宅喬松虞舜祠雲霞遊徧日振錫更何之

王公憶東歸

行色上東陌  
秋槐葉亂飛  
囊無一錢用  
篋有古書歸  
羸駟嘶寒草  
荒城背落暉  
莫嫌牛馬隔  
走別八行稀

幾道隰州判官

清曉赴國門  
西風生早涼  
天地大道出  
苑樹短亭傍  
相看車馬色  
共照池水光  
舉酒酒非淺  
明朝誰重觴  
話別語難盡  
去後空回腸  
計彼行路遠  
幾日至洛陽  
洛陽多舊友  
一一道相望  
失意非憔悴  
懷昔無悲傷  
無由戀中國  
不久之南方  
音書儻能問  
鴻鴈亦將翔  
此外念出處  
便為參與商  
到官秋節晚  
塞近百草黃  
定隨劉武威  
校獵赤土崗  
余方楓林下  
野艇泛滄浪  
弄月江波闊  
冒衣裝荷香  
雖知各所適  
未免涕霑裳  
搵袂却引顧  
煙蕪平夕陽  
獨回唯鳥影  
相與過林塘  
朋游頓茲減  
客心仍未央

宛陵先生集卷第三

宛陵先生集目錄卷第四

池州後詩上

池州陳生見過 春陰

春晴對月 植柘子樹

百舌 提壺鳥

青梅 挾彈篇

五日登北山 寄新安錢倅

得未叔回書 建德新墻詩

九月五日謝學士寄醞

九月見梅花 答新安錢學士

答陳五進士 謝賓客挽歌三首

往東流江口寄內 代內答

訪磧坑老僧 除夕與家人飲

立春在元日 遊水簾殿

詠官妓從人 夏雨

五日與陳真卿飲 彼鷺吟

感遇 雪詠

臘日出獵 和楊敏叔秋晚

田家

陶者

縣署叢竹

巧婦

聞未叔謫夷陵

聞尹師魯謫富水

寄饒州范待制

詠右丞醉圃

猛虎行

白鷗

後園桃李花

道傍虎跡行

悼李道士

野田行

水輪詠

山村行

鳴雉詞

寄公異弟

去春城

讀范公述嚴祠碑

禽言四首

讀梅子真傳

宛陵先生集卷第四

宋宛陵梅堯臣聖俞著

池州進士陳生惠然見過不日且行因

以詩贈別

呼童具雞黍頗識故人期竹館忽枉駕山樽聊  
解頰醉歌返北郭春雨生東陂便與千峰隔登  
高空復思

春陰

春陰

濃淡雲無定凄微氣宇寒鳩鳴桑葉吐村暗杏  
花殘客子行裘薄春塘野水寬輕雷欣已發謬  
作採茶官

春晴對月

春晴對月

雲掃魚鱗靜天開桂魄清梨花鑑中色杜宇晝  
時聲寥落將寒食羈離念故京都無惜春意鐫  
酒為誰傾

植梔子樹二窠十一本於松側

舉世多植梨而我學種梔顏色固不別良苦誠  
異宜團團綠堦側豈畏秋風吹同心誰可贈為

目錄終

詠昔人詩

百舌

天窻明未明颯颯過微雨已聞高樹頭百舌聞  
關語幽人枕上聽不聽變盡春聲始飛去

提壺鳥

山路暗松篠幽禽語前後上言勸提壺下言勸  
酤酒但取醒復醉莫問升與斗人生朝菌榮綠  
髮可無負

青梅

梅葉未藏禽梅子青可摘江南小家女手弄門  
前劇齒軟莫勝酸弃之曾不惜寧顧馬上郎春  
風滿行陌

挾彈篇

長安細侯年尚小獨出春郊不須曉手持柘彈  
霸陵邊豈惜金丸射飛鳥金丸射盡飛鳥空解  
衣市酒向新豐醉倒銀餅方肯去去卧紅樓歌  
吹中不管花開與花老明朝還去杜城東

五日登北山望競渡

南方傳競渡多在屈平祠簫鼓滿流水風煙生  
畫旗千橈速飛鳥兩舸刻靈螭盡日來江畔誰  
知輕薄兒

寄新安通判錢學士

昔人言訪舟江水賦清泚冬春常一色深淺皆  
見底崖日半寒潭澄明動朱鯉君懷素已高塵  
慮都應洗

得歐陽永叔回書云見來客問予動靜

備詳

昨日使人回聞君與之坐君問我何為但云思  
寡過寡過其未能得便北窻卧此趣今已深世  
間誰與和

建德新墻詩

山解不管堵筠篁為窳籬初年固可蔽吳歲不  
能支已被巢蜂蠹復為荒蕪薰夏雨久枯脆秋  
風遂傾欹雞鶩恣穿逸牛羊來踐窺我議欲板  
築羣走皆不怡首吏先進白土踈不可為潦雨  
忽暴集澗流如突馳我心曠其極斯語其見欺

用竹乃戶率破得綠而私冬歛葺西角春調完  
北陲循環日有壞煩擾無虛時介決弗爾惑遂  
飭闢其基榛莽一芟去畚鍤能悅隨膏潤非朽  
壤峭削隱金鉞桂華未踰月屹如長雲垂甌澗  
備水害既巧復蓬茨豈唯禦糴豹亦以防狐狸  
且有內外隔絕閭閻巷卑安然茲燕息來者勿  
吾曠

九月五日得姑蘇謝學士寄木蘭堂官

醞

公田五十畝種秫秋未成杯中無濁酒茶上唯  
丹經忽有洞庭客美傳烏與程言盛木蘭露釀  
作甕間清木蘭香未歇玉盃貯華英正值菊初  
坼便來花下傾一飲爲君醉誰能解吾醒吾醒  
已不解百日毛骨輕

九月見梅花

江南風土暖九月見梅花遠客思邊草孤根暗  
磧沙何曾逢寄驛空自聽吹笳今日樽前勝其  
如秋鬢華

新安錢學士以近詩一軸見貺輒成短  
言用敘單悃

早事太尉府謬以才見論身作邑中吏日陪丞  
相尊高山雲外寺伊水渡頭村泉味入香茗松  
色開清罇題詩人半醉馬上景已昏歸來屬後  
乘冠蓋迎國門悠悠失貧賤苒苒歷涼溫而今  
處窮僻落莫思舊恩終日自鮮適終年長不言  
已覺人事寡惟聞雞犬喧東風有來信滿幅蘭  
與蓀深知故人意遺我滌冥煩一章言畫谿  
好如目存何須到雲壑便若遊花源一一先造  
化可以輕瑤琨成誦今在口願將醒病寬

答陳五進士遺山水枕屏

妙畫能成趣谿山迥得君漁舟長映浦巖樹半  
藏雲征鴈無時沒橫橋有處分數峰來枕席曾  
不愧移文

謝賓客挽歌三首

位不登三事才宜列四科清名時自得華冕世  
空多望氣悲埋劍臨風歎逝波吳阡蒿作里楚

挽薤成歌會葬十人至來觀數郡過無由親執  
紼東首淚滂沱

自昔居門下游觀必許借豈將千里別遂作九  
泉乖已恨霜松折行嗟玉樹埋蒼生空有望丹  
旌不勝懷曩日言歸里飛章願乞骸今朝赤松  
畔煙壠對蒼崖

當年罷會稽還郡錦為衣老作龍樓貴終將鳳  
沼違英魂遊岱去石柳渡江歸揚子春風惡南  
徐過客稀衆帆看屢滿素舸獨如飛始見中郎  
孝松門自有輝

往東流江口寄內

艇子逐溪流來至碧江頭隨山知幾曲一曲一  
增愁巢蘆有翠鳥雄雌自相求擘波投遠空丹  
喙橫輕儵呼鳴乃不已共啄向蒼洲而我無羽  
翼安得與子遊

代內答

結髮事君子衣袂未嘗分今朝別君思歷亂如  
絲棼征僕尚顧侶嘶馬猶索羣相送不出壺倚

楹羨飛雲日暮秋風急雀聲簷上集併作千里  
愁愁極翻成泣

訪磻坑老僧

山深無外事日夕愛潺湲跌坐樹間石力耕溪  
上田解言南國事能詠碧雲篇莫貴遠公酒余  
非陶令賢

除夕與家人飲

莫嫌寒漏盡春色來應早風開玉砌梅薰歇金  
爐草稚齒喜成人白頭嗟更老年華箇裏催清  
鏡寧長好

立春在元日

新春與新歲時候不相先未肯欺殘臘何曾占  
舊年綴條花翦絲插戶柳生煙獨坐空山裏唯  
驚節物遷

遊水簾巖

春山時獨往榛穢旋芟斲飛泉蔽幽巖杳藹疏  
朝旭光垂白龍髯鳴漱寒潭玉半壁生書寒陰  
草潤秋綠穿藤出溪口流沫縈山足莫遣吏人

來方歌白雲曲

詠官妓從人

少爲輕薄候夫行落優倡去作小家婦願同貧  
里裝無心歌子夜有意學流黃他日東郊上誰  
人見採桑

夏雨

林梅初弄熟密雨閉重關潤裏衣巾上涼生竹  
樹間水聲通遠澗雲色暝前山野鳥寂無語公  
庭盡晝閑

五日與陳真卿飲

五日逢南國三年別舊都招蒐傳楚客撫節見  
靈巫蒿艾因時採蛟龍爲俗驅清罇與鷺炙忻  
此故人俱

彼鴛吟

斷木喙雖長不啄栢與松松栢本堅直中心無  
蠹蟲廣庭木云美不與松栢比臃腫質性虛朽  
竭招猛鶩主人赫然怒我愛爾何毀彈射出窮  
山羣鳥亦相喜啁啾弄好音自謂得天理哀哉

彼鴛禽吻血徒爲爾鷹鷂不搏擊狐兔縱橫起  
况茲樹腹怠力去宜瀆死

感遇

衆默瘖莫辨衆寐盲不知問而使之對覺而使  
之窺瘖盲自窮矣所感在一時苟昧哲人理寐  
默定妍姪

雪詠

雪色混青冥奉幃宿酒醒龍地綠古木鳳鷄舞  
幽庭密勢因風力輕姿任物形公堂何寂寞積  
案對玄經

臘日出獵因遊梅山蘭若

我與二三騎爭馳孤戍旁逐麋逢野寺息馬據  
胡牀鷹想支公好人思滿上狂歸來何薄暮煙  
火照溪光

依韻和楊敏叔吳門秋晚見寄

方在洞庭上秋懷那得禁西風楚波急度鴈海  
雲陰洛客吟初苦騷人思已深顛毛隨日減冉  
冉不勝簪

田家

南山嘗種豈碎茨落風雨空收一束其無物充煎釜

陶者

陶盡門前土屋上無片瓦十指不霑泥鱗鱗居大厦

縣署叢竹

裊裊幽亭竹團團自結叢寒生綠罇上影入翠屏中陶柳應慙弱潘花只競紅方持雪霜操不敢倚春風

巧婦

巧婦口流血辛勤非一朝莠茶時補紕風雨畏漂搖所託樹枝弱而嗟巢室翹周公誠自感聊復賦鳴鴉

聞歐陽永叔謫夷陵

共在西都日居常慷慨言今嬰明主怒直雪諫臣寬謫向蠻荆去行當霧雨繁黃牛三峽近切莫聽愁猿

聞尹師魯謫富水

朝見諫臣逐暮章從謫官附炎人所易抱義爾惟難寧作沉泥玉無為媚渚蘭心知歸有日時

向斗牛看

寄饒州范待制

山水番君國文章漢侍臣古來中酒地今見獨醒人坐嘯安浮俗談詩接上賓何由趨盛府徒爾望清塵

詠王右丞所畫阮步兵醉圖

胡公暉新勒石

右軍筆通妙阮籍思玄虛獨畫來東平倒冠醉乘驢力頑不肯進俛首耳前趨一人牽且顧一士旁挾扶捉鞍舉雙足閉目忘窮途想像得風度纖悉古衣裾玉骨化為土丹青終不渝而今幾百歲乃有胡公踈買石遂留刻漬墨許傳模白黑就髮髯毫芒辨精麤千古畜深意終朝懸座隅誰謂盈尺紙不慙雲霧圖

猛虎行

山木暮蒼蒼風淒茄葉黃有虎始離穴熊羆安



敢當掉尾爲旗纛磨牙爲劍鉞猛氣吞赤豹雄  
威躡封狼不貪犬與豕不窺藩與墻當途食人  
肉所獲乃堂堂食人旣我分安得爲不祥麋鹿  
豈非命其類寧不傷滿野設罝網競以充圓方  
而欲我無殺奈何饑餒腸

白鷗

喬木暗青山晴川下白鷗春雲生嶺上積雪在  
鷺間綠草張新翳柔冠總翠髮時哉卷文素不  
是雜斑斑

後園桃李花

後園桃李花灼灼復皎皎南枝開已繁北枝繁  
尚少藹萼相輝映根本自鉤繞無爲驚風吹紛  
紛逐飛鳥

道傍虎跡行

朝履猛虎迹暮宿猛虎林猛虎終夜嘯陰風生  
遠岑我懷何所畏所畏在官箴傷哉此遺體冒  
險輕百金

脩真觀李道士年老貧餓無所依忽縊

死因爲詩以悼之

唐室王子後黃冠事隱淪餐霞不滿腹披雲不  
蔽身八十不能死縊以頭上巾始慕老莊術終  
厭道德貧營營求長生反困甑中塵

野田行

輕雷長陂水農事乃及辰茅旌送山鬼瓦鼓迎  
田神青臯暗藏雉萬木欣已春桑間偶耕者誰  
復來問津

水輪詠

孤輪運寒水無乃農者營隨流轉自速居高還  
復傾利纔賦滄間功欲霖雨并不學假混沌亡  
機抱甕罍

山村行

征馬去不息幽禽隨處聞深源樹翁鬱曲塢花  
芬蓋淡淡平田水濛濛牛嶺雲長鬢弄春女溪  
上自湔裙

鳴雉詞

雄雉鳴桑林雌雉雉麥隴結愛誠有宜別啄義

亦疎哺雛深莽中摧頽錦翅擁辛勤何爾為應  
自念遺種

寄公異弟

池塘去後春一夕生綠草無由夢阿連詩句何  
能好

去春城

前日去春城今朝還故陌馬有甚煩意人多遠  
行色暫爾厭風埃那堪為久客

讀范桐廬述嚴先生祠堂碑

二蛇志不同相得榛莽裏一蛇化為龍一蛇化  
為雉龍飛上高衢雉飛入深水為蜃自得宜潛  
游滄海淡變化雖各殊有道固終始光武與嚴  
陵其義亦云爾所遇在草昧既貴不為起翻然  
歸富春曾不相助治至今存清芬烜赫耀圖史  
人傳七里灘昔日來釣此灘上水濺濺灘下石  
齒齒其人不可見其事清且美有客乘朱輪徘徊  
想前軌著辭刻之碑復使存厥祀欲以廉貪  
夫又以立懦士千載名不忘休哉古君子

禽言四首

子規

不如歸去春山云暮萬木兮參雲蜀天兮何處  
人言有翼可歸飛安用空啼向高樹

提壺

提壺蘆沽美酒風為賓樹為友山花繚亂目前  
開勸爾今朝千萬壽

山鳥

婆餅焦兒不食爾父向何之爾母山頭化為石  
山頭化石可奈何遂作微禽啼不息

竹雞

泥滑滑苦竹崗雨蕭蕭馬上郎馬蹄凌兢雨又  
急此鳥為君應斷腸

讀漢書梅子真傳

子真實吾祖耿介仕炎漢權臣始擅朝忠良被  
塗炭輦下莫敢言上書陳治亂是時卿大夫曾  
不負愧汗其文信雄深爛然今可玩危言識禍  
機滅迹思汗漫一朝弃妻子龍性寧羈絆九江

傳神僊會稽隱屨開舊市越溪陰家山鏡湖畔  
唯餘千載名撫卷一長歎

宛陵先生集目錄卷第五

池州後詩<sub>上</sub>

贈黃庭筠舉進士 和滕公游穿山洞

贈陳真卿秋試 秋日詠蟬

范夫人挽詞 弔礦坑惠燈上人

寄題石埭碧瀾亭 斑竹管筆

古意 觀博陽山火

聞鴈寄歐陽 送謝舍人奉使

觀放鷁子 食橙寄謝舍人

夜聞居人喊虎 採白木

寓言 送李尉之邵武

銅坑 朝日

失鷓鴣 過小石潭

縣齋對雪 對花有感

山中夜行 啄木

夢與公度同賦 和綺翁遊齊山寺

池州後<sub>下</sub>

范待制約遊廬山 范饒州語食河豚

宛陵先生集卷第四

徐元與遊遊山

和元與遊春

留別李君

離蕪湖

寄馬祕書

寄建德徐元與

詠苜蓿

汴河雨後呈同行

夏日汴中作

夢故府錢公

謝紫微寄畫鷺

宿州河亭書事

晚泊觀闢雞

聞表兄施先輩上第

雍丘逢錢寺丞

廟子灣辭

送蔡侍禁赴長沙

送馬廷評之餘姚

送李寺丞

送馬廷評知康州

過鳴鴈城

送余駕部知江州

和陳祕校見寄

送張子野知鹿邑

送王紫微北使

九月都下對雪

答劉弟示詩

劉秀才見過

和劉敞秀才

和劉十秋霖

送劉十往荆渚

宛陵先生集卷第五

宋宛陵梅堯臣聖俞著

贈黃庭筠舉進士

橘柚生南國幽林日蔥蒨上有嘉禽鳴五色被  
餘絢彼美發華英厥包待秋薦根本當自持無  
為風土變

和滕公遊穿山洞

洞口水石淺潺潺瀉瀉綠蒲綠源進巖實陰黑人  
境殊中言有物怪蟠蟄春未蘇霖雨雖有意風  
雷莫有扶風雷自鼓盪不久當何如幸欣禪林  
近鍾梵來有無回策履幽逕衣香草露濡老僧  
長松下麋鹿與之俱溪雲時見起山鳥自相呼  
美爾得茲樂何用勞形軀

陳真卿將有秋試條見訪不日告行送

於北門歌鵠庭為五言以贈

送君北崗上舉酒歌黃鵠黃鵠去何高天池待

棲宿寧復戀江湖聊茲混雞鷺暉暉振羽裳不

美淵明菊

目錄終

秋日詠蟬

羣蟲喜炎熱此獨愛高陰薄蛻聊依葉清聲已  
出林人閑感衰節風急雜遙砧虛腹曾何竟常  
憂蟾斧侵

范饒州夫人挽詞二首

聽飲大夫日止言京兆辰常憂伯宗直曾識仲  
卿貧蒿里歸魂遠芝山旅殯新江邊有孤鶴嘹  
唳獨傷神

君子喪良偶拊棺哀有餘莊生慙擊缶潘岳感  
游魚夕苑凋朱槿秋江落晚蕖猶應思所歷入  
室淚漣如

弔礪坑惠燈上人

生樓雲際巖沒葬寺傍村破案殘經卷新墳出  
樹根松悲隔溪路月照舊山門自昔多詩句而  
今幾許存

寄題石埭權縣樂尉碧澗亭

遙知溪上亭秋水漾冷冷雲影無時翠嵐光到  
底清危樓喧晚鼓驚鷺起寒汀聊作淵明飲臨

流酒易醒

斑竹管筆

翠管江潭竹斑斑紅淚滋東毫何勁直在囊許  
操持欲寫湘靈怨堪傳虞舜辭蔚然君子器安  
用俗人知

古意

月缺不改光劔折不改剛月缺鬼易滿劔折鑄  
復良勢利壓山岳難屈志士腸男兒自有守可  
殺不可苟

觀博陽山火

十月原野枯連山起狂燒高焰過危峰飛火入  
遐嶠玉石被焚灼誰能見輝耀猿猱失輕捷亦  
不暇相弔長風又助惡怒號生萬竅炎炎赤龍  
奔劃劃陰電笑願傾寒江湖勢逆難沃澆願傾  
天河水雖順雲衢遙青松心已爛蔓草根未焦  
小農候春鋤寒客失冬樵誰知兼并子平陸闕  
肥饒不易天地意長養非一朝

聞鴈寄歐陽夷陵

閑坐獨無寐，鴈來更未闌。  
聲長河漢迥，影落戶庭寒。  
荆楚橘包熟，瀟湘楓葉丹。  
南飛過三峽，試問故人看。

送謝舍人奉使北朝

漢使下西清，胡人擁道迎。  
寒笳隨宿堡，衛甲出孤城。  
犯雪貂裘重，衝風錦綬輕。  
山川辭國遠，車騎踏沙行。  
授館穗為幄，供庖酪和羹。  
戎王拜天賜，虜帥伏名卿。  
紫塞千烽靜，黃雲萬里平。  
甘泉歸奏日，重見鳳池榮。

觀放鶴子

白哲少年子，秋郊臂蒼隼。  
日暖饑目開，風微雙翅緊。  
草際鳴鶉驚，蒿間黃雀窘。  
下韝誠必獲得，俊還復晒碎腦。  
此非辜食肉爾，何忍取樂在須臾。  
我我心良惻憫。

食橙寄謝舍人

洞庭朱橘未弄色，襄水錦橙已變黃。  
玉臼擣齏憐繪美，金盤按酒助盃香。  
雖生南土名猶重，未信中州客厭嘗。  
欲寄白苞憑驛去，只應佳味怯

風霜

夜聞居人喊虎

猛虎豈云猛，潛藏伺天昏。  
行行出叢薄，稍稍入孤村。  
孤村何所利，所利大與狇。  
誰知仁者勇，去惡義自敦。

採白木

吳山霧露清，羣草多秀發。  
白木結靈根，持鋤採秋月。  
歸來濯寒澗，香氣流不歇。  
夜火煮石泉，朝煙徧巖窟。  
千歲扶玉顏，終年固玄髮。  
曾非首陽人，敢慕食薇蕨。

寓言

寒燈不照遠，光止一室明。  
小人不慮遠，義止目前榮。  
燈既無久焰，人亦無久情。  
誰言結明月，月豈長盈。

送李尉子京之邵武光澤

母老不擇祿，一官勤夙興。  
長河未結凍，去客已懷冰。  
露蟬不飽腹，志士甘曲肱。  
遠方人所畏，所畏非所兢。

銅坑

碧鑛不出土青山鑿不休青山鑿不休坐令鬼  
神愁

朝日

日色纔出海曉月無光彩曉月在青空不與日  
色同誠知大君德照耀無不通

失鷓鴣

愛說日已久開籠為馴故點臆雪花圓連祛浪  
紋素鉤軻格磔鳴鶉耗翻翁去誰知煙渚深綠  
水脩篁處

過小石潭

樹老石連潭潭深煙翠入羣魚石下游獨鳥潭  
上立泉暖草長綠山高風自急徘徊興不窮苔  
屐雲霑濕

縣齋對雪

密雪夜來積起見萬物春山川忽改色草木一  
以新古邑失荒穢王路覆平均從茲慶豐年蹈  
詠慙小臣

對花有感

新花朝竟妍故花色顛顛明日花更開新花何  
以異

山中夜行

孤客心多恐寒風夜度溪山長羸馬困月黑怪  
禽啼遠火生樵舍荒榛亂野蹊喜言林館近聞  
犬入猶迷

啄木

中園啄盡蠹未有出林飛不識黃金彈雙翎墜  
落暉

夢與公度同賦藕華追錄之

吳王舊宮闕水殿芙蓉披濁泥留玉骨疑是葬  
西施西施竟不滅嬌艷照清池

和綺翁游齊山寺次其韻

蒼山南望截雲煙中有紺宇通諸天長橋直度  
清溪水寒湖收潦曠平田古木陰森大堤上千  
峰濃淡高樓前龍筍未迓角出縮虎石亂踞筋  
拳攀陰崖乳泉濕苔薛陽谷暖氣留蘭茝澗戶

曉關煙的的松軒夜啓月娟娟聞有謫僊乘輿  
入飄然欲拍洪崖肩玩遊逐勝不覺遠露竒發  
怪工無全捫蘿但識康樂徑飲酒安問遠公禪  
清猿不到俗士耳香草已入騷人篇水鳥念佛  
次淨野鹿啣花來象筵在昔探賞猶可數深  
景秀句今得傳辭韻險絕茲所駭何特杜牧專  
當年重以平淡若古樂聽之疏越如朱絃秘藏  
褚中爲不朽咨諏坐上皆曰然誰意麤官獲此  
覓洗去鄙吝空池邊聊欲報言罕驛使春郊唯  
見鴈連連

池州後詩下

范待制約遊廬山以故不往因寄

平昔愛山水茲聞廬嶽遊遠期無逸興獨往畏  
湍流舉手謝雲壑棲心暫鳥鷗香爐碧峰下應  
爲一遲留

范饒州坐中客語食河豚魚

春洲生荻芽春岸飛楊花河豚當是時貴不數  
魚鰕其狀已可怪其毒亦莫加念腹若封豕怒

目猶吳蛙庖煎苟失所入喉爲鏤鉚若此喪軀  
體何須資齒牙持問南方人黨護復矜誇皆言  
美無度誰謂死如麻我語不能屈自思空咄嗟  
退之來潮陽始憚餐籠蛇子厚居柳州而甘食  
蝦蟇二物雖可憎性命無舛差斯味曾不比中  
藏禍無涯甚美惡亦稱此言誠可嘉

徐元輿見邀與諸君同遊至峯山溪上  
作

春霽重行行行在墟里攜懷厭樓觀寓興欣  
山水斷壁翠連雲寒流清見底主人開綠樽下  
馬臨芳芷澄溜瀉灣澗跳波生石齒園林始弄  
萼臯壠時鳴雉談讌忘機心笑言驚俗耳曠哉  
茲日遊何美稽山美

和元輿遊春次用其韻

乘閑多遠興信馬與君行碧樹斜通市清流曲  
抱城山花高下色春鳥短長聲日暮吾廬近還  
歌空復情

留別李君君頗有歸意而未遂



酌我罇中酒知君羨北歸如何沙上鳥逐逐片帆飛

離蕪湖至觀頭橋

江口泊來久蒹蒲長舊苗爭雜洲鵲聞遺子浦魚跳宿岸欣逢戍歸船競趁潮時時望鄉樹已恨白雲遙

馬秘書始約同行久而未至因以寄

渡江落我前入汴居我後日日是南風時時爲迴首逢船一借問遠棹見來否明朝儻相及開步河堤柳

寄建德徐元興

才子方爲邑千峰對縣門靜寒琴意古閑厭鳥聲喧山茗烹仍綠池蓮摘更繁訟稀應物詠庭下長蘭蓀

詠苜蓿

苜蓿來西域蒲萄亦旣隨胡人初未惜漢使始能持宛馬當求日離宮舊種時黃花今自發撩亂牧牛陂

汴河雨後呈同行馬秘書

雨霽晚虹收河堤淨如掃清陰拂人樹翠色垂流草漢漕走王都華言雜夷獠時方同馬生野泊聊論道

夏日汴中作

倚棹望平野低雲密未收黃鸝度高柳歸燕拂行舟濁水不堪照清江空憶遊晚晴蒸潤劇喘月見吳牛

夢故府錢公

故相方來夢分明接座隅只知冠劍是不道死生殊西府看如舊東山詠久徂遽然興寤歎不覺淚霑鬚

謝紫微以畫鷺二軸爲寄

白鷺畫雙素粉毫幽趣多翹沙依折葦刷羽對衰荷浦思懸秋壁江情憶釣簑因君遂相寄時詠對滄波

宿州河亭書事

遠泛千里舟暫向郊亭泊觀物趣無窮適情吟

有託林中鷄舅，筵席上蠅虎攫。雨久草苗盛，田  
蕪瓜蔓翳。香粳稚子慣，脫粟家人薄。少年都下  
來，聊問時所作。新衣尚穿束，舊服變衰博。我今  
貧且賤，短褐隨宜著。

晚泊觀鬪雞

舟子抱雞來，雄雉峙高岸。側行初取勢，俯啄示  
無憚。先鳴氣益振，奮擊心非愞。勇頸毛逆張，怒  
目皆裂肝。血流何所爭，死鬪欲充玩。應當激猛  
毅，豈獨專晨旦。勝酒人自私，粒食誰爾喚。朽懷  
彼興魏，傍睨當衰漢。徒然驅國衆，曾靡救時難。  
羣雄自苦戰，九錫邀平亂。寶玉歸大姦，干戈託  
奇算。從來小資大聊用，一長歎。

聞表兄施先輩上第

昔人事功名，五十未為老。而今君已及，得桂誠  
非早。所慰白頭親，且將黃綬好。吾始日夜心，望  
盡京關道。拜慶早歸來，莫變秋庭草。

雍丘逢錢寺丞載陽

殷勤魏公子，落莫吳王孫。下客獨垂淚，傷心魚

舊恩

廟子灣辭

廟子灣風俗，云有白鼈。憑險日為波，潮以驚異。  
上下余過而作辭云

我之東來，今過彼雍丘。舟師奏功，今濁水湍流。  
歷長灣，今勢曲鉤。傾高斗折，今若奔虬。潛伏怪  
物，今深幽幽。發作暴漲，今為潮頭。土人立祠，今  
在彼沙洲。老木蒼蒼，今蟬噪啾啾。輪卒引綽，今  
蓬首聳體。劇縲囚赤日，上煎今膠津。蹙氣塞咽，  
喉胸盪肩。挨同輓牛，足進復退。不得休竟，持紙  
幣挂廟。陬微風飄揚，如喜收我。今語神神聽，不  
何不歸海。事陽侯，穹魚大龜非爾儔。奚必區區  
此汴溝，驚愚駭俗。得有羞去，就當決何遲留。

送蔡侍禁赴長沙

寒葉下瀟湘之官，逐鴈行水。經菱浦，晚船過橘  
洲。香二女竹林外，三間楓葉傍。平時息戎律，物  
景助才章。

送馬廷評之餘姚

越鄉知勝楚君去莫辭遙曉日魚蝦市新霜橘  
柚橋河流通海道山井應江潮近邑逢鷗鳥先  
應避畫橈

送秀州海鹽知縣李寺丞

吳帆千里去邑屋富魚鹽霜鶴亭臯唳風鳥海  
客占滄涼朝日近紫翠晚山尖若過陸機宅寒  
蕪應不嫌

送馬廷評知康州

南去晉康郡風帆幾千里辭家上洞庭落葉過  
湘水龍吏迎使君壺漿出蠻壘問俗言未通觀  
風想先喜曾非異方趣頗與華人擬期子寄梅  
花無由問行李

過鳴鴈城

九月過鳴鴈斜陽上廢臺兵車千載會奈柘萬  
疇開代謝隨秋草英靈化死灰我來空詠古寒  
鳥有餘哀

送余駕部江州

內史九江行潦收波已清何時鷓舟上遠見爐

峰迎野色連葭菼秋香薦橘橙寒潮如特送不  
冝過盜城

依韻和陳秘校見寄

鬱鬱東堂桂常期接袂攀羽翰殊不及蓬華却  
空還江水幾經歲鑑中無壯顏音塵能見問誰  
道隔雲山

送張子野秘丞知鹿邑

忽作五年別相逢雙鬢疎不知從此去當見復  
何如公林時爲酒晨庖日有魚沛譙風物美聊  
以樂琴書

送王紫微北使

天子命儒臣退方重專對持書下西關擁節來  
窮塞貂服紫蒙茸虎旗光綵絳將迎走羶騎衛  
從羅金鎧當宣漢恩德更使胡欣戴幾日過陰  
山南飛鴈相背

九月都下對雪寄末叔師魯

陰風中夜鳴密雪逗曉積誰言有蓬巷但見鋪  
瑤席忽憶在山中開戶羣峰白當時吟不厭盡

日坐巖石傍，惺惺懷故人。憔悴為遷客，欲泛剡溪船。路長安可適。

劉弟示詩一軸，走筆答之。

昔與伯氏吟青銅，照人髮。今又讀君詩，寒水徹人骨。時時探古趣，往往到月窟。清濟流不休，終期至溟渤。

劉十秀才見過尋以為寄次韻和酬

放言破崖岸，塵事盡磨刮。况此氣澄明，幽襟亦軒豁。竟日坐衡茅，同心異胡越。吾道今不孤，長吟為君發。

依韻和劉敞秀才

安得采虛名，師道欲吾廣。雖然存術業，曾不計少長。孔孟久已亡，富貴得亦儻。後生不聞義，前輩懼為黨。退之昔獨傳，力振功不賞。舌吻張洪鍾，小大扣必響。近世復泯滅，務覺多忽况。今子誠有志，方駕已屢枉。自慙懷道淺，所得可下上。正如種青松，而欲託朽壤。典冊皆可尋，聖言皆可仰。幸與增我過，此語固不爽。

依韻和劉十秋霖

秋草更綠秋林衰，長安遊客未成衣。淒淒斗欲變寒色，一夜獨語看燈輝。

送劉十往荆渚

臨水一太息，解舟當落暉。上樓人已遠，極目鳥空飛。荆楚時方晏，江湖客未歸。定知吟憶處，林外月光微。

宛陵先生集卷第五

宛陵先生集目錄卷第六

池州後詩下

裕禮頌聖德詩 獎諭

裕享觀禮二十韻 寶元聖德詩

送胡臣秀才 送張秀才之淮南

還文雅師書帙 和徐元與

送田賢良江寧倅 送邵夢得

送蕭監丞 南隣蕭寺丞夜訪

讀司馬季主傳 臘日雪

和王祕校見寄 送張尉乞侍養

和子聰見寄 送何山人歸蜀

寄衡山長老 渚橋送張秘校

南陽謝公祈雨 西禪院竹

新霽望支笠山 贈師厚生日

晝寢 過白水

泛舟偶呈求叔 送求叔歸乾德

代寄求叔四十韻 漸嘉樓望雨

和謝舍人存震 和謝舍人新秋

中秋新霽 陪謝紫微晚泛

陪覽秀亭拋壻 傷馬

一日曲

汝州後詩

和謝副閣寄新酒 送殿丞宰巫山

朔風寄求叔 襄城對雪

雪夜留梁推官飲 謝紫微挽詞三首

求叔南陽至 贈琴僧知白

宋教授還邸

目錄終

宛陵先生集卷第六

宋宛陵梅堯臣聖俞著

袷禮頌聖德詩

溥哉孝享將事于寧文武卿士冠劍在庭爰俟  
帝齋風霰其零風霰不已鈎陳豹尾龍旂太常  
立列比比帝居路寢百辟就次至于穀旦漫漫  
翳翳帝入靈宮左撞黃鐘陞階置玉日氣曠鴻  
鴻鴻杲杲氛駭陰掃宿于太宮月星皓皓侍祠  
之臣鵠舉鷺振或捧其匜或進其巾輔相夾導  
俯僂鱗鱗圭瓚以陳登歌以均東向虛位發爵  
親親平明帝還紫宸序班望帝之顏穆穆閑閑  
簷步廊廊雪浮陽光大楹爛爛朱陛煌煌稱祝  
萬壽萬壽無疆却登寶輿以御端門揭雞肆赦  
雷動乾坤于時都人于時嬪女于時蠻夷異口  
同語天子萬年仁聖之主臣時執冊與物咸覩  
敢播于詩庶聞九土

獎諭

勅梅堯臣省所進袷享詩事具悉爾學優而粹

行懿而淳以詩自名爲衆所服矧乃詠歌祖宗  
之功德述禮樂之聲容宜被朱絃以薦清廟載  
披來獻深用歎嘉故茲獎諭想宜知悉

袷享觀禮二十韻

卜惟陽月吉孝享禮方脩齋幄嚴宮殿羣臣奉  
冕旒北風先集霰夜雪競侵幃羽仗天街立龍  
笳象魏流翌朝升寶輅夾道列華輶琳宇躬將  
款珠塵密未收撞鐘鈞奏合奠玉日光浮捧冊  
叨於左觀儀得以周帝來清廟下月欲大刀頭  
既裸還初次更衣戴遠游黃麾轉槐路朱輦駕  
雲虬武士羅金甲中人着錦襦千官入稱慶萬  
國與同休却出紫宸閣俄登宣德樓雞星傳異  
令鶴馭作天郵肆赦通皇澤深仁被九州巍巍  
百世業坦坦四夷柔惠及高年叟恩差五等侯  
力田仍給復有道俾旁求何以歌堯美茲同擊  
壤謳

寶元聖德詩

齋誠羽衛陳庚戌推覺莢靈宮容物備清廟威

儀攝遲明導玉輿出宿戒清堞冥濛雲霧低泆  
泆乾坤接時雪凝九霄金笳競三疊來賓萬國  
會受職百神協中夜卽壇壇濃陰駁鱗鬣及爾  
圭幣升煥然星斗曄華鍾帝樂張法從天衢躡  
端門清旭上肆宥歡聲浹寶圖增大號元曆開  
皇劫吉甫獨何人詠歌揚聖業

送胡臣秀才

汴水日夜淺歸船不可留天高雲就嶺地冷鴈  
迴洲江館魚堪食家林橘已收平生素業在莫  
見里人羞

送張秀才之淮南

聊爲楚客唱一送淮南行出汴遠心喜移舟孤  
岫橫危帆將進浦寒霧不分城枚乘舊居處向  
來秋草生

還文雅師書帙

編絕不加新于今十二春綠窻重展目靜几勿  
生塵豈愛吾廬日終將道者親莫嫌同刺字漫  
減看難真

依韻和徐元與讀寄內詩戲成

鴛鴦同白首相得在中河水客莫驚咲雲間比  
翼多

送賢良田太丞通判江寧

世爲燕趙客慷慨有奇才對策漢庭後拜官江  
國來舟從瓜步去潮自蔣山回心寄城頭月相  
隨上古臺

送邵夢得求康軍判官

且歸洛中明年春赴任

言離洛陽日正值春風前伊水矯白鷺蜀山鳴  
杜鵑輕袍游宦去匹馬度關年若過君平肆窮  
通可問焉

送蕭監丞濟幸臨邑

羨君先拜邑殘臘見登車遠驛寒雲重長郊積  
雪餘行當勸民稼始信帶經鋤還到濟南日應  
傳古尚書

南隣蕭寺丞夜訪別

憶昨偶相親相親如舊友雖言我巷殊正住君  
家後壁裏射燈光籬根分井口來邀食有魚屢

過貧無酒明日定徂征聊茲酌升斗宵長莫惜  
醉路遠空迴首

讀司馬季主傳贈何山人

長安新雨後九陌少行人同輿有宋賈游市懷  
隱淪日聞古賢哲必與醫卜隣來過季主室再  
拜語遂巡矍然悟辭貌何為居埃塵捧腹乃大  
咲吾道非爾臻驪巖罷驢駟鳳豈燕雀親筮占  
聊助上功利儻及民大夫與博士登車若喪神  
今我見何遜始驗太史真順性誨善惡不離義  
與仁言孝諭為子言忠諭為臣又得蜀嚴比寧  
將日者均京都盛龜筮坐肆如魚鱗噤口不正  
言唯能辨冬春鴻冥復所慕安得雞鶩馴

臘日雪

風毛隨校臘浩浩古原沙寒入弓聲健陰藏鬼  
徑賒馬頭迷玉勒鷹背落梅花少壯心空在悠  
然感歲華

依韻和雍丘尉王秘校北見寄

東瞻杞國城半日鳥飛程度鴈不曾下新文誰

寄評舊年因使至秀句欲人驚聊効題齋壁先  
賢亦以旌

送新安張尉乞侍養歸淮甸

天兵出塞日西尉去官初却衣老萊服曾無梅  
福書春郊欲迴鴈寒水正沉魚任意歸舟駛風  
煙亦自如

依韻和子聰見寄

嘗念餞行舟風蟬動去愁獨登孤岸立不見遠  
帆收及送故人盡亦嗟歸迹留洛陽君更憶寧  
復醉危樓

送何遜山人歸蜀

春風入樹綠童稚望柴扉遠壑杜鵑響前山蜀  
客歸到家逢社燕下馬潯征衣終日自臨水應  
知已息機

寄衡山福嚴長老

衡山幾千里聞在湘川側雲霞不可到峰壑無  
由識方丈開其間青松隱寒色飛鴻尚莫過况  
寄雙鳧翼



曲渚橋送張秘校赴慶州幕

野客伐山桂橫爲曲渚橋勢危寧過馬徑狹欲  
通樵小艇何妨繫離覓正此銷想君迴首處虹  
影在林椒

南陽謝公祈雨

雲龍本職雨不雨其失職萬草欲焚如千疇幾  
赭色刺史爲民憂侵晨車競飭竭來欵官祠豈  
不念黍稷饗霽隨輪軒霧霏徧吟域孰謂雲龍  
愚能成仁惠德濯濯羣物新葱葱衆苗殖莫比  
邵父渠初慙用人力

西禪院竹

古寺帶脩岡青葱萬竿玉春梢長舊林夏雨濕  
新綠幽禽嘯呼雜晚照陰晴續解帶欲忘歸壺  
觴歡自足

新霽望岷笠山

謝紫微  
坐中賦

北望直百里我我千仞青斷虹迎日盡飛雨帶  
龍腥陰壑烟雲畜陽崖草木靈登臨終不厭時  
許到茲亭

師厚生日因以詩贈

龍驤產龍駒良金出良冶良冶無頑礦駒龍豈  
凡馬致遠在御徒作礪由工者君子生慶門詩  
書未嘗捨進道期日隆無愧金馬下

晝寢

嘗聞晉高士時偃北窻風及爾寂無慮始知機  
盡空便便嘲已解栩栩夢何窮一寤復一寐百  
年消此中

過白水

下馬獨懷古脩然臨渡風真人去來又流水自  
無窮雨闊沙痕漲灣平野色通曾興漢家業今  
與百川同

泛舟城隅呈宋叔

藤竹繞城陰煙梢拂濠水山禽時一鳴楚客孤  
舟裏孤舟穿綠荷獵獵雨新過誰思暮江上只  
尺採蓮歌

送宋叔歸乾德

淵明節本高曾不爲吏屈斗酒從故人藍輿傲

華絳悠然日遠空曠爾遺羣物飲罷即言歸胸  
中寧鬱鬱

代書寄歐陽永叔四十韻

始謫夷陵日當居建德年一書寃逐客四詠繼  
稱賢自謂臨江徼相逢莫我先白醪封畫榼素  
鯉養泓泉戒吏收山粟呼童惜沼蓮只期東浦  
過共醉小溪邊日日占風勢時時到水堦安知  
貪挂席不肯暫迴船自爾皆無定歸歟亦未然  
指程幾一月泝險歷三年魚鳥都難問音塵杳  
莫傳因之走羸僕試與訪南遷比及過牛峽還  
聞迎壁田報言雖不獲吉語喜多全我解歸堯  
闕君移近漢淵問途曾未遠命駕亦何緣衰野  
今行矣隆中有待焉鄉亭瓜接畛風化蟻同羶  
卽欲朋簪盍翻爲俗事牽愛嬰嬌啞嗜寢復  
便便難忝煩爲具輪轅豈得前寄聲勤以謝幸  
子恕而憐來貺誠爲望論情恐未捐嘗親馬南  
郡果謁謝臨川遂得窺顏色重忻論簡編聊咨  
別後著大出篋中篇問傳輕何學言詩詆鄭箋

飄流信窮厄探討愈精專道舊終忘倦評文欲  
廢眠寧知主人貴但見左魚懸所至同風月相  
歡憶澗渾清歌嗟在耳素髮怪侵顛翠堦時登  
眺芳洲屢泝公難醒撥醅醱殊狀落頭鮮坐竹  
聽啼鳥臨流聒嘒蟬孤亭起歸夢南陌去揚鞭  
出餞陪雙旆方漸歷廣鄗始生山吏敬頗釋利  
途邈會面辭何吐離膺事已填空餘郡樓望野  
色際平煙

漸嘉樓望雨陪謝守

冒雨上城頭淒淒欲報秋雲低密藏樹風急暗  
侵樓漸積荷珠重新添沼鑑幽馮欄未能去公  
自念民疇

和謝舍人洊震

盛夏萬物當長養驕陽不雨誰爲憂天無纖雲  
野頰色草木焦卷如經秋南陽太守自引咎不  
以天時爲怨尤齋精潔慮祠望內僚屬奔從無  
停輶謾取詩言占離畢徒依風俗驗鳴鳩忽聞  
郡北直百里岑岑岷岷藏靈湫持牲遣史詣其

下俎豆未徹升陰虬電光劃劃遶巖壁雷聲隱  
隱生山陬擁雲馳雨自東上西風斗猛雲還收  
神龍蓄志未發泄明日更與頑陽讎醜霽陰黑  
若卷海聯綿霹靂能破仇沃然原隰洗妖氣浩  
爾溝瀆揚平流九穀有登百姓喜蛟蜃歆祀神  
何羞

和謝舍人新秋

西風一夕狂古屋吹可恐微變蜻蛉吟斗摧蚊  
蚋勇朝驚露墜梧遠愛雲飛隴還憶舊溪遊水  
清漁箔壅

中秋新霽壕水初滿自城東偶泛舟廻

謝公命賦時余將赴襄城

齋舫談經後官池載酒行斜陽鳥外落新月樹  
端生演漾思江蒲夷猶繞郡城東轍有遺恨日  
日物華清

陪謝紫微晚泛

積雨漲秋壕輕舟此共遨菰蒲斂鉞鏐蓮芡熟  
橈韜岸靜魚跳月林喧鳥避篙歸時興不淺風

物正蕭騷

奉陪覽秀亭拋堵

聊爲飛礫戲愈切愈紛如自是取勢闊非關用  
意踈悞驚花鳥起亂破錦苔初童指拾將禿多  
慙買勇餘

傷馬

此馬季父爲樞直  
日恩賜以遺余

吾貧只一馬昨日忽云喪庭樹鬻無膚秋郊誰  
復放空傷駿骨埋固乏弊帷葬况本出天閑因  
之重悵悵

一日曲

此而下離  
南陽作

妾家鄧侯國肯愧邯鄲姝世本富繒綺嬌愛比  
明珠十五學組紉未嘗開戶樞十六失所適姓  
名傾里閭十七善歌舞使君邀宴娛自絃著樂  
府不得同羅敷涼温忽在并屢接朝大夫相歡  
不及情何異逢路衢昨日一見郎目色曾不渝  
結愛從此篤暫隔猶恐踈如何遂從宦去涉千  
里途郎跨青驄馬妾乘白雪駒送郎郎未速別  
妾妾仍孤不如水中鱗雙雙依綠蒲不如雲間

鵲兩兩下平湖魚鳥尚有託妾今誰與俱去去  
約春華終朝怨日賒一心思杏子便擬見梅花  
梅花幾時吐頻搗欄竿數東風若見郎重為歌  
金縷

汝州後詩

依韻和謝副閣寄新酒

聞道芳洲景氣新却輸鷗鷺日相親小槽酒熟  
玻璃色誰憶高臺共賦人

送劉子思殿丞宰巫山

千里向巴東青山不可窮峽猿初入聽蠻語未  
全通暮雪思梁國朝雲識楚官吏人迎拜處嘶  
馬入丹楓

朔風寄永叔

朔風嗥枯枝遠鴈不能起日色寒無光原野濶  
千里所思在南國遐路闊音旨潛鱗亦安託冰  
結長河水我我既未泮獵獵終不已悠然傷我  
心歷亂非可擬

襄城對雪 二首

風急夜窻鳴暗知庭下積曉慢忻以捲虛堂睡  
成癖飄飄初繁林凌亂欲侵席擁屏人莫掃何  
似袁家宅

登城望密雪浩浩川野昏誰思五原下甲色千  
里屯凍禽立枯枝饑獸齧陳根念彼無衣褐愧  
此貂裘溫

雪夜留梁推官飲

晝雪落旋消夜雪寒易積燈清古屋深爐凍殘  
煙碧為沽一斗酒暫對千里客酒薄意不淺輕  
今須重昔重昔是年華飄飄猶過隙一醉冒風  
歸平明馬無跡

南陽謝紫微挽詞三首

忽驚南郊信半夜雪中來遂哭寢門外始嗟梁  
木摧文章千古盛風韻故人哀憶昨臨湍水寧  
知隔夜臺

平昔聞嚴助承明狀直廬請章來未久捐館遽  
何如無復淮南諭曾成太史書蒼蒼不可問揮  
涕望輜車

自古豈無死賢哉獨可悲家貧留旅櫬門慶有  
諸兒里社當存祀邦人定立碑還同羊叔子罷  
市見遺思

永叔自南陽至余郊迓焉首訪謝公奄  
然相與流涕作是詩以寫懷

郭門臨汝水鏡色入高衢鞍馬過其上塵襟蕩  
已無及郊逢故友出涕各霑禱神物喪頭角空  
存尾與軀溝木失匠斲誰施藍與朱並轡不能  
語斯文其已夫歸來授予館自爲炊彫胡且勿  
厭茲會日月易以徂

贈琴僧知白

上人南方來手抱伏羲器頽然造我門不顧門  
下吏上堂弄金徽深得太古意清風蕭蕭生脩  
竹搖晚翠聲妙非可傳彈罷不復記明日告以  
行徒興江海思

教授宋著作還

何以擬君子雲鴻肅羽儀將過上林苑先集孝  
王池嘒藻有餘樂漸磐方得時野塘歸莫晚白

水遠連陂

宛陵先生集卷第六

宛陵先生集目錄卷第七

汝州後詩

夏日晚霽

宋叔寄澄心堂紙

聞尹師魯赴涇懷

夏日陪彭學士登城

王殿丞求釣竿

詠蜘蛛

宋著作寄鳳茶

觀水

大水後城中作

和李君讀余著孫子

新霽登周王城

答李晉卿結交篇

秋日屬疾

田家

苦雨

聞宋叔復館寄賀

九月一日

弔李膺辭

送李都監赴武當

重送

田家語

檢覆葉縣晉山田

卧羊山

汝墳貧女

昆陽城

老牛陂

雙鳧觀

葉公廟

悲已卯歲謝紫微

觀投兔

燈花

魯山山行

游元紫芝琴堂

至香山寺報秀叔

寒草

送崔秀才

思遠寄師厚

送師厚歸南陽

疲馬

和宋叔冬夕聯句

古塚

仲春同師直雪中

和師直雪中馬上

和師直早春

和師直晚步

暮春過洪氏小園

雷秘校入闕擬官

登許昌城

孫主簿惠墨跡

寄宋興夏太尉

桓妬妻

目錄終

宛陵先生集卷第七

宋宛陵梅堯臣聖俞著

夏日晚霽與崔子登周襄故城

雨脚收不盡斜陽半古城獨攜幽客步閑閱老  
農耕寶氣無人發陰蟲入夜鳴余非避喧者坐  
愛遠風清

末叔寄澄心堂紙二幅

昨朝人自東郡來古紙兩軸緘藤開滑如春水  
密如蠶把玩驚喜心徘徊蜀牋脆蠹不禁久刻  
楮薄慢還可哈書言寄去當寶惜慎勿亂與人  
翦裁江南李氏有國日百金不許市一枚澄心  
堂中唯此物靜几鋪寫無塵埃當時國破何所  
有帑藏空竭生莓苔但存圖書及此紙輦大都  
府非珍瓊于今已踰六十載弃置大屋墻角堆  
幅狹不堪作詔命聊備麤使供鸞臺鸞臺天官  
或好事持歸秘惜何嫌猜君今轉遺重增愧無  
君筆札無君才心煩收拾乏匱積日畏捨裂防  
嬰孩不忍揮毫徒有思依依還起子山哀

聞尹師魯赴涇州幘

胡騎犯邊來漢兵皆死戰昨聞衛將軍賢俊多  
所薦知君慮不淺末對未央殿天子喜有言輶  
車因召見籌畫當冕旒袍魚賜銀茜曰臣豈身  
謀而邀陛下睞青衫出二嶠白馬如飛電關山  
冒風露兒女泣霜霰軍容壯士多劔藝匹夫術  
賈誼非俗儒慎無輕寡變

夏日陪提刑彭學士登周襄王故城

聊隨漢使者一上周王城片雨北郊晦殘陽西  
嶺明野禽呼自別香草問無名誰復忝離詠但  
興箕穎情

王殿丞赴莫州日就余求釣竿數莖以

往今因其使回戲贈

去日覓釣竿定能垂釣否若不暇釣魚釣竿當  
去取

詠蜘蛛

日結一尺網知吐幾尺絲百蟲為爾食九腹常  
苦饑

宋著作寄鳳茶

春雷未出地南土物尚凍呼譟助發生萌穎強  
抽共團爲蒼玉璧隱起雙飛鳳獨應近臣頒豈  
得常寮共顧茲實賤貧何以叨贈貢石礪破微  
綠山泉貯寒洞味餘喉舌甘色薄牛馬漣陸氏  
經不經周公夢不夢雲脚俗所珍烏菡誇仍衆  
常常濫盃甌草草盈罌甕寧知有奇品圭用百  
金中祕惜誰可邀虛齋對禽幣

觀水 并序

庚辰秋七月汝水暴至溢岸親率縣徒以土塞  
郭門居者知其勢危皆結菴于木末徬徨愁嘆  
故作是詩

秋水漫長堤郊原上下迷孤城閉板築高樹見  
巢棲耳狀蛙聲極漚生雨點齊渚間牛不辨誰  
爲掃陰霓

大水後城中壞廬舍千餘作詩自咎

不如無道國而水肩城郭豈敢問天災但歎爲  
政惡湍迴萬瓦裂槎向千林開獨此懷自憂思

歸卧雲壑

依韻和李君讀余注孫子

我世本儒術所談聖人篇聖篇關乎道信謂天  
地根衆賢發蘊奧授業稱專門傳箋與注解璨  
璨今猶存始欲沿其學陳跡不可言唯餘兵家  
說自昔罕所論因暇聊發篋故讀尚可温將爲  
文者備豈必握武貴終資仁義師焉愧道德藩  
揮毫試析理已馱前輩繁信有一日長可壓千  
載冤未涉勿言淺尋流方見源廟謀盛慶高正  
議滅烏孫吾徒誠合進尚念有親尊

新霽登周王城

行行古城頭歷覽古城下水鳥傍人煙河流隔  
桑柘秋山豁晴翠野老親時稼民訟今已稀閑  
登馱官舍

依韻答李晉卿結交篇

上交執正道下交守奇節當爲蘭死香勿作竹  
枯裂試看温玉堅何似春冰折貴賤事乃見古  
今情不別平生相與親晏歲誰可决君能持此



意足以表風烈

秋日屬疾

體羸易生疾况乃凌秋陰微寒薄膚腠飲藥增  
衣衾一日失所治百骸將不任當從華氏學聊  
欲為戲禽

田家

高樹蔭柴扉青苔照落暉荷鋤山月上尋徑野  
煙微老叟扶童望羸牛帶犢歸燈前飯何有白  
薤露中肥

苦雨

秋空幾旬雨四海低鵬翮晝不見日精夜不見  
月魄灑盡天漢流蒸爛女媧石塗潦將埋輪牛  
馬困負軛羣蟲無土蟄百果就枝坵安能誅陰  
虬坐使天地闕

聞宋叔復館因以寄賀

東方有鑑禽已喜羽翰插重來金馬門莫忘黃  
牛峽黃牛無冬春遠水生鱗甲今非昔日憂賀  
酒特新壓

九月一日

去歲南陽與謝  
公別今謝已沒

授衣念徂節闔棺傷故人故人昔送我把酒滯  
水濱只道後期易豈知無會因死生意不及欲  
語鼻先辛既乏羨門術安得如松筠寒暑更數  
十應亦同埃塵

弔李膺辭

陰蜺橫天長劔欲扶匣穎未露兮精鋼已折層  
冰塞川猛炬方烈凝氣未銷兮高焰已滅雖忠  
毅之有志兮當衰運之閉結嗟身禍之不免兮  
甘就死於縲綬何賢者之景慕兮或自表而謝  
絕惟荀公之獲御兮見顏閭之氣悅奚服媚之  
若茲兮蓋操乘乎峻節風裁獨高而罕接兮號  
龍門而無凡轍允簡尤不容於時兮玉雖碎而  
猶潔痛漢網之頽圯兮又何毀乎賢哲歷千古  
而可悲兮故余不得而面結叨此邦而長民兮  
過舊隴而增咽嗟異代之有遇兮若登履平閭  
闈對風樹之蕭蕭兮想冤氣之未竭聊感繫於  
斯兮寫憂心之悒悒

送李康伯赴武當都監

城下漢江流滄波照鬢秋山川包楚塞風物似  
荊州試聽清砧發何如畫角愁遙知絕戎事水  
味有槎頭

重送

得朋如得寶何恨相知晚舊友貴來踈嗟君行  
復遠秋城隔寒水驛路入蒼巘古情深不深所  
祝加餐飯

田家語

庚辰詔書凡民三丁籍一立校與長號予箭手  
用備不虞主司欲以多媚上急責郡吏郡吏畏  
不敢辨遂以屬縣令互搜民口雖老幼不得免  
上下愁怨天雨淫淫豈助 聖上撫育之意耶  
因錄田家之言次為文以俟採詩者云

誰道田家樂春稅秋未足里胥扣我門日夕苦  
煎促盛夏流潦多白水高於屋水既害我菽蝗  
又食我粟前月詔書來生齒復板錄三丁籍一  
壯惡使操弓鞫州符今又嚴老吏持鞭扑搜索

稚與艾唯存跋無目田間敢怨嗟父子各悲哭  
南畝焉可事買箭賣牛犢愁氣變久雨鐺缶空  
無粥盲跛不能耕死亡在遲速我聞誠所慙徒  
爾叨君祿却詠歸去來刈薪向深谷

檢覆葉縣魯山田李晉卿餞於首山寺

留別

我本山水鄉看山常不足自從到官來塵事便  
拘束嘗聞此山寺法宇深雲木無由一來過夢  
想向巖谷按田趨隣疆跨馬涉平陸良友送我  
行偶與賞心屬禪庭鳴白雞祖席歌黃鵠野氣  
逼人寒嵐光添酒綠言離非遠離但愛交情篤  
重游應有期君亦行車促

卧羊山

亂石若羣羊綠崗卧斜日曾非左慈化更想初  
平叱無羶穴蟻去有乳寒泉出誰憶瀟陵原累  
累家傍質

汝墳貧女時再點予手老幼俱集大雨甚寒道死者百餘人自壞河

至昆陽老牛  
破僵尸相繼

汝墳貧家女行哭音悽愴自言有老父孤獨無  
丁壯郡吏來何暴縣官不敢抗督遣勿稽留龍  
鍾去攜杖勤勤囑四隣辛願相依傍適聞閭里  
歸問訊疑猶強果然寒雨中僵死壤河上弱質  
無以託橫尸無以葬生女不如男雖存何所當  
拊膺呼蒼天生死將柰向

昆陽城

試看昆陽下白骨猶啣鏃莫願隄水頭更添新

鬼哭

老牛陂

吳牛行欲老漢馬焉得肥筋力不可恃遊子當

念歸

雙鳧觀

山下溪流照城郭幽庭栢子風自落古壇蒼蘚

少人行不見雙鳧見黃雀

葉公廟

貢物還見驚從來人所悼今看古壁畫應合當

時好

已卯歲紫微謝公赴南陽過葉縣陪遊

興慶精舍題名壁間而去庚辰歲余來

按田因訪舊跡盡然千懷故作此謔以

志其悲

昔與南陽太守行車騎休時訪庭栢今來重看

壁間題太守已爲泉下客獨留清血是門人招

悵便令生死隔

觀菟兔

莽莽蒿萊下紛紛狡兔迷枯枝坐守者若箇是

忘歸

燈花

灼灼生寒燼終朝照席明從教占有驗燃滅本

無情

魯山山行

適與野情愜千山高復低好峰隨處改幽徑獨

行迷霜落熊升樹林空鹿飲溪人家在何許雲

外一聲雞

游元紫芝琴堂

訪古歷荒城城孤落日鳴人琴兩不見破月高  
臺傾

至香山寺報秀叔

家近心還速川長馬易疲望山孤寺出渡水夕  
陽遲來向林間宿歸湏月上時只應庭際鵲已  
報汝先知

寒草

寒草纔變枯陳根已含綠始知天地仁誰道風  
霜酷

送崔秀才

晨風無定巢遠寄鷓鴣枝天寒鼓翼健粒食寧  
所窺大澤多羣羽翺翔各有時今子振衣去焉  
能久述羈

少年游太學着盡篋中衣獨劔自為伴無家何  
處歸秋蓬隨野轉寒鵲遶林飛霄漢有知已行  
行寧久微

思遠寄師厚

馬蹄踐霜雪不畏道路寒游子重衣裘慈母懸

心肝懸心幾千里冉冉歲已殘大河今漸涸遠  
日常不乾度鴈朝夕聞尺書寄亦難願同車輪  
復勿比弦上丸

送師厚歸南陽會天大風遂宿高陽山

寺明日同至姜店

往日送子春風前春風酣酣杏正妍今來送歸  
秋風後秋風撼撼沙滿川馬鬣斜傾毛瑟縮馭  
吏喋嗟足後先弊裘吹裂寒入骨枯株磨戛火  
欲燃忽逢古寺出巖腹與君下馬相留連殿堂  
高下就山勢松柏森聳侵雲顛長廊落葉卷若  
掃丈室垂幔翻如褰像塑神毋乳九子抱攜撫  
玩皆可憐却令遠客自生念欲見幼稚心煩煎  
擁爐對坐日昏黑龕燈共借僧榻眠雖然覆衣  
冷如鐵不及在家貧無氈曲肱難寐要天曉兩  
股凍痺仍筋攣根根殘夜木魚響起看昂單傾  
西躔怒號斗息東方白童僕整肅吾將還老僧  
掃壁持筆硯請予強此題歲年出門並轡至山  
店茅屋揭盡餘尺椽又據胡床一談笑君不解

飲聊開筵程次都無五百里篋中可乏一囊錢

拂衣頻起畏日晷應恐慈母心懸懸顧我便當

江海去却思此地何由緣

疲馬

疲馬不畏鞭暮途知幾千當須量馬力始得君

馬全

依韻和末叔子履冬夕小齋聯句見寄

遙知夜相過對語冷無火險辭聞尖竒凍地抽

筭箠成欲寄誰談極唯思我學術窮後先文

字少許可敢將蠹測海有似脂出輒必餓嘗見

憂此病各又果弊駕當還都重門不須鏢到時

春怡怡萬柳枝娜娜定應人折贈只恐絮已墮

行橐且不貧明珠藏百顆末叔嘗見嘲謂自古

屈原行吟於澤畔蘇武嚼雪於海上杜甫凍餓

於未陽李白窮滯於宣城孟郊盧仝栖栖道路

以子之才必類數子今二君又自

為此態而反有飯顆之謂何耶

古塚南陽道中作此以下汝州

南陽古原上荒塚若魚鱗劍佩不為土衣冠應

化塵枯骸託魑魅細草沒麒麟何必問名氏漢

家多近親

仲春同師直至壠山雪中宿稷亭

與子乘羸馬夜投山家宿風雪滿綈裘燈火深

竹屋烹雞賴主人吠犬憎倦僕明發到巖前春

萋凍雲木

依韻和師直仲春雪中馬上

自倚春風暖輕袍犯雪來過塘迷綠水拂樹雜

芳梅山峻峰難辨樵通徑易開野行方有味緩

轡不須催

和師直早春雪後五壠道中作

來尋谷口春正值陰雲結日暮氷霰繁宿亭孤

飯設侵晨登壠去始見羣峰列草凍未抽心松

枯猶抱節川傍認飛鷺林上墜殘雪何意待芳

菲遲留未堪折

依韻和師直晚步徧覽五壠川

窮覽川原勝經行未厭頻樵深但聞斧谷暖自

留春臨水何妨坐看雲忽滯人誰家煙塢裏竹

樹遠相隣

暮春過洪氏汝曲小園

三月花已休開來美叢薄河回地勢偏雨入灘  
聲惡綠草旋抽心青梅猶帶萼主人歸未歸誰  
省曾遊樂

雷祕校入闕擬官時將登舟過輦下

與君先後發同走向京華美躍青驪去將乘鳥  
榜矚着鞭辭宿雨渡水踏春沙聞道求為縣應  
當學種花

登許昌城望西湖

試望許西偏湖光浸曉煙岸痕添宿雨草色際  
平田夏木陰猶薄朱荷出未圓人閑綠波靜幽  
鷺插頭眠

孫主簿惠上黨寺壁胡霈然書墨迹一

匣

上黨佛祠何可觀開元瑞物圖高閣又有長廊  
古壁上復是名筆題丹牒當時泥用絲作筋意  
欲千載無剥落書竒畫妙了不識訛傳墨土能  
治平聲瘡寺僧不惜人搯取筆畫遂缺如鳥啄後

來好事恐磨滅寶刀裁刻泥如剥取之龕置綠  
板匣便寶箱楮同美璞拂拭還看體勢生盤屈  
蒼虬舞鸞鷲在昔不畏屋壁壞今也常恐兒童  
撲夫君知我心所重南歸贈以致誠慙此時雖  
喜落吾手老大腕硬無由學但當拜覲不敢忘  
莫為報言曾未數

寄永興招討夏太尉代人

寶元元年西夏叛天子命將臨戎行二年孟春  
果來寇高奴城下皆氏羗五原偏師急赴敵晝  
夜不息趨戰場馬煩人怠當勁虜雖持利器安  
得強二師覆敗乃自取豈是廊廟謀不臧朝廷  
又選益經略三幟賢後務所長或取李愬備邊  
策或欲五道出朔方仲夏科民挾弓矢季冬括  
驢賚道糧官軍未進復犯塞塞旗殺將何倡狂  
遂令士卒愈沮氣欲使乘障膽不張我願助畫  
跡且遠側身西望空淒涼庶幾一言可裨益臨  
風欲寄鳥翼翔所宜畜銳保城壁轉饋先在通  
行商守而勿追彼自困境上未免小伎攘譬如

蚊虻嗜膚體實於肌血無大傷此言雖小可喻  
遠幸公采用不我忘誠知公慮若裴度聖上聽  
用同憲皇當時豈不歷歲月猶且衆鎮未陸梁  
況今鷹犬乏雄勇便擬馳騁徒蒼惶且緩湏時  
勵犀卒終期拉朽功莫當

桓妬妻

昔聞桓司馬娶妾貌甚都其妻南郡主悍妬誰  
與俱持刀擁羣婢逕往將必屠妾時在窻前解  
鬟臨鏡梳鬢髮雲垂地瑩姿冰照壺妾初見主  
來縮髻下庭隅斂手語出處國破家已殂無心  
來至此豈願奉君娛今日苟見殺雖死生不殊  
主乃擲刃前抱持一長吁曰我見猶憐何況是  
老奴盛怒反爲喜哀矜非始圖嫉忌尚服美傷  
哉今亦無

宛陵先生集卷第七

宛陵先生集目錄卷第八

汝州後詩

夏日晚登許昌湖 許昌晚晴

故原戰 故原戰卒死復蘇

西湖開望 寄謝師直

感二鳥 古相思

舟次寄故人 送曇穎往廬山

弔石曼卿 醉中留別末叔子履

汴水斗減寄彥國 陪遊女郎臺寺

望僊亭 陪遊莊生臺

淮上雜詩六首 赴曹任君有詩

宋諫議遺白鷺 金山寺

瓜洲對雪 金山二僧攜茗至

淮南遇梵才上人 送櫟陽朱宰

和長吉上人相遇 歲日旅泊

寄題梵才安隱堂 農難

舟中值雨 題刁經臣山居

和謝裴君見過 甘露寺

和刁經臣有感 春日舟中對雪

和達觀禪師見寄 和刁太博新聖十題

發陶莊 發丹陽後寄徐元興

湖州後詩

胡武平遺牡丹 題滕學士書堂

送劉成伯還都 送舍弟赴都

訪報本簡長老 答祝秘校見寄

宛陵先生集卷第八

宋宛陵梅堯臣聖俞著

夏日晚晴登許昌西湖

新晴萬柳齊鶯度水東西城上明殘照雲間挂  
斷霓煙蒲勻若翦沙岸淨無泥菓壓繁枝重人  
乘小駟低嵐光開翡翠湖色浸玻璃只欠朱藤  
密如過罨畫谿

許昌晚晴陪從過西湖因詠謝希深蹟

風詩愴然有懷

踈雲漏斜照殘雨葉間明飛蓋城頭去澄湖水  
正平荷盛鮫客淚蔓濯野人纓公獨思康樂臨  
流誦句清

故原戰

落日探兵至黃塵鈔騎多邀勳輕赴敵轉戰背  
長河大將中流矢殘兵空負戈散亡歸不得掩  
抑泣山阿

故原有戰卒死而復蘇來說當時事

縱橫尸暴積萬殞少全生飲雨活胡地脫身歸

目錄終



漢城野糴穿廢竈妖鵬嘯空營侵骨劔瘡在無  
人爲不驚

西湖閑望

夏景已多趣湖邊日更佳園葵雜紅紫岸柳自  
歌斜雨氣收林表城陰接水涯愛閑輸白鳥盡  
日立汀沙

寄謝師直

憶同仲春月冒雨過穰亭酌山酒別獨吟夜  
燈青明朝上嶺路羣岫張雲屏忽入川谷秀固  
非平生經綠竹間紅萼紫藤垂千扇春塘水決  
決野老髮星星田父相與至里言尚可聽始聞  
丹砂岑遂識五壠形傍瞻禹湯迹競信廟貌靈  
邀我陟巉巖宿霧方冥冥暗霑衣裘濕時襲草  
木馨棟宇敞絕頂牲酒列幽亭竹杯占禍福巫  
錦醉一嚙日晏別雲外月出至近垌僕夫疲不  
進鞭策無暫停我馬忽顛墜君心同鵠鷁再駕  
體無傷扣關燭已燧自茲期莫逆未契心所銘  
惻惻捺行袂汎汎如水萍今來各一方安得同

醉醒

感二鳥

雄雌雙好鳥託棲空樹中有蛇出傍穴噴毒氣  
如虹半夜此驚飛瞥日隨西東有喙不能達啼  
雲復嘯風迴翔隔歲月老木高童童眼生衆禽  
噪雖近未由通昨朝煙雨晦並翼向幽叢鷹鷂  
尚橫集颺颺意無窮

古相思

劈竹兩分張情知無合理織作雙紋簾依然淚  
花紫淚花雖復合疑岫幾千里欲識舜娥悲無  
窮似湘水

舟次朱家曲寄許下故人

藹藹桑柘岸喧喧雞犬村晚雲連雨黑秋水帶  
沙渾稍聽隣船語初分異土言雖嗟遠朋友日  
喜近田園

送曇穎上人往廬山

潯陽幾千里無不見爐峰蒼翠入衆目巖壑少  
行蹤高僧忽獨往杳杳懷遠公嘗聞虎溪上醉

令或來同而今競邀致幾里聞松風塵心古難  
洗瀑布垂秋虹

弔石曼卿

前時京師來對馬嘗相揖埃塵正滿衝笑語曾  
未及雖然恨莫親往往聞風什星斗交番光昭  
昭不可挹獨哦秋露中豈顧衣裘濕酒盃輕字  
宙天馬難羈繫今朝我還都但見交朋泣借問  
泣者誰曼卿冤已罄堂堂豪傑委遂爾一棺哉  
君生寒月明君沒寒月入月入還復升精鬼寧  
未集孤墳細草遍翠碣嗟新立

醉中留別朱叔子履

新霜未落汗水淺輕舸惟恐東下遲遶城假得  
老病馬一步一跛令人疲到君官舍欲取別君  
惜我去頻增嗜便步髻奴呼子履又令開席羅  
酒卮逡巡陳子果亦至共坐小室聊伸眉烹雞  
庖兔下筋美盤實釘餽粟與梨蕭蕭細雨作寒  
色狀狀盡醉安可辭門前有客莫許報我方劇  
飲冠幘敬文章或論到淵奧輕重曾不遺毫釐

間以辨誰每絕倒豈顧明日無晨炊六街禁夜  
猶未去童僕竊訝吾儕癡談兵究弊又何益萬  
口不謂儒者知酒酣耳熱試發泄二子尚乃驚  
我為露才揚已古來惡巷舌噤口南方馳江湖  
秋老鰈鱸熟歸奉甘旨誠其宜但願音塵寄烏  
翼慎勿却効兒女悲

汴水斗減舟不能進因寄彥國舍人

朝落幾寸水暮長幾寸沙深灘鼇背出淺浪龍  
鱗斜秋風忽又惡越舫嗟初閣坐想掖垣人猶  
如在寥廓

陪淮南轉運魏兵部遊潁州女郎臺寺

舊傳嬌氏女將適楚人時築館自臨水故臺空  
此基因為楚宮勝來與使車期樓上望湖上煙  
林晚蔽虧

望僊亭并序

壽春望僊亭廣平宋公所作也宛陵梅堯臣之  
官吳興道出其下公命賦之  
公來有餘樂所樂為郡間訟稀聊自適靜勝以

糾顏清軒開曉幔歷歷見淮山山色洗新雨佳  
氣如可攀代異雞犬去時平草木閑試望天衢  
近飛駕應此還

陪淮南轉運魏兵部遊濠上莊生臺

周當戰國時何爲守靜正干戈旣日尋仁義固  
不競天下皆跼徒寧知聖爲聖是將萬物齊不  
顧千金聘所以忘形骸所以保性命安能小仲  
尼豈不識世病我從魏公來訪古停鳥榜聊識  
賢者心吁嗟一長詠

淮上雜詩六首

宿雲未全歛微雨入船踈問伴失前後暝行隨  
疾徐相親沙上鴈自樂水中魚亭午日光透透  
分林際居

暗開淮水平遠見孤城出出舟間舟子遽對那  
能悉始聞莊生臺還想觀魚日果得真隱心魚  
鳥情非密

輕舟晚投處聒聒渚禽嘶橡子隨薪束蔬科帶  
土攜岸幽雲滿石潮落蚌生泥客思無慘極唯

將魯酒迷

野鴈不知數翳然川上鳴曾無設羅意空自見  
船驚渺渺拍波去紛紛孤嶼盈苦寒非塞外霜  
落夜淮清

漠漠晝煙披縱橫見漁艇輕橈上急水或與飛  
鴻並魚大釣絲微牽隨碧潭迥向晚得志歸浩  
訝山月靜

舟閣下灘遲蒼黃暮灘上偏愁逆水風更駕崩  
沙浪落日看已昏漁燈遠相向夜闌天轉寒坐  
待潮流漲

赴雪任君有詩相送仍懷舊賞因次其  
韻

湖山饒遠處曾省牧之遊鴈落葑田闊船過菱  
渚秋野煙昏古寺波影動危樓到日尋題墨猶  
應舊壁留

過揚州參政宋諫議遺白鷺

曾遊鳳池上曾食鳳池萍乞與江湖去將期養  
素翎不同王逸少辛苦寫黃庭

金山寺 并序

昔嘗聞謝紫微言金山之勝峰壑攢水上秀拔殊衆山環以臺殿高下隨勢向使善工摸畫不能盡其美初恨未遊赴官吳興船次瓜洲值海汐冷落孤港未通獨行江際始見故所聞金山者與謝公之說無異也因借小舟以往乃陟廻閣上上方歷絕頂以問山阿危亭曲軒窮極山水之趣一草一木雖未蓂發而或青或凋皆森植可愛東小峰謂之鶴山有海鶴雄雌棲其上每歲生雛羽翮旣成與之縱飛迷而後返有年矣惡禽猛鷲不敢來茲以搏魚鳥其亦不取近山之物以爲食可義也夫薄暮返舟寺僧乞詩強爲之句以應其請偶然而來不得髮鬢敢與前賢名迹耶

吳客獨來後楚橈歸夕曛山形無地接寺界與波分巢鶻寧窺物馴鷗自作羣老僧忘歲月石上看江雲

瓜洲對雪欲再遊金山寺家人以風波

相止

臘月海風急雪吹巖下窻輕舟不畏浪昨日過寒江渡口復夕興區中無與雙忽牽兒女戀空聽遠鐘撞

金山芷芝二僧攜茗見訪

一遊江山上日日吟不足雙錫忽來過衣霜帶初旭况能持茗具向此烹新綠中瀟水若飴北焙花如粟遠將塵慮滌自愧冠纓束何以報勤勤馳奴扣雲谷

淮南遇梵才吉上人因悼謝南陽疇昔之遊

久已厭宦旅故茲歸江南始時遽辭邑不及事春蠶殘臘猶在道險阻固所諳扁舟次淮海喜遇釋子談契濶十五年尚謂卧巖庵偶見如夙期淹留良亦甘歎遊獨泐然懷悲情豈堪班班雲中鳥共看投夕嵐是不念舊隱山水唯素耽我從湖上去微爵輕子男

送櫟陽宰朱表臣

塞上備胡羗關中調兵食秦民尚苦輸漢吏勤  
求職君今喜懷詔馳騎寧暇息其邑嘗雨金於  
時豈能得行當經灞上故事猶可憶前代多戰  
爭鬼火弄陰黑蒼蒼路傍草憔悴希春色縣涂  
誠有政威惠爲令德

次韻和長吉上人淮甸相遇

淮上一相遇憶在京都時雖驚歲月換未改松  
桂姿童侍兩三人銜錫相與隨自言東越來篋  
中多好詩文字皆妥貼業術無傾敬前輩嘗有  
言清氣散人脾語妙見情性說之聊解頤始推  
杼山學得非素所師此固有深趣吾心久已知  
橫琴乃玄悟豈必弄鳴絲古樂衆少聽誰知彼  
吹篳師曠沒世後伯牙衆身悲願同黃鶴舉遠  
歸滄海涯老驥雖不病長坂安可馳天台况奇  
勝日夕勞夢思尚忝齒纓綬終年趨路岐俯愧  
淵中魚游泳水之湄仰羨雲間鷲凌厲辭繁維  
居嘗起斯念未去情不怡今朝更道舊感愴各  
頰眉同遊謝公門遠想袂霑洩惜哉胡不仁碎

彼東方琪又出數紙書手澤尚可披眷眷疇昔  
意於今當語誰復遺三百言玩味自挽髭序事  
盡成故慨吟良有資其詞何疊疊宛若對風規  
冷然聳心目不覺整冠綫重以超俗韻顧予賤  
職司是猶猿鳥情並此驚歷卑報投仍勉強實  
謬匠者爲應晒不量力短兵茲已疲

歲日旅泊家人相與爲壽

舟中逢獻歲風雨送餘寒推年增漸老求懷殊  
鮮歡江邊無車馬鑑裏對衣冠孺人相慶拜共  
坐列盃盤盤中多橘柚未咀齒已酸飲酒復先  
醉頗覺量不寬岸梅欲破萼野水微生瀾來者  
卽爲新過者故爲殘何言昨日趣乃作去年觀  
時節未變易人世良可歎

寄題梵才大士台州安隱堂

巢禽託靜林潛魚戀深壑豈不能自安翔泳得  
所樂達士遠紛華於茲守冲漠堂前鳴松風堂  
後馥花萼好鳥時一呼澄明望寥廓詩興猶不  
忘禪心詎云著所以得自然寧必萬緣縛未能

與之游懷慕徒有作

農難

稂莠非所殖嘉禾共一田老農實惡之豈共時  
稼捐管蔡與盜跖同氣詎能遷周公不妨聖柳  
惠不妨賢賢哉彼薶矣取舍得其然

舟中值雨裴刁二君相與見過

江上滄淒淒天形接野低岸痕生舊水馬跡踏  
春泥風急侵衣重山昏卷幔迷誰驚二客論不  
愧巨源妻

題刁經臣山居時已應辟西幙

向不樂郡府遂云歸田園結廬復種莚草樹日  
已繁散帙理舊學了然無俗喧春雨一迴過覽  
耕登古原青山每自愛鬢色當衡門故人苟來  
往名宦未嘗言趣適已不淺道心良亦存忽聞  
辟書至便令驅犢轅豈期同瓠瓜長繫蒿萊根  
始知古君子出處惟義敦

前者裴君雨中見過因以詩謝復承來

章輒依韻奉和

主人門下客寂寞在江浹我昨謝銅章解組猶

脫屣前日至朱方正值春雨起君時冒雨來曾  
不避泥滓林枝滴衣襟沙岸平履齒相歡了無  
間偶論通遠旨去逢交親問爲報心如水

甘露寺

曾非遠城郭寂爾隔囂氛尚有南朝樹能留北  
固雲川濤觀海若霜磬入江濱衛國丹青在孤  
堂綠桂薰

依韻和刁經臣讀李衛公平泉山居詩

碑有感

當時植珍木豈是昧前規廢宅長春草故山存  
舊碑已嗟良璧毀安識古松姿叔子每懷慕此  
心空自知

春日舟中對雪寄刁經臣

誰道江南暖新春見雪飛鷗來親客艇花亂上  
人衣古郡地偏寂野窻寒入微戴家人不遠欲  
去未能歸

依韻和達觀禪師春日雪中見寄

密霰來新歲春陽氣漸微侵庭草芽凍紛雜鴈  
行飛江寺誰開逕湖山我欲歸雨花無六出休  
怪着人衣

和刁太博新墅十題

靜舍

野木扶疎重復重塘蒲涵水綠茸茸琴書尤古  
得爲樂休閒前山有戴顓

西齋

靜節歸來自結廬稚川閑去亦多書請君架上  
添芸草莫遣中間有蠹魚

北軒

冬日迎暄此未宜苦吟那對朔風時祗誇砌下  
留殘雪不看簷間斗柄垂

叢杉

植榦森然美在庭更憐相倚自青青翠姿且有  
千雲勢豈是孤生向遠坰

松阜

勾引風聲已可聽高陰仍更接岡形知君久欲

平心氣早晚根傍長茯苓

小舫

小舫閑撐莫厭遲比於剗艇劣相宜漕河有處  
通陂水深入荷花人不知

移竹

遠愛檀欒碧逕開荷鋤乘雨破秋苔直須探作  
阮家趣更向煙林缺處栽

花塢

雜芳春發淺深叢曲塢逶迤紫間紅色賤格微  
應不數少添蘭菊待秋風

綿櫓

翠色凌寒豈易衰柔條堪結更葳蕤松身栢葉  
能相似勁拔緣何不自持

新井

淺淺清泉自鑑開鱗鱗寒甃未生苔山中亭午  
野禽渴不畏人驚欲下來

發陶莊却寄刁經臣裴如晦

方看梅柳春共別川河上移舟人已歸迴首竹

林望水渾不照影山遠猶相向聞道欲西遊漢

家今尚壯

發丹陽後寄徐元與

別君忽五年相望非一日會合如夢寐欣喜對  
形質是時春已仲臨水柳未密載酒相與遊輕  
柳劣容膝禪扃竹下過乳井松間出烹茶覺暫  
醒岸憤情彌逸興闌乘月歸及旦解行綵離懷  
更宿醒遠想都如失

湖州後詩

胡武平遺牡丹一盤

疇昔居洛陽看盡名園花臨水復蔭竹艷色照  
彤霞良友相與至競飲歡無涯而今猶老翁鬢  
髮但未華昨日到湖上碧水涵蒲芽此情頗已  
愜薄宦非初嗟况乃蒙見憐帶雨摘春葩雖無  
向時樂惠好仍有加

題滕學士九華山書堂

處山方畏淺曾慕結深廬要與雲峰近寧將野  
客踈澗苗來入俎林鳥或窺書何事輕茲樂而

從出塞車公今為涇洲

送劉成伯還都

余昔困川途今非美行者離心寄南風相送過  
平野既吹蓮葉舟更逐桂條馬中州多故人懷  
抱幸君寫

送舍弟正臣赴都

吳兒能刺舟其駛劇飛鳥行行固莫留望進前  
山小家貧吾不憂身計爾自了何當還里門拜  
慶期秋杪

訪報本簡長老

比泛蒼溪來初逢下山雨雨收精舍出喜與高  
僧語門臨水若鑑萬象皆可觀清淨欲誰隣野  
蓮無處所

依韻答淮南祝秘校初春見寄

客有袖中書初馮春鷺寄春鷺不時來秋鴻今  
始至水落蒲藻寒悠悠江浦意

宛陵先生集卷第八



宛陵先生集目錄卷第九

湖州後詩

和胡武平懷京下 和武平望太湖

和武平憶玉晨觀 凝碧堂

送劉著作弋陽宰 冬雷

送成伯遺建旌 冬日送進上人

和宋待制九題 和說上人見訪

雪中訪烏程李宰 送劉比部

贈月上人彈琴 陪武平遊西余

和武平茗霅二水 和武平昇下二山

送崔主簿赴青溪 和劉比部留別

送潘供奉承助 答新長老詩編

題劉道士奉真亭 和烏程李著作四首

送簽判張秘丞 送弟和州幕

寄題徐都官假山 送吉上人歸天台

次答公度 留題可及明心堂

陪武平游下峰亭 送張舍人

劉彝秀才歸江南 送胡武平

迴陳郎中詩集 和武平別後見寄

蘄州廣濟劉主簿 和僧夏日閑居

和李宰秋思 送儲令赴樂昌

隱真亭 說上人遊廬山

和元之述夢 答恭上人

和守賢晚秋書事

目錄終

宛陵先生集卷第九

宋宛陵梅堯臣聖俞著

依韻和胡武平懷京下游好

南國易悲愁西風起高樹枯荷復送雨度鴈寧  
 知數欲問北來音繫書復若故冥飛杳無跡弋  
 者徒有慕況在白蘋洲而懷石渠署石渠多故  
 人鷓鴣方蹇蕭蕭鳴尚可希絳翼何由附主人  
 賴知已未變疇昔顧乘桴豈仲尼好勇非季路  
 幸依南郡帳不學邯鄲步自守終日愚都忘向  
 時慮睠戀此江湖親年當喜懼既獲庭闈近又  
 多山水趣邇來對明月千里猶會晤長橋人絕  
 聲舉酒逢秋露迴聞孤舟笛煙水在何處俯檻  
 意無涯跳波魚夜乳頗得真隱情奚須慕巢許  
 思寄梅枝香遠隔蘭溪渡緘之付好風精爽亦  
 隨去

依韻和武平九月十五日夜北樓望太

湖

東吳臨海若看月上青冥河漢微分練星辰淡

布瑩細煙沈遠水重露裏空庭孤坐饒清興惟  
將影對形

依韻武平憶玉晨觀

世路多氛垢人間浪逐名是非還自喻寵辱固  
 堪驚薄宦真何戀丹砂儻可成終尋谷口隱鄭  
 子豈其卿

凝碧堂

始至荷菱生田田湖上密復當花競時艷色凌  
 朝日今來蓮已枯碧水墮秋實更待雪中過羣  
 峰應互出樽有綠蟻醅俎有頽壺橘可以持蟹  
 螯逍遙此居室

送劉成伯著作赴弋陽宰

我昨之官來值君為郡掾當年已知名是日纔  
 識面未久嗟還都如應羣公薦遂除芸省郎出  
 治江上縣縣劇素所聞其俗到可見水精製盤  
 盂去冰瑩產郊甸鳴箏斲桐梓雕飾雜寶絢有  
 藥化銅鈇方士多伏鍊君今齒尚壯好學常不  
 倦二者定非惑吾言亦狂狷絃歌將有餘幸可

窮經傳歸來期著書篋楮盈百卷莫學此踈慵  
無能守貧賤明朝君當行勉勉自出餞豈無一  
壺酒豈無一鼎饌

冬雷

上帝設號令隱其南山下震發固有時曷常事  
憑怒春以動舍生夏以奮風雨冬其息不用藏  
在黃厚土我今來江南歲曆惟建午如何小雪  
前向曉疑鳴釜蛟蛇龜蟲厄鱗裂口塊吐蝦蟇  
不食月深窟僵兩股天公豈物欺若此汨時序  
或言非天公實乃陰怪主嘗觀古祠畫牛首推  
連鼓黑雲雜狂飈相與爲肺腑是不由昊穹安  
能順寒暑吾因考厥事復以驗莽鹵市井欺量  
衡定知不活汝元惡逆大倫弗加霹靂斧此豈  
曰無私故予未所取必恐竊天威似將文法侮  
焉顧五行錯詎畏萬物覩欲扣九門陳恨身無  
鳥羽

劉成伯遺建州小片的乳茶十枚因以  
爲答

玉斧裁雲片形如阿井膠春谿闢新色寒穉見  
重包價劣黃金敵名將紫笋拋桓公不知味空  
問楚人芽

冬日送暹上人

霜風刮地如刀錄烏不遠飛魚已潛何況削髮  
冷入骨草屨不畏氷雪霑綠山涉水去幾里晝  
鉢野飯誰來添毗陵舊寺苦欲到索我贈行無  
父淹

和壽州宋待制九題

熙熙閣

初日照城樓流暉及茵閣上收花霧紅下見春  
煙薄信美是殊邦而淹佐時略自慙江外人敢  
慕淮南作

春暉亭

卉木日已發中圃日已嘉歡言樂和景及此髮  
未華春風實無幾凌亂枝上花山陰况暮月俯  
仰誠可嗟

白蓮堂

蟋蟀在秋堂芙蓉出深水浩露同一色澄澈寒  
鑑裏佳人耻施朱欲與天真比沙鳥閑且都誰  
將擬公子

式宴亭

從事誰獨賢而來均宴喜幽禽雜嘯呼珍木竟  
叢倚興將物色俱閑狀簫鼓美寧同不聞問訟  
息時遊此

秋香亭

高軒盛叢菊可以泛綠罇餘甘自同齋忘憂寧  
用萱有木皆剝實何草不陳根獨此冒霜艷芬  
郁滿中園

狎鷗亭

羣生自知機不可欺以異此雖鷗與馴鷗亦魚  
所避坐熊臨碧水安得同一致然此海客心還  
應無有愧

齊雲亭

城隅結危棟髣髴凌煙霓平觀飛雨來俯窺巢  
禽棲浩蕩孤思發羃歷蔓草齊長安去不遠何

言西北迷

美蔭亭

野材仍翦茅當此茂林下晴暉葉上明翠影盃  
中瀉鮮風時颼颼輕裾自蕭灑固殊嵇生鍛曷  
慕巖栖者

望僊亭

嘗聞淮南王雞犬從此去至今山頭石馬跡尚  
有處使君辭從官終日絕塵慮望望雲漢間想  
見賓天馭

依韻和僧說上人見訪

客從東國來山雲猶在屨是時正窮臘鴈落溪  
陰暮投宿古城隅雪迷松下路衣楮足蘭荃相  
過寧狀屢

立春前一日雪中訪烏程宰李君俞尋  
有詩見貺依韻和答

粉絮先春拂面翔臨風躍馬到君堂縣民將喜  
土膏起令尹未驚農事忙疾呼小吏具山酌便  
欲盡醉爲詩任我牽塵俗不得久何意更煩投

夜光

送劉比部

青山夜來雨溪水已潺湲侵曉桂旗動傷離蘋  
渚前百壺臨祖道兩槳破春煙舊業西河上歸  
心向日邊

贈月上人彈琴

人閑溪上橫剗木素琴寒倚一枝玉吳王城畔  
鏤深房月下空彈孤鴈曲

冬日陪胡武平遊西余精舍

侵晨霜氣嚴溪口水已合烏榜將進遲寒篙旋  
摧拉遙看松竹深雪屋藏山衲登臨興都盡薄  
暮松清雪

依韻和武平蒼雪二水

昔愛伊與洛今逢若與雲南郭復西城曉色明  
於甲塵纓庶可濯白鳥誰來狎落日潭上歸魚  
訝自相答

依韻和武平昇十二山

北峰壓城蒼南岫綠溪綠誰知昔人遊尚想叢

桂馥鳥獸安可羣呼鳴自為族儻聞美門術一  
躡塵外躡

送崔主簿赴睦州清溪

舟輕不畏險逆上子陵灘七里峽天翠千重雲  
木寒古祠鳴野鳥亂石激春湍正與高懷愜寧  
歌行路難

依韻和劉比部留別

春雲已泊簾濃淡半晴天沙草微抽綠林枝遠  
帶煙况茲逢晚景那更送歸船苦酒聊為酌無  
勞辨聖賢

送潘供奉承勛

與君迹孰情已親欲將行邁聊感人舉酒不能  
効時俗半醉苦語資立身長大實好帶刀劔曷  
不往助清邊塵門戟雖高豈自有當思乃祖為  
功臣所宜勇躍發奇策嘉名定體庶得真儻以  
斯言作狂說乘肥食脆任青春

答新長老詩編

江東釋子多能詩窻前樹下如蟬嘶朝風暮月

只自老建安舊體誰攀躋唯師獨慕陶彭澤奇

蹟仍收王會稽曾示余右軍書一軸此焉趣尚已不淺更

在措意摩雲霓

題劉道士奉真亭

降真沈水生爐煙扣齒曉漱華池泉心存崑閩

未可到夜瞻北斗何聯聯顧茲虛室如有遲一

草一石幽且妍芝蓋雲軒杳無至不知誰更似

楊權

依韻和烏程李著作四首

縣署西園

春入西園何苦誇我曾狂醉洛城花如今老大

都無興獨坐晴軒看落霞

雪上二首

共愛雪溪風物美春來清可鑑鬢眉頰生楚客

將歸日花暖吳蠶始浴時臨水竹樓通市陌跨

橋雲屋接川湄畫船載酒期君醉已是無謀助

翦夷

靚粧艷服遊川上簫鼓聲中俗自歡寄語春風

休用惡恐教潭水起波瀾

早春遊南園

東國春歸早南園百卉宜萱芽開翠頰杏萼破

煙姿青壠將鳴雉喬林未囀鸚石尤風莫起芳

物畏君吹

送簽判張秘丞赴秀州

江鷺歸時君亦歸鸞巢未暖君還去去去溪邊

楊柳多正值清明欲飛絮競折贈行何所益時

當長養傷嘉樹不如舉酒對青山酒罷移舟須

薄暮嘉禾主人余久知跡冗不擬強攀附儻或

無忘問姓名為言懶拙皆如故

送弟赴和州幕

夾河為郡不如古江北江南作冗官須記長傳

一經訓雖貧莫改飲瓢歡歷陽况與吾廬近春

穀休言問膳難此日停舟聊舉酌明當水驛自

加餐

寄題徐都官新居假山

太湖萬穴古山骨共結峯嵐勢不孤苔徑三層

平木末河流一道接墻隅已知谷口多花藥祗  
欠林間落欵颺誰侍巾韞此遊樂里中遺老肯  
相呼

送梵才吉上人歸天台

頃余遊肇洛值子入天台當時羣卿士共美出  
氛埃荏苒踰一紀却向人間來問子何爲爾言  
興般若臺雖將發愚闇般若安在哉此教久已  
熾增海非一盃我言亦爝火豈使萬木灰蓋欲  
守中道焉能力捐裁子勿疑我言遂以爲嫌猜  
忽聞攜錫杖思向石橋迴城霞與琪樹璨璨助  
詩才嘉辭徧人口幸足息巖隈

公度以余嘗語洛中花品而此邦之人  
多不敢言花於余今又風雨經時花期  
遂過作詩以見貽故次其韻

去年三月來吳中欲擬看花無與從今年二月  
花偏早發作無節雨與風前時晴明要尋賞謂  
夸洛陽多不容我心豈是限南北美好未必須  
深紅姚黃魏品若盡有春色定應天下空因君

見贈又及此莫怪還思澗水東

留題可及明心堂

秭雉已先嗥卉木萼漸歇俯檻弄條枚因心悟  
生滅上人本高胄季父踐清列而能默紛華樂  
彼方外說

陪武平游雅上人房下峯亭

晚愛池上清羣峰對蒼隙常恐雲氣生坐令蒼  
翠隔復繞曲塘陰映實孤花折誰知禪者居來  
伴使君適

送張舍人自安吉移宰桐安

遠辭湖上山徙治海邊邑機杼吳俗饒魚蝦越  
人給操琴在更張殊土宜順襲何以贈勤勤薄  
言茲所及

劉彝秀才歸江南

鳳鳥不在茲麒麟寧受鞞君思此二物中夜忽  
興歎况值南風來襲蘭歸楚岸

送胡武平

來見江南昏使君詠汀蘋再看蘋葉老汀畔送

歸人人歸多慕戀遺惠在茲民始時繞郊郭水  
不通蹄輪公來作新塘直抵吳松垠新塘建與  
梁濟越脫軫仁言度新塘去隨跡如魚鱗從今  
新塘樹便與蔽芾均我雖備僚屬筆舌敢妄陳  
因行錄所美願與國風振

迴陳郎中詩集

嘗觀陳伯玉感遇三十篇矯矯追古道粲爾日  
星懸今公豈其後佳詠久已傳憶為童子日早  
誦錦繡妍茲來預官屬而許玩奇編明珠三百  
琲一一徑寸圓他人握中有未獲毫髮焉家貧  
敢懷寶况近驪龍淵又畏風雨作神物不得全  
再拜捧明月長跪還席前

依韻和武平別後見寄

溪遠橫危一望遙此焉悽絕府中僚已同鴈鷺  
依清淺共看鸞皇上次寥別岸無端縈細柳迴  
舟不忍過新橋醉來事事能生感誰道愁腸酒  
易銷

蘄州廣濟劉主簿

相識雖非久相親似舊年論文君豈後尚齒我  
慙先慣狎吳兒水將浮楚客船安知不離恨高  
柳正鳴蟬

依韻和僧說夏日閑居見寄

城郭非清涼山僧抱微疾又况三伏時當茲一  
禪室炎颯正燦燦溪水徒瑟瑟唯詠冰雪辭可  
以銷夏日

依韻和李宰秋思

一葉與風舞已知天地情將令百菓實競振羣  
蟲聲陶令欲收秫幽人思普觥更吟君麗句誰  
為寫鍾評

送儲令赴韶州樂昌

嘗聞韶石下虞舜古祠深至樂久已寂况持陶  
令琴炎方不道遠一去值秋霖

隱真亭烏程史尉署

作尉慕吾祖吾祖非得時誰似芙蓉國日見芙  
蓉披涼雨隨風來清香入酒卮自得真隱趣不  
慙吳市為



說上人遊廬山

夙懷高世趣固足林壑情欲遊名山徧遂為廬  
岳行又訪遠公蹟東林氣象清瀑布秋影落香  
爐曉煙生洗蕩萬古慮薰蒸千載名我今滯孤  
宦空羨瓶錫輕

和元之述夢見寄

高秋枕席涼晝寢還清曠不嘲君腹便獨夢予  
爾訪豈忘相規言仍記羣小謗始知端正心寐  
語尚不誑傲况何讒人告子亦孟浪吾聞有尸  
蟲伺惡多相尚耽睡受其惑子心恐成恙勉子  
守庾曹勿使茲物王覓交昧聰明寤後成清唱  
誦玩自省循徒爾增悵悵不能檢細微遂使言  
屢覘雖然甚頑鄙內顧無過當仲尼稱天厭季  
路猶行行何當謝勤誠為子傾嘉釀

秋日卧疾恭上人來過不及見因以詩  
答

溪上秋霧多溪居曉寒入呼吸遂生痾嘔泄不  
下粒素知江南地大率皆卑濕久從吳土居氣

候非所襲伏枕欲經旬冠帶沾已澁女奚特扣  
關問疾提山笠我非金粟身寄謝何暇揖屈性  
茲不能他時冀來及

依韻和守賢上人晚秋書事

秋霧鬱不開矇矓夾溪樹深枝尚宿禽寒葉時  
驚露我居溪之陰早景誠所慕開豁吐初陽獨  
吟神與晤豈意方袍人而懷此焉趣忽枉瓊玖  
章無慙惠休句

宛陵先生集卷第九

宛陵先生集目錄卷第十

湖州後詩

剡縣臧主簿

余令之會稽新昌

傅神悅躬上人

文曜師之南徐

芝上人歸姑蘇

唐寺丞知南雄

和孫朱二公見寄

謝尉西歸

陳浩赴福州幕

示沈生

和潘叔治遊何山

張法曹歸闕

送張叔展北歸

和叔治晚見梅花

僧院枕流軒

惱儂

相逢

檣烏

過華亭

月暈

逢謝師直

廻自青龍呈師直

青龍海上觀潮

社前

水次鬻饅

葉大卿挽詞

寒食陪南園

牡丹

惜春三首

花娘歌

程山人歸飲

重過南園

送滕監簿歸寧

寄題千步院

早夏陪登疊嶂樓

得孫仲方畫美人

涂次寄羅道濟

和潘叔治六鶴圖

啄食

顧步

啖天

舞風

警露

理毛

留題潘氏假山

觀居寧畫蠶蟲

和穎上人南徐十詠

邵伯堰下

悼亡三首

淚

秋日舟中有感

書哀

目錄終

宛陵先生集卷第十

宋宛陵梅堯臣聖俞著

臧子文刻縣主簿

剡水無淺深歷歷能見底潛鱗莫見窺塵絃聊  
堪洗古木潭上陰遺祠巖下啓應識道傍碑因  
風奠醪醴

余令之會稽新昌

越舸將渡西陵時臘雪欲作陰雲垂古岸潮迴  
夜冰閣冰上鯉魚紅尾著知君奉親聊自得窮  
冬涉險仍熙熙縣民但可觀此意休羨江邊孝  
女碑

傳神悅躬上人

握中一寸毫寶匣百鍊金鑑貌不鑑道寫形寧  
寫心古人固不識今人或所欽依然見其質儼  
爾恨無音子誠丹青妙巧奪造化深妍媸必盡  
得幻妄恐交侵

文暉師之南徐

班班上川羽薄暮未安巢擾擾方外士歲晏遊

遠郊正值風霜急晚冰隨處敲何時居巖下都  
把塵事拋

茂芝上人歸姑蘇

身衣竺乾服手接犧氏琴繁聲不願奏古意一  
何深晏景託孤艇倦飛還舊林闔閭城下寺幾  
里認鍾音

唐寺丞知南雄州

前林尚舍凍南國使君行逆水春風峭孤舟桂  
席輕踏訝聞舊俗信鬼有顏氓當識朱衣貴壺  
漿擁道迎

依韻和孫秀才朱長官見寄

二首同韻

古來富貴蹈危機樂性安貧莫謂非未及功名  
蒼鬢改欲從踈懶五湖歸昔年同志逢時盡今  
日相親似子稀犀僕忽辭雲海上遠持雙壁扣  
吾扉

謝尉西歸

曾為洛陽客喜見洛陽人每憶舊遊處相逢借  
問頻當時伊水上醉弄巖花春而今絕茲樂欲

語已酸辛明朝君當去又復與誰親唯應有素  
月相照寒溪濱

陳浩赴福州幕

梅殘杏將圻楊柳都未堪欲贈無所贈春風吹  
酒酣遠山猶帶雪野水已如藍羽檄不應有詩  
書自可耽

示沈生

稚子每多疾始與藥物親由茲沈生跡遂歷吾  
門頻我居無鳥鼠乃知屋室貧舉世競趨利爾  
非閭井人

和潘叔治早春遊何山

泛泛寒溪流縈紆向山去淺石長蒲茸朝煙暖  
巖樹捨舟當禪扉踏蘚污野屨誰愛鮑叅軍登  
臨多秀句

張法曹歸闕

海底日未上屋頭羣雀喧晨興溪館迥坐聽櫓  
聲煩出戶望行舸羨心如野猿暮春余亦去爲  
見故人言

送張叔展北歸

江南春候早水暖野芹生北客欲歸日故人持  
贈行莫嫌爲物薄言采幽蘭并休惜臨流醉高  
帆去棹輕

依韻和叔治晚春梅花

楚人住處將爲援越使傳時合有詩常是臘前  
混雪色却驚春半見瓊姿笛吹遠曲還多怨風  
送清香似可期我欲細看持在手誰能爲折向  
南枝

僧元復院枕流軒

寺外寒流駛開軒靜者棲淺深看藻荇出沒愛  
鳧鷖一悟此中趣萬緣皆可齊誰來驚節物岸  
木長春羨

惱儂

期我以踏青花間儻相遇果然南陌頭翩若驚  
鴻度不語強躑躅羞人映芳樹兩心常自憐兩  
目空相注依依不得親薄暮還愁去記取似丹  
葩知開在何處

相逢

晚日南城歸橋邊見郎去遠逐郎迴羅衣汗  
微污不惜污羅衣要與郎相顧留連芳苑中肯  
謝花天嬀傍欄思晤言羞畏情誰諭草草各還  
家幽懷是飛絮

檣烏

檣頭飛去烏夜夜啼聲碎猶不如水禽雙棲向  
煙外煙外少分張渚間多翳會休同八九子反  
哺人誰愛

過華亭

晴雲嗥鶴幾千隻隔水野梅三四株欲問陸機  
當日宅而今何處不荒蕪

月暈

月暈已知風燈花先作喜明日挂帆歸春湖能  
幾里

逢謝師直

昔歲南陽道中別今向華亭水上逢把酒語君  
悲且喜流光冉冉去無蹤

廻自青龍呈謝師直

共君相別三四年巖巖瘦骨遠依然唯髭比舊  
多且黑學術久已不可肩嗟余老大無所用白  
髮冉冉將侵顛文章自是與時背妻餓兒啼無  
一錢幸得詩書銷白日豈顧富貴摩青天而今  
飲酒亦復少未及再酌腸如煎前夕與君歡且  
飲飲纔數盞我已眠雞鳴犬吠似聒耳舉頭屋  
室皆左旋起來整巾不稱意挂帆直走滄海邊  
便欲騎鯨去萬里列缺不借霹靂鞭氣沮心衰  
計欲睡夢想先到蘋渚前與君無復更留醉醉  
死誰能如謫僊

青龍海上觀潮

百川倒壑水欲立不久却迴如鼻吸老魚無守  
隨上下閣向滄洲空怨泣推鱗伐肉走千艘骨  
節專車無大及幾年養此膏血軀一旦齏爲魚  
者給無情之水誰可憑將作尋常自輕入何時  
更看弄潮兒頭戴火盆來就濕

社前

欲社先知雨將歸未見花那能長作客夜夜夢還家

水次鬪髻

不知誰氏子枯首在沙洲肉化鳥鳶腹肢殘波浪頭曾聞南面樂寧有九原愁厚葬不爲貴漢官其登丘

葉大卿挽詞 三首

位列名卿重年躋賜几尊臧孫宜有後定國已高門舊族聲華遠名藩治行存秋風簫吹咽隴隧啓雲根

自古賢才少滔滔豈足云善人安得見清譽久來聞器隕龍文昂覓歸馬鬣墳豐碑幾當立籍甚著遺芬

終始爲全德生榮沒亦榮里人悲畫婁郡吏拜銘旌石馬天麟肖松枝國棟成更看追孝意捧土作新塋

湖州寒食陪太守南園宴

寒食二月三月交紅桃破類柳染梢陰晴不定

野雲密默默鼓聲湖岸坳使君千騎出南園歌吹前導後鳴鑼是時輒預車馬末傾市競觀民業拋竹亭臨水美可愛嗑啞草木皆吐苞遊人春服靚粧出笑踏俚歌相與嘲使君白髮體尤健自晨及暮奏酒肴爾輩少年翻易倦倚席欠伸誰得教公雖不責以正禮我意未容誠斗筭逡巡秉燭各分散小人爭路何嗷嗷

牡丹

洛陽牡丹名品多自謂天下無能過及來江南花亦好絳紫淺紅如舞娥竹陰水照增顏色春服貼妥裁輕羅時結游朋去尋玩香吹酒面生紅波粉英不忿付狂蝶白髮強挿成悲歌明年更開余已去風雨摧殘可奈何

惜春三首

九十日春無幾日不堪風雨競吹花舞英逐水向何處泛泛斜溪伴晚霞

前日看花心未足狂風暴雨忽無憑此身不及深溪水隨得殘紅出武陵

春色斗空花亦休  
綠園深鎖更誰遊  
殘枝遺萼不中看  
暮雨霏霏起暗愁

花娘歌

花娘十二能歌舞  
籍甚聲名居樂府  
在苒其間十四年  
朝作行雲暮行雨  
格夫氣俊能動人人  
能動之無幾許  
前歲適從江國來  
時因燕席相微語  
雖有幽情未得傳  
暗結殷勤度寒暑  
去春送客出東城  
舟中接膝已心傾  
自茲稍稍有期約  
五月連航並釣行  
曲堤別浦無人處  
始笑鴛鴦浪得名  
爾後頻逢殊嫵婉  
各恨從來相見晚  
月下花前不暫離  
暫離已抵銀河遠  
青鳥傳音日幾迴  
雞鳴歸去暮還來  
經秋度臘無纖失  
愛極情專易得猜  
前時南圃尋芳卉  
小忿不勝投袂起  
官私乘屨作威稜  
督促倉惶去間里  
蕭蕭風雨滿長溪  
一舸翩然逐流水  
忽逢小史向城來  
泣淚寄言心欲死  
願郎日日致青雲  
妾已長甘在泥滓  
更悲恩意不得終  
世事難憑何若此  
郎聞茲語痛莫深  
天地無窮恨無已  
我今爲爾

偶成章便欲緘之託雙鯉

程山人歸歙州

新安固與吾鄉鄰  
山水清絕殊可擬  
我今暫來子亦歸  
空聽杜鵑雲樹裏

重過南園

誰作此園爲宴喜  
而今樂事已難并  
佳人去後門長鎖  
蔓草離離上古城

送滕監簿歸寧岳陽

乃翁守西鄙胡騎敢憑凌  
撫士無餘貨吏以文結繩向聞來三堂今復走巴陵  
沂流幾千里雲夢苦炎蒸  
風檣易陣馬猶使勇氣增  
子今遠寄省寄謝余豈能江山可留詠  
燕許昔嘗曾

寄題千步院兼示誣上人

郊郭山林有美處  
皆爲釋子所棲託  
高閑不與時俗侵  
寂靜豈唯魚鳥樂  
朝望平田插稻苗  
暮看西村收雨脚

早夏陪知府學士登疊嶂樓

高陵自可眺况復更層樓  
我我衆山翠活活寒

溪流新篁未掃籜緣險已脩脩曲道出林杪飛  
宇跨城頭春餘衆芳歇子結纈蔓抽庭空野鼠  
竄日暝啼禽留誰知郡府趣道有林壑幽主人  
易吾土惟襲是瀛洲伊我去閭井爾來三十秋  
昔望白雲下今從輕軒游

得孫仲方畫美人一軸

駿駒少馴良美女少賢德常聞敗君駕亦以傾  
人國因觀壁間畫筆妙仍奇色持歸非奪好來  
者恐為惑

涂次寄羅道濟

去年五月君到官紅蕖正開湖水寬共酌汀洲  
不知暮扣舷月露霑衣寒今年我罷欲歸去朋  
酒久來無此歡移舟不忍便為別競挈盃肴情  
未闌城闌欲閉各分散溪雲暗澹生悲端明日  
抱醒風雨急野蓮空看寄君難

和潘叔治題劉道士房畫薛稷六鶴圖

啄食

窮年見俛啄但有饑乏意雖存玉山禾不入丹

青喙因思方朔嘲此豈優諧類

顧步

舉足徒有勢行沙遂無蹤迴頸誠已久未知竟  
何從安能見儔侶顧望自顛顛

唵天

引吭向層霄聲聞期在耳鼓吻意豈踈知音何  
已矣安得九臯同流響入萬里

舞風

如逢僊圃風飄飄奮雙翅拊節余欲助和歌誰  
爾類但看矯然姿固於流雪異

警露

孤標近僊壇依約聞墜露儼如舉止揚稍見神  
爽悟曉月坐清軒寒添壁間素

理毛

六鶴皆不同初生薛公筆况茲刷羽者奮迅如  
天質墨客懷賞心題詩仍我率

留題毗陵潘氏宅假山

人心本好靜世事方擾擾丘壑未去時庭中結



山小長欲見蒼翠何須聽猿鳥有志同尚平當  
期婚嫁了

觀居寧畫草蟲

古人畫虎鵠尚類狗與鷺今看畫羽蟲形意兩  
俱足行者勢若去飛者翻若逐拒者如舉臂鳴  
者如動腹躍者趨其股顧者注其目乃知造物  
靈未抵毫端速毗陵多畫工圖寫空盈幅寧公  
實神授坐使羣輩伏草根有織意醉墨得已熟  
權豪不可致節行今仍獨

和穎上人南徐十詠

鐵甕城

壑江以爲池增山以爲壁鐵甕喻其堅金城非  
所敵前朝經喪亂曾是輕鋒鏑覽古一徜徉空  
聽漁浦笛

北固山

山勢自北來高城倚爲固當時偶登臨邇者遂  
淪誤微雲思作雨古樹嘗落露今非恃險艱草  
木藏狐兔

京口水

江頭潮正平日照土山口坐見遠來舟高帆忽  
前後將隨入浦風稍度遙圻柳客無南北虞信  
是承平久

金山寺

山與衆山殊寺非諸寺擬無回不當江有林皆  
照水南冷隔吳會北渡通楊子還看上下帆日  
日何常已

望海樓

嘗聞觀蹄浴詎識海水大浩浩與天同滔滔衆  
流會平吞江作練遠瀉河如帶終日郡樓間欲  
取長鯨鱠

季子廟

信如季子賢自昔知能幾依約有荒祠寂寥無  
奠籩壞梁生濕菌古木憑山鬼英靈豈顧茲青  
史辭豐壘

鶴林寺

松竹暗山門颼颼給青吹傳聞宋高祖舊宅爲

茲寺地以黑龍升經因白馬至何必問興亡山

川應可記

夫子篆

季札墓傍碑古稱尼父篆始泐春秋義十字固  
莫淺磨敲任牧童侵剝因野蘚嗟爾後之人萬  
言書不顯

甘露寺

山頭百畝官庭下千年樹在昔甘露霏嘗疑神  
物護陰連殿閣寒聲撼雷霆怒瞻影衛公堂英  
魂想來去

范公橋

謂公天下才非專一方惠及此作輿梁力行無  
鉅細既異國僑為將同傳嚴濟礮石亘長川寧  
湏伐山桂

邵伯堰下王君玉餞王仲儀赴渭州經

畧席上命賦

未破河西寇朝廷尚有憂淮南命儒帥塞上足  
封侯莫掇黃金甲湏存百勝謀昔嘗經黠虜今

去正防秋

悼亡三首

結髮為夫婦于今十七年相看猶不足何况是  
長捐我鬢已多白此身寧久全終當與同穴未  
死淚連連

每出身如夢逢人強意多歸來仍寂寞欲語向  
誰何窻冷孤螢入宵長一鴈過世間無最苦精  
爽此銷磨

從來有脩短豈敢問蒼天見盡人間婦無如美  
且賢譬令患者壽何不假其年恐此連城寶沉  
埋向九泉

淚

平生眼中血日夜自涓涓瀉出愁腸苦深於浸  
沸泉紅顏將洗盡白髮亦根連此恨古皆有不  
湏愚與賢

秋日舟中有感

天千余困甚失偶淚滂沱世事隨時遠秋風順  
水多鰥魚空戀穴獨鳥未離柯歲月都無幾存

亡可柰何兒嬌從自哭婢駭不能呵已覺愁容  
改休將舊鑑磨弊衣留暗垢殘藥恨沉痾斗狀  
驅驅役終期老薜蘿

書哀

天既喪我妻又復喪我子兩眼雖未枯片心將  
欲死雨落入地中珠沉入海底赴海可見珠掘  
地可見水唯人歸泉下萬古知已矣拊膺當問  
誰憔悴鑑中鬼

宛陵先生集卷第十

宛陵先生集目錄卷第十一

湖州後詩

謁雙廟

送弟赴官江南

和末叔晉祠詩

得李殿丞端硯

書謝師厚至

詠蘇子美千葉菊

新冬傷逝

送趙升卿之韶幕

蘇子美竹軒

偶書寄子美

寄題涵虛閣

送蕭秘校

送李通判處州

古劍篇送蔡君謨

雜興

送逐客王勝之

送周太博之鉅野

鄴中行

大慶殿雪中

答忠上人攜古硯

讀後漢列傳

異同

蔡仲謀遺鮒魚

雜擬

答上中人卷

送蘇子美

聞李殿丞訪別

刁景純留饌贈

寄致仕李國博

同師厚宿胥氏

聞子美登天清塔

謝師厚歸南陽

夜坐有懷

末叔贈酒

得山雨

范通判秦州

陳繹越州從事

辛著作知西京末寧

和師厚別後寄

普淨佛閣孤鶻

蜂

並遊

寄宣州真上人

元夕同賦

正月十五夜出廻

同次道遊相國寺

送惠懃上人

聞賣韭黃蓼甲

董著作爲叅謀

戲寄師厚生女

薛中舍宰聞喜

聯句附

希深聯句

希深據鞍聯句

同希深馬上口占

玉麈尾

風琴聯句

冬夕會飲聯句

問答

宛陵先生集卷第十一

宋宛陵梅堯臣聖俞著

謁雙廟

八月過宋都泊舟雙廟側未懷此忠良遺烈傳  
碑刻五位儼朝裾千年同血食當時多苟生貴  
爵曾誰識縱今有丘墳都已荒荆棘古人非輕  
死於義實罕得英骨化埃塵令名同鳥翼飛翔  
出後世景慕無終極豈若目前榮未沒聲已息  
西登孝王城王氣由邦國

送弟禹臣赴官江南

昔與子同歸夜向瓜洲泊持杯月正清  
過水平如削爾來蘆岸深須防虎潛搏行行無朋友遇  
事自斟酌

和末叔晉祠詩

并州古來稱近胡山雄氣壯民足儲山根晉水  
發源處平若皎鑑潛決蹠漸流漸急不可測以  
至漉漉鳴清渠豈惟俯可見毛髮况乃了了看  
龜魚下漑平田幾百頃稻苗肥稔曾不枯興亡

目錄終

莫問隨水遠廟深草樹空扶踈伊君持節過其  
下愛此佳趣聊停車北望故城無舊物決滌野  
色連丘墟已向風前聽好鳥只畏落日聞蒼孤  
晉人須識漢使美冉冉青髯似綠蒲

得李殿丞端州硯

鮫龍所窟處其石美且堅蠻匠斲爲硯漢官求  
費錢持歸向都邑爭乞如瓦磚豈識萬里險謀  
竊好事傳

書謝師厚至

爾來哭爾姑清淚滴塵几一聞在目言不謂今  
則死而猶意遠行所念當至止秋風忽助噉萬  
木欲摧毀

詠蘇子美庭中千葉菊樹子

生與衆草生不與衆草榮彼皆春爭葩茲獨秋  
吐英千葉共一萼百蒂共一莖幽亭聳扶踈獨  
本非撐撐吾友蘇子美有酒對自傾香隨青陵  
蝶色映黃金鷲昨日偶來過頗興陶令情豈敢  
復言詩君家有子卿

新冬傷逝呈李殿丞

惡老今逼衰孤寂仍足悲寒風一夜起曩事無  
不思手澤在故物默歷非故時夢寐猶平常反  
寤恨莫追人生苦情累安得木石爲賴有同舍  
郎相語強解頤

送趙升卿之韶幕

舟車歷盡險風物乃還君俎肉應多味虞韶不  
復聞林鳴異音鳥山冒欲晴雲若弔張丞相空  
祠舊近墳

蘇子美竹軒和王勝之

庭無十步廣有竹纔百箇子時哦其間賓友或  
來和琴壺置于傍圖籍亦在左誰憐脩脩影只  
畏寒日過誰憐青青枝下有暗葉墮我期霰雪  
時來聽幽聲卧應當爲設榻勿使賞心剝持以  
報主人此興不可破

偶書寄蘇子美

君詩壯且奇君筆工復妙二者世共寶一得亦  
難料我今或盈軸體逸思益峭有如秋空鷹氣

壓城雀鶴又如飲巨鍾一舉不能醕既醕心已  
醉顛倒視兩曜吾交有未叔勁正語多要嘗評  
吾二人放檢不同調其於文字間苦硬與惡少  
雖然趣尚殊握手幸相笑

寄題洪州李氏涵虛閣

耳熟滕閣美未爲豫章遊近聞東湖上可見西  
山頭朝愛雲氣生暮數鳥行幽主人趣向遠登  
覽日不休父兄已三人挂冠此遲留他年儻一  
往風物詠可周

送蕭秘校

比從江南來又從江南去孤舟隨鴈羣晚泊定  
何處霜橙可爲羹冰鱸思下筍此興吾不知薄  
言聊所慕

送李殿丞通判處州

拜官將近親不畏千里險沂流上轅水石亂波  
驚颭舟人素已諳曲折就迴因豈慮失便利倚  
慣憂亦掩昔余從平流悸夢尚成魘今逢子方  
去青紵絲新染沙頭有堠吏喘立板方歛鴻鴈

正來翔競看朱服儼

古劍篇送蔡君謨自諫省出守福唐

生銅夜夜鳴剄鐵未嘗缺主人久提攜何事贈  
離別借問豈酬恩請看鐔上血休歎補履功出  
處異施設

雜興

主人有十客共食一鼎珍一客不得食覆鼎傷  
衆賓雖云九客沮未足一客嗔古有弑君者羊  
羹爲不均莫以天下士而比首陽人

送逐客王勝之不及遂至屠兒原

犯霜出國門送客客已去猶意行未遠策馬過  
寒戍川長不見人沙沒前崗路始聞雲木深忽  
逢朱亥墓金鎚一報恩義烈垂竹素何須文學  
爲寄語長沙傳

送周仲章太博之鉅野

仲月霜氣嚴朝來厚如雪鴻鴈各南飛羽毛將  
恐折征途履以足侵骨寒於鐵得罪此爲輕君  
恩大歡悅

鄴中行

武帝初起銅雀臺不又建閣延七子日日臺上  
羣鳥饑我我七子宴且喜是時閣嚴人不通雖  
有層梯誰可履公幹才俊或欺事平視美人曾  
不起五官褊急猶且容意使忿怒如有鬼自茲  
不得爲故人輸作左校濱於死其餘數子安可  
存紛然射去如流矢烏鳥聲樂臺轉高各自畢  
逋誇寔尾而今撫卷跡已陳唯有漳河舊流水  
親郊前三日大慶殿雪中

皇帝幸羣臣發童聖五后冊

將郊先奉冊拜立未央庭天表君心孝人驚曉  
雪零冕旒紛點綴佩濕晶熒曲蓋曾無用羣  
臣敢自寧鑪煙靜齋幄井氣凍宮餅明日來壇  
下中宵已見星

忠上人攜王生古硯誇余云是定州漢

祖廟上瓦爲之因作詩以答

硯取漢廟瓦誰恤漢廟隳重古一如此吾今對  
之悲旣寶若圭璧未知爲用時

讀後漢書列傳

漢家誅黨人誰與李杜死死者有范滂其母爲  
之喜喜死名愈彰生祭同犬豕

異同

吾聞聖賢心不限親與疎義殊目前乖道同異  
代俱堯舜及周孔千載趨一途盜跖請孔氏弟  
子將黨歟蹠自驅其衆日念殺不辜河濱捧土  
人海畔逐臭夫塞川豈量力同趣卽爾徒爾旣  
不自過反以此爲紆

蔡仲謀遺鯽魚十六尾余憶在襄城時

獲此魚留以遲歐陽永叔

昔嘗得圓鯽留待故人食今君遠贈之故人大  
河北欲膾無庖人欲寄無鳥翼放之已不活烹  
煮費薪棘

雜擬

忽聞胡騎渡河水月魄夜脅陰貂寒獨待金輿  
立城角龍蛇不展繞旗竿

答中上人卷

吹笛皆學龍吹笙皆學鳳又於笙笛間高下不相中得其精者稀得其麤者衆况於真出音千歲不復夢爾為學笙歟頗已臻妙弄

送蘇子美

勇為江海行風波曾不懼但欲尋名山扁舟無定處南有鵬若鷗嶮有石若鋸毒草見人搖短狐逢影怒不還尚苦垂更遠饒瘴霧東土乃濱海蜃鼉仍可怖殼物怪瑣屑羸蜺固無數賊腥損齒牙日月復易缺二方既若此往矣無久駐竟當西北來醉耐炙肥豸夏不厭漿酪冬不厭雄兔勿言專口腹口腹人所務天台信奇偉石橋非坦步廬岳趣最幽饑腸看瀑布此致雖為高實亦難久慕君行聽我言不聽到應悟

晚歸聞李殿丞訪別言已屢來不遇

蕭條一陋巷頻日見馬蹄歸來稚子告有客云將睽始知君其南復歎我向西豈不懷念慕吾親書新齋曰吾五男子愛惜無不齊所要立門戶安用同犬雞齷齪守此客馴馴戀此棲二季

留左右足以共挈搗身許遠就祿幸又奉阿婆今年還都下路喪子與妻囊罄厭外役進退類藩抵終當改江邑儻得致音題

刁景純將之海陵與二三子送於都門

外遂宿舟中明日留饌贈

人言汴水駛柁何已冬乾蔡雖平且慢臘月行亦難唯聽夜冰合為君愁苦寒暫維青絲紵邀膾白玉盤行人反飲我於理殊未安所忻能自養不復道加餐

寄洪州致仕李國博

湖上悠然度幾春勇拋榮祿遂天真青蒲翠竹圍華屋白酒黃雞命里人果下有時乘小駟兒曹方見擁朱輪田園歲入千鍾美肯似疏家苦畏貧

同謝師厚宿胥氏書齋聞鼠甚患之

燈青人已眠饑鼠稍出穴掀翻盤盂響驚聒夢寐輟唯愁几硯撲又恐架書齧癡兒効猫鳴此計誠已拙



聞子美次道師厚登天清寺塔

二三君少壯走上浮圖巔何爲苦思我平步猶  
不前苟得從而登兩股應已變復想下時險喘  
汗頭目旋不如且安坐休用窺雲煙

謝師厚歸南陽効阮步兵

一日復一朝一暮復一旦與子相經過少會不  
言散我心終未極歲月忽云晏嘶馬思長道孤  
鳥逐前伴駕言慕儔侶懷抱若冰炭南臨白水  
湄風雪振高岸意恐慈母念疾馳節已換解劔  
登北堂幼婦笑粲粲弊裘一以縫征塵一以澣  
而我客大梁衣垢自悲歎

師厚明日歸南陽夜坐有懷

明朝子當去我若雲失龍龍歸雲未歸索莫將  
安從半夜出戶望參畢已正中條然變陰黑烈  
烈鳴窻風窻鳴不得寐擁被一悲翁

末叔贈酒

大門多竒醞一斗市錢千貧食尚不足欲飲將  
何綠豈能以口腹屈節事豪權閉戶飽於糞作

詩湧如泉一日復一夕醒目常不眠寤臆忽可  
怪雙壺故人傳呼兒欲自酌瓦盞無完全其能  
饗甘脆而况侑天妍却令情懷惡分與富貴偏  
收拾不復嘗排置屋角邊儻有嘉客至傾倒相  
與顛何暇問濃薄但覺窻扉旋誰識我爲我賓  
主各頽然始得語且橫旣醉論蓋堅曾不究世  
務閑氣爭古先畢竟兩未決辨吻空流涎嗟我  
儒者飲聒耳無管絃雖云暫歡適終久還愁煎  
自甘不偶死寧慕金印懸願頻致此物勿恤瘡  
檐肩

得山雨

急雨射蒼壁濺林跳萬珠山根水壅壑漫竅若  
注壺

范殿丞通判秦州

天水出名馬多稱黃金羈正值羌已和邊草復  
離離乘肥固未失所蘊不得施主人本燕客寧  
獨事書詩志尚功名間管樂猶一時去去勿復  
道礪落爲男兒

陳繹越州從事

母夫人老母兄黜夫人從爾之會稽恐傷爾心  
不敢泣春崗細雨聞竹雞時亦藏淚未出臉柰  
何相與頭傾低誠知就祿非獲已應欲退耕無  
舊畦

辛著作知西京未寧

躍馬西畿令家坐在洛陽衣霑寒食雨花發故  
宮墻冷淡鳩鳴屋寬閑水滿塘送君悲漸老空  
憶釣伊魴

依韻和師厚別後寄

吾與爾別未及旬吾家依舊甌生塵閉門不出  
將誰親自持介獨輕貨珍盤餐豈有醜酸辛苦  
吟鞍寢昏繼晨夜光忽怪來何頻採拾若在滄  
浪垠和者彌寡唯陽春

普淨院佛閣上孤鶻

我新稅居見寺閣金碧照我破屋前目看閣上  
聚鳩鴿巢棲飲哺忘窮年雕簷畫壁屎污徧以  
及像塑頭與肩寺僧不敢施彈射忽有蒼鶻張

毒拳鷓鴣噪鸚鵡叫怒鶻來比窺腥羶鶻心  
決烈不畏衆瞥碎一腦驚後先死鳥墮空未及  
地返翅下取如風旋獨當屋春恣捲磔啄肉披  
肝腸弃捐老鷓無藝又狠怯盤飛欲近饑目穿  
透巡鶻飽自飛去爭殘不辨烏與鳶羣兒指點  
路人笑我方吟憶秋江邊

蜂

春風無主撩亂時分羣養子各守脾爭掇花腴  
爲蠟蜜年年共割不我稽俄逢主人若過慮畏  
爾有薑成噬臍密將惡物毒爾族爾曾不得同  
醢雞王雖爾名爾何補造甘爲利乃自取

並遊

並出慙羸駕康衢懶著鞭蹇驢能勝馬蹇道去  
如煙何用嗟遲疾從來有後先所期皆一至我  
到爾應還

寄宣州可真上人

昭亭山色無纖塵昭亭潭水見游鱗長松碧篠  
入古寺石上高僧度幾春

元夕同次道中道平叔如晦賦詩得閑  
字

金輿在閭闔簫吹滿人寰九陌行如畫千門夜  
不關星通河漢上珠亂里閭閭誰與聯輕騎宵  
長月正閑

正月十五夜出迴

不出只愁感出遊將自寬貴賤依儔匹心復殊  
不歡漸老情易厭欲之意先闌却還見兒女不  
語鼻辛酸去年與母出學母施朱丹今母歸下  
泉垢面衣少完念爾各尚幼藏淚不忍看推燈  
向壁卧肺腑百憂攢

同次道游相國寺買得翠玉鑿一枚

古寺老栢下叟貨翠玉鑿獸足面以立爪腹肩  
而平虛能一勺容色與藍水并我獨何爲者忽  
見日以驚家無半鍾畜不吝百金輕都人莫識  
寶白日雙眼盲

送惠慙上人

遽告我行何所之東南爾土爾自知山水佛事

不暇說去何速兮來何爲公卿貴人見爾喜爲  
爾買屋丐爾資王城幸可樂歲月野鶴終是思  
陂池去去雲霞不容侶却應來此如前時

聞賣韭黃蓼甲

百物凍未活初逢賣菜人乃知糞土暖能發萌  
芽春柔美已先薦陽和非不均芹根守天性樵  
悴澗之濱

董著作嘗爲叅謀歸話西事

子說頗驍勇築城收漢疆提兵無百騎偷路執  
生羌大將罪專輒舉軍皆感傷歸來出萬死羸  
馬亦摧藏

戲寄師厚生女

生男衆所喜生女衆所醜生男走四鄰生女各  
張口男大守詩書女大逐雞狗何時某氏郎堂  
上拜媪叟

薛中舍宰聞喜

秦人宦于秦百事順耳目山川我已踈風物子  
所熟維美行邁時親賓祖車轂空將離別心欲

出無僮僕

聯句附

古木含清吹池上增曉涼余懷本達曠謝少卿聯

此傲羲皇孤鷗可與狎絳幽岸足以觴幸有彭

澤酒堯臣便同末嘉堂潘生起為壽維王子齊

陳章林端見新月衍草際聞寒蟬照水螢影亂

良臣拂筵蓼花香徘徊戀嘉境坐使歸興忘卿少

希深洛中冬夕道話有懷善慧大士因

探得江字韻聯句

彼有上人者妙談心所降希深達空知不二觀

行本無雙聖俞又阻飄花席因思響雪窻希深

社中雖得遠方外自非龐聖俞夢幻慙他劫風

塵厭此邦希深終期親道樹何必憶重江聖俞

希深本約遊西溪信馬不覺行過據鞍

聯句

有意訪西溪順途吟思迷及茲詢野老已恨過

芳蹊希深醉客但多興幽禽空自帝無由駐金

勒林表日光低堯臣

同希深馬上口占送九舅入京成親聯

句

之子洛中來芳罇喜暫開人誇阿連少吾愧士

衡才希深丹闕鳳皇去清川鴻鴈迴都門春色

美相送思悠哉堯臣

王塵尾寄傅尉越石聯句

齋中獨何物持之想見君惟茲玉塵尾信美而

有文夫子善談道臺臺詞如雲在握昔同色傾

坐今離羣絳况託懷袖好會親蕙蘭薰常許助

開放於焉探典墳既乃阻清燕復屈驅蚤蚊自

殊白團扇未畏秋葉紛堯臣

風瑟聯句

竅竹漏天風張絃擬嶧桐佳名從此得妙響未

曾窮希深夜靜危臺上人閑皎月中依依聽不

足秋露滿蘭叢聖俞

冬夕會飲聯句

與君數夜飲唯恐酒盡空今我苦欲淺堯臣語

志難此同陳編侑歡適謝景初問誰何魁雄婢

子寒且倦堯臣 主人哦不窮燈青屢結花景初

煎響時鳴蟲穴鼠暗出沒堯臣 風鴈高雍容冰

霜覆尾屋景初 貂狐輸賁翁孤床乏暖質堯臣

苦語有淡工咀嚼患衾小景初 煨炮驚殼紅落

蟾斜入窾堯臣 遠漏微遞風醉心欺睡鬼景初

細書刺昏瞳呬呀聞爭犬哮吼狀啼驟撥火亂

頰豆附炙雙變弓乾果硬逆齒堯臣 寒葦酸滿

胸枯蛤擘無肉淡脯燒可饗語必造聖賢樂已

過鼓鍾紙窻幸未曙景初 絮被令旋縫凍痺兩

股鐵跑抓雙鬢蓬脰尿既懶溺棍虱唯欲烘器

皿足缺齧捧執無天穠兒女寒不寢堯臣 僮僕

因欲曹豈無貴富徒笑此饑寒蹤丈夫固有負

道義久已充墨子不黔突齒葦且得封勉哉梅

夫子寒者終自通景初

問答 送九舅席上作

金鑿落希深 留贈行人湏滿酌銀餅况有宜城

醪及取春風花照灼

小屏風深 座隔流塵素影融方牀六尺偃清

畫慙無玉枕名通中

玉蟾蜍希深 厠君筆硯誠有諸可愛亭亭寒月

照瑩然四座凝冰壺

金錯刀深 連環交刃吹風毛美人贈我萬錢

貴何必翦犀誇孟勞

青雲梯深 尺木為階行勿迷勤脩道業生羽

翼天門九襲須攀躋

鳳于飛深 差差粹羽今逢時桐花正美商雪

亂家庭玉樹湏來儀

宛陵先生集卷第十一

宛陵先生集目錄卷第十二

擬李益竹窻聞風 擬宋之問春日

郡閣闕書 梅花

擬張九齡詠鷺 遲雪

欲雪復晴 送蒙寺丞赴郢州

聞角 和人雪意

詠楊高品馬廐御絲

和欲雪二首 和梅花

和十一月八日獻桃花

和梅花 再送蒙寺丞

擬王維觀獵 擬陶潛止酒

擬杜甫玉華宮 擬韋應物殘燈

和與諸君登西園亭

和小雨 擬韓吏部射詠狐

得韓持國作茅廬 和新晴

清躬詩 嘗惠山泉

槽淮白 和臘前

題臘藥 臘酒

臘脯 臘笋

和挑菜 和臘日

啄木二首 語鳩

和燕淮陽秀才 和石昌言求牡丹栽

和十二月十七日雪

建溪新茗 送詹秘校之越

謝人惠茶 和立春

和謝廷評北園 和謝廷評栽竹

和歲除日 明井

楊公懿惠糟鮓 和楊秘校得糟鮓

春雪 和謝學士雨後雪

伐桑 夢登天壇

寒食過荆山 過口得雙鰕魚

歲寒亭 澄虛閣

泗上逢黃令 和許發運游草堂寺

和許發運東園

目錄終

宛陵先生集卷第十二

宋宛陵梅堯臣聖俞著

擬李益竹塢聞風寄苗發司空曙

塢前風動竹聲碎影仍繁衝扉忽自啓出候初  
迎門驚雀枝未定乳蜂窠暫翻飄飄一舉袂聊  
更遲來轅

擬宋之問春日翦綵花應制

上林花未有中禁綵先成葉逐翦刀出葉從粧  
粉生紅繁內人手香染侍臣纓不是將春競天  
心重發榮

邵閣閱書投壺和呈相國晏公

較量人世無窮樂羅列平生未見書聊奉投壺  
祭征虜休言繫劍馬相如畫樓晚去聞寒角縹  
帙看來落蠹魚日獲誨言昔舊學不慙貧賤帶  
經鋤

梅花

江南臘月前溪上照水野梅多少株艷薄自將  
同鶴羽粉寒曾不逐蜂鬚桃根有妹猶含凍杏

樹為鄰尚帶枯楚客且休吹玉笛清香飄盡更  
應無

擬張九齡詠鷺

眇眇雙來鷺長年與社違任從新曆改只向舊  
巢歸末日當人語輕寒逆雨飛自親梁棟慣不  
識海鷗機

遲雪

風嚎大澤晚雲覆女墻低鷺霞夜將集廣庭朝  
復迷鶯鳴寒蔽日鴈泊凍生谿會待飄花密開  
軒意外題

欲雪復晴

陰雲不成雪碧瓦有繁霜日氣生簾額冰條結  
井牀飛鳥鳴自樂古木晝仍曠誰意斗晴後苦  
寒勝北方

送蒙寺丞赴鄂州

鄂國當時唱猶傳白雪真問今非昔日和者幾  
何人客自射飛鴈魚能供躍鱗芳洲墜馬處吾  
祖漢名臣

聞角

一聲催客夢星斗轉西簷風卷梅花去愁從柳  
塞添馬鳴霜滿鬣龍泣凍生髯高樹朝光動城  
頭落海蟾

和人雪意

凍雲低垂野遠樹昏未分朝來庭竹上撼撼霰  
已聞扣門有兵吏嘉命傳相君趨閣展熊席卷  
幔飄爐薰桂漿貯榼美馬乳薦實賓賓屬兩三  
人從容奉評文遠稽先儒言風賦可以羣密置  
筆與硯唯待雪雰雰雪既不可待日暮人半醺  
明朝獲方楮健思欲凌雲

詠楊高品馬廐糊孫

嘗聞養騏驎辟惡繫獼猴供奉新教藝將軍舊  
病偷聊看綠柱杪尚想傍崖頭更祝南州使如  
拳試為求

和欲雪二首

貂裘著不暖牙帳曉初開朔氣還先及流風亦  
屢催擬聞人詠絮將見使傳梅公復憂民畝龍

沙幾日來

雪欲漫天落雲初著地垂臂鷹過野健走馬上  
冰遲公子多論酒騷人自詠詩都無少年意只  
卧竹牕宜

梅花

已先羣木得春色不與杏花為比紅薄薄遠香  
來澗谷踈踈寒影近房櫳全枝惡折憎鄰女短  
笛橫吹怨楚童墜萼誰將呵在鬢藥殘金粟上  
眉蟲

和十一月八日圃人獻小桃花二絕

當時開向杏花後今日綻當梅萼前不畏雪霜  
何太甚繁英如火滿枝燃  
前占寒食一百六算到其時未合開丹艷已先  
灰管動不由人力與栽培

和梅花

時時不甘春著力年年能占臘前芳水邊攀折  
此中女馬上嗅尋何處郎山舍更清裁作援鳳  
樓偏巧學成粧團枝密密都如雪野雀飛來翅



合香

再送蒙寺丞赴郢州

寧弓落飛鳥少也向幽州來作漢官屬耻為戎  
國留身輕拋馬轡地暖獸狐裘慣見顏如玉江  
邊問莫愁

擬王維觀獵

晏相公坐中探賦

白草南山獵調弓發指鳴原邊黃犬去雲外阜  
鵬迎近出長陵道還看小苑城聊從向來騎回  
望夕陽平

擬陶潛止酒

多病願止酒不止病不已止之懼無歡雖病未  
宜止且欲止人事事止不經耳次誦止足言行  
當止田里田里止誰親止樂山水美既止何所  
助唯酒與止喜以言止不止未必止為是止酒  
儻不瘳枉止徒可耻止亦隨化遷不止等亦死  
慎勿道止酒止酒乃君子

擬杜甫玉華宮

松深溪色古中有鼯鼠鳴廢殿不知年但與蒼

崖平鬼火出空屋未繼華燭明暗泉發虛竇似  
作哀絃鳴黃金不變土玉質空令名當時從興  
輦石馬埋棘荆獨來感舊物煎懷如沸羹區區  
人世間誰免此虧盈

擬韋應物殘燈

照此寒夜中欲殘紅燼尾空堂滅復明獨宿擬

山鬼

和十一月十二日與諸君登西園亭榭

懷舊書事

冬日蕭條公府清獨將諸吏上高城而今何處

異疇昔鐵墓下聞孤夜鳴

又

莎徑依然見莎葉蓮花無復有蓮花更看白水

滿城下說着當時龍骨車

和小雨

蛟龍灑白霧天外細濛濛露土曾無跡昏林似

有風卷旗妨酒舍濕翅下洲鴻稍見斜陽透西

雲一半紅

擬韓吏部射訓狐

黃昏月暗妖鳥鳴，  
龍然鈍質麤豪聲。  
憑凶自異立屋角，  
潛事觜吻欲我驚。  
豈知慣聞此醜狡，  
呼集鬼物夸陰獍。  
夕盜雞雛無畏避，  
曾遭彈射沉泥坑。  
汝今病翼未甚愈，  
還作舊態侵平明。  
陽烏瞳瞳出東海，  
照汝宜喪膽與精。  
何為世人苦憎汝，  
汝常盜物資已榮。  
儻有弓矢勿污辱，  
殺此非得去惡名。  
養雛四三已相似，  
眼腦實異鸞皇生。  
一朝車輪翅墮地，  
狐鼠入穴梟黨烹。

得韓持國書報新作茅廬

聞君作茅廬，正在西軒西。  
定移舊蔬圃，稍改新藥畦。  
其高如伯鸞，况亦有隱妻。  
今方漢德盛，不必之會稽。

和新晴

雲開日照戟衣寒，  
淨掃平沙路已乾。  
吏散庭除少公事，  
畦挑茅甲足春盤。  
要聽林上鳴鳩變，  
試步塘陰綠水寬。  
誰詠陳根有微綠，  
烏蟾易失似跳丸。

責躬詩

所稟介且拙，嘗耻朋比為。  
皎皎三十年，半語曾未欺。  
身微德不著，尚使人見疑。  
省已當自責，實負聖相知。  
聖相雖明察，不假束蘊辭。  
扣言已可罪，引去豈非宜。

嘗惠山泉

吳楚千萬山，山泉莫知數。  
其以甘味傳，幾何若飴露。  
大禹書不載，陸生品嘗著。  
昔唯廬谷亞，久與茶經附。  
相襲好事人，砂餅和月注。  
持叅萬錢鼎，豈足調羹助。  
彼哉一勺微，唐突為霖澍。  
疏濃既不同，物用誠有處。  
空林癯面僧，安比侯王趣。

糟淮鮑

寒潭縮淺瀨，空潭多鮑魚。  
網登肥且美，糟漬奉庖厨。  
昔聞漁父賢，嘗勉楚人舖。  
楚人懷沙死，葬腹千歲餘。  
今茲有遺意，敢共盃盤踈。

和臘前

漢家戍日看看近，  
雲景蒼茫已歲昏。  
欲驗方書治百藥，  
預調飛走獵平原。  
土人薰肉經春美，  
宮

女藏鈞舊戲存獨把凍醪驚節物草芽微動見庭萱

題臘藥 尚書晏相公臘日投壺輸詩七首便以臘日所用物賦先成四

呈首上

頽顏早覺衰乃藉藥扶持及此季冬日預脩來歲宜鼎成無大見蜜煉有蜂知借問月中兔長年何所為

臘酒 韋氏月錄云臘日造四月成

汲井轆轤鳴寒泉碧甕盛欲為三伏美方俟十旬清夢憶黃公舍徒聞韋氏名熟時梅杏小獨飲効淵明

臘脯

畋獵得封獸割鮮為脍脩易甘非愛日不敗任經秋可用資賓豆何妨酌薦臘考之新月錄美脆勝庖牛

臘笋

南岡深竹養 去聲下有鷓鴣鳴破臘初挑筍 呂氏春秋曰和之美竹越之簾筍誇新欲比瓊薦盤香更美案酒味

偏清馬援當時見曾將禹貢評 伏波至荔浦見冬筍上言禹貢

和挑菜 十二月十二日

中圃本膏壤始覺氣候偏出土蓼甲紅近水芹芽鮮挑以寶環刀登之饌玉筵僻遠尚含凍安占春陽前造物非有意地勢使之然

和臘日

獵鼓逢逢奏寒冰鬢鬢消正憐風日暖不似雪霜朝敢問祠黃石休從擊阜鵬楚郊梅萼未墮麥已多苗

啄木二首 十二月十二日陪步後園所聞見

城頭啄枯楊城下啄枯桑朝啄不停味暮啄不充腸寒風正冽冽蠹穴蟲且殭况茲園林迥剥剝響何長

食蠹非嫌蠹聲來古木高誰將琵琶弄寫入相思槽

語鴉 此以上三首補前投壺所輸七首

客語南方鳩啄地掀巨石遂令山中人多竊禹

步跡誰云不可轉鳥啄猶能擲

和淮陽燕秀才

我官忝博士曾昧通經術前因辟書來亦不習  
文律循舊臨學宮虎革被羊質倚席未能講占  
牘聊置日朴鈍既若茲愧彼噉粟粟今者登俊  
賢充詔冠庭實邦伯乃宗公惟帝舊良弼置醴  
餞以行行季冬月騏驥入羈駕千里終不蹶  
慙予延蔭人安得結子韞心雖羨名場才命甘  
汨沒祿仕二十年屢遘龍榜揭在昔見麻衣于  
今盡超越是以對盃觴謹嚴微敢忽寧唯畏後  
生自恨踈節骨羞羅食素包核備時物里婦  
或窺觀戶下紅裙出歸應願生男生男付紙筆  
乃信讀書榮况即服緼鞶長歌食苾詩聲淡異  
鳴瑟

和石昌言求牡丹栽

昔年藥欄下已多香草名更移花本去聊助日  
邊榮莫問西都品存吾舊友評會應包萼吐可  
與魏姚并帶土歸金谷封根近玉京謫僊方醉

詠不倚錦宮城歐陽未叔  
有花品

和十二月十七日雪

窮冬勁臘已過半曉雪先春何處來豈是全資  
南畝麥多應不分北枝梅庭中未許野童掃林  
上唯愁狂吹催莫問兔園同賦客相如居右最  
為才

建溪新茗

南國溪陰暖先春發者芽采從青竹籠蒸白  
雲家粟粒烹甌起龍文御餅加過茲安得比顧  
渚不須誇

送詹彥迪秘校之越

夙懷山水心夢寐向東越聞為會稽行獨此美  
明發渡江信春潮泊館食野蔌平時異梁鴻但  
泛鏡湖月

謝人惠茶

山色已驚溪上雷火前那及兩旗開采芽幾日  
始能就碾月一壺初寄來以酪為奴名價重將  
雲比脚味甘迴更勞誰致中濡水况復顏生不

解杯

和立春

茲日何所喜所喜物向榮際縷作翠柳意先新  
陽生塗金鏤爲勝義不首時輕增年已歎老斗  
酒聊自傾

和謝仲弓廷評新理北園

園吏乘冬和荷鋤去宿莽主人因其勤築土截  
荒壤移枯復窠缺剗徑就平廣東北倚高城蟻  
險不可上愛彼林木深便爲丘壑想更待春風  
歸日探花卉長但願多置酒應得時一往

和謝仲弓廷評栽竹

移得溪邊翠來爲庭下陰惜根存舊土帶筍助  
新林暗換蕭蕭葉知虛寸寸心東風莫搖撼培  
壟未應深

和歲除日

一年三萬六千刻玉漏唯餘十二時去日苦多  
誰會惜殘陰全少頗能知已驚顏貌徐徐改不  
奈烏蟾冉冉馳萬國明朝賀新歲東風依舊入

春旗

明井在城東南

顯晦有難必孰云幽不明深井發寒泉光若月  
色盈陰陽信奇變曷用究厥情譬彼出炎火投  
薪丹焰成吾人勿驚異但自汲餅鑿

楊公懿得穎人惠糟鮓分餉并遺楊叔

恬

頭尾接清淮淮魚日登網吳菹芼蕪菜糟增  
味爽云誰得嘉貺會靡獨爲享乃知不忘義分  
遺及吾黨

和楊祕校得糟鮓

食魚何必食河魴自有詩人比興長淮浦霜鱗  
更腴美誰憐按酒敵庖羊

春雪

臘前望盈尺姦縮不應乞萬物及向榮而反事  
疑深與雨暗爭能不念傷彼茁雖然便消釋終  
是乖氣律新陽豈憚沮暴柳未爲屈隨風勢更  
巧著樹媚且密誰將替時素乃欲逞果必摧花

自作花旋積旋已失上天施命令冬春不相匹  
生物與死物其道安可壹嗚呼此飛雪何為在  
今日

和謝公儀學士正月十七日雨後復雪

本祈春雨成春雪應悞小桃先次開西漢枚生  
誰復召南朝何遜自多才潑除燈火上元去挫  
却勾萌六出來前此解衣爭貰酒不知為瑞與  
為災先是七日祈雨九日霏然至于今

伐桑

二月起蠶事伐桑人阻饑已傷持斧缺不作負  
薪非聊給終朝食寧虞卒歲衣月光無隔礙直

照破荆扉

夢登天壇

夜夢登天壇壇上兩僊人來時乘白鳳去時乘

白麟我問不我語颯颯山中雨

寒食日過荆山

山郵雖禁火嶺樹自生煙嗚咽同歸櫓悲哀欲  
問天泣親非泣玉流淚劇流泉春當橫刀膾何

心更食鮮

澗口得雙鰕魚懷永叔

春風午橋上始迎歐陽公我僕跪雙鰕言得石  
瀨中持歸奉慈媪欣詠殊未工是時四三友推  
尚以為雄于茲十九載存沒復西東我今淮上  
去沙嶼逢釣翁因之獲二尾其色與昔同錢將  
青絲繩莖芣春畦菘公乎廣陵來值我號蒼穹  
何為號蒼穹失怙哀無窮烹煎不暇餉泣血語  
孤衷生平四海內有始鮮能終唯公一榮悴不  
媿古人風

歲寒亭

種花邀青春種栢要晏歲乃知風露前已辨雪  
霜勢時俗愛芳菲不妨鳴鶯鷓他年都門歸寧  
味始終計

澄虛閣

箇圃隔翳紛閑來衣練裙檻邊生靜意水底見  
微雲斜照迴晴景幽芳襲薄薰主人多賦詠不  
減沈休文

舟次泗上逢黃令因以詩送

向曉入汴尾隔河聞人聲得聲不得貌問識舊  
時名泊舟忽來及袖詩多賢英言除并徒宰暫  
作七闌行東南幾千里日夕挂帆輕渡江蕪已  
老未足助杯羹最知便道出先見縣人迎

依韻和許發運游泗州草堂寺之什

入寺豈緣齋阮公方詠懷心將超紫府手欲拍  
洪崖雲霧波初淨塵埃鑑已措但能傾玉醕不  
假列金釵遠客歸空速千櫓密自挨醒論時事  
正醉戴野巾喞風俗通吳楚清渾見汴淮遙知  
香刹外獨與賞心諧

依韻和許發運真州東園新成

疏鑿近東城蕭森萬物榮美花移舊本黃鳥發  
新聲曲閣池傍起長橋柳外橫河渾遠波漲雨  
急斷虹明雲與危臺接風當廣廈清朱鬢有自  
躍翠栢種初生香草猶能識山苗未得名南峰  
及西嶺常共酒盃平

宛陵先生集卷第十二

宛陵先生集目錄卷第十三

禁中瑞竹

和集英殿秋燕

啼禽

汴堤鷺

與王正仲飲

記與王正仲舍弟飲

紹巖上人寧親

送王殿丞

慈氏院假山

夜與隣幾歸

夢游嵩山

雪中聞宋中道

和江隣幾詠雪

送張遂州

送周寺丞宰新鄭

送余郎中知鄭州

送胡都官知潮州

送晏太祝之宣城監稅

送張正臣赴泰州幕 月下懷如晦

願嚏

和司馬學士祀事

同蔡君謨江隣幾觀畫

上元夜雪有感 上元雪

送李學士知廣安軍 送王推宰上洛

送信安張從事 送懷州張從事

目錄終

宛陵先生集卷第十三

宋宛陵梅堯臣聖俞著

禁中瑞竹同本異莖

孤竹二君子聖人知獨清但將奇節並何用首

陽名

依韻和集英殿秋宴

殿幄陳金石宮梧集鳳凰侍臣嚴虎帳法袞被  
龍章九穀初登稔羣黎共樂康宴盤犀作鎮舞  
綴錦成行玉椀盛冰滑紗籠奏饌涼廡深容小  
語槐密漏微陽庭立衛兼霍坐尊蕭與張清塵  
沒瑤井泛宇藹天香獸躍緣幢地旗開踏鞠場  
樓傳紅幘唱簾隱內家粧鴟攫曾無彈蜂來悞  
有芳門傍銅鑄馬帝所翠爲觴萬國趨王會諸  
公佩水蒼螭頭左史筆陛楯半更郎雅著明時  
樂需言盛德光添花慕平一賜菊異元嘗身已  
陪多士心寧媿下鄉薄才何所補歌詠播殊疆

啼禽

盆蠶未成絲破袴勤可脫安知增羞顏赤脰衣

短褐

汴堤鷺

古堤多長榆落莢鵝眼小其下迅黃流其上鳴  
黃鳥安知舟中人黑鬢日已少千里歸大梁玉  
筯聞窸窣終朝不成曲幽響在林表莫羨沙路  
行金鞭馳裊裊

四月二十七日與王正仲飲

我來自楚君自吳相遇汎波銜舳艫時時舉酒  
共笑樂莫問罍盎有與無醉憶曩同吾求叔倒  
冠落佩來西都是時豪快不顧俗留守贈榼少  
尹俱高吟持去擁鼻學雅闕付唱纖腰姝山東  
腐儒漫側目洛下才子爭歸趨自茲離散二十  
載不復更有一日娛如今舊友已無幾歲晚得  
子欣爲徒

四月二十八日記與王正仲及舍弟飲

孟夏景苦長與子舟中飲酒行三四巡病嘔聊  
就寢仲氏又發霍洞下忽焉甚湯劑不能勝悶  
絕口已噤我嘔雖未平驚走豈遑枕叫號使呼



醫子怪亦莫論遽白何至斯萬方推小品且尤  
食物間臃腥失調餽所餉惟猪雞况此乏箇簞  
以子獨無恙未必因滑瀆稍覺陽脉回慄膚猶  
瘳瘳儻其遂不起孰肯謂素稟吾鄉千里遙幸  
免成貝錦

紹巖上人寧親

爾教禁足不出戶盛夏畏蹈螻蟻蹤赤日去省  
已亡律曷若冠帶共甘濃

送許州知錄王殿丞

霜花如鶴毛萬里點枯槁曉入蓬池道寒侵蘇  
合袍重來社櫟長舊寄里門高去事黃丞相無  
辭執板勞

慈氏院假山

風濤春斷越山骨聚集奇險成千峯碧甕爲潭  
立涎石直疑巖底藏蛟龍

夜與鄰幾持國歸

紅塵夜不息橫衝若煙霧朝見車馬來暮見車  
馬去車中目炯炯馬上情遽遽交相知是誰飛

先無覓處

十月晦夢游嵩山明日訪宋中道見次

道寄宿岳寺

忽夢高峰下同游失姓名山腰荒輦道巖竇落  
泉聲黑石文難辨蒼苔蹟易成他時傳洛詠知  
是陸雲兄

十一月七日雪中聞宋中道與其內祥  
源觀燒香

三日不相見逢人問始知同車侵朔雪臨水拜  
靈龜絮撲鴛鴦帶花團蛺蝶枝如何東郭叟足  
迹自穿素

和江鄰幾詠雪二十韻

十一月將雪寒誰計有無雲橫凍鵬翼霰集泣  
蛟珠萬里風爲使千門玉作樞縞衣來自鄭濤  
鷺卷從吳積甲聞熊耳觀鵝入越都庭槐高臃  
腫屋蓋素模胡騁巧能藏醜論功解飾枯巢禽  
皆白鳳來獸必駟虞遼俗休誇豕燕丹久望烏  
袒裘無壯臂附火念焦臚歌竹休王滿餐毛活

使蘇亡羊何可問別鶴不應孤靡密同脂網紫  
回似舞雩漸深由片片取重本銖銖日月方收  
照乾坤不辨隅雖輕自相壓更繁亦終淪饑虎  
僵幽谷游龍脫勁鬚佳人調蜜蔗公子擁貂狐  
共是空囊客曾非暖席儒黃昏特過我興與瀟  
陵俱

送張遂州

華省名郎意若西相如橋柱舊曾題已將符節  
為邦守不畏關山入馬蹄千里過秦看素滻三  
年還蜀度青泥里門錦綬何為樂外奉嚴君內  
阿婆

送周寺丞宰新鄭

仲冬吉徂征曉月在環玦京水生層冰梅山見  
殘雪懸庭槐已古堂壁碑未缺惟吾故交意贈  
子以爲別尹師魯有古堂記

送余郎中知鄭州

西接都門纔百里壓城殘雪照牙旗風煙古是  
諸侯國鴈鷺新來僕射陂餽食且依當日具鑄

刑無改昔人為濃薰舊舍青綾被不越常衙睡  
足時

送胡都官知潮州

自昔揭陽郡刺史惟韓侯韓侯初來時問吏龍  
水頭到官諭鱷魚夜失風雨湫乃知抱正直異  
類尚聽謀潮雖處南粵禮義無遐陬勿言古殊  
今唯在政教脩適聞豫車士勇往登犀舟不畏  
惡溪惡壘鼓齊歌謳遠持天子命水物當自囚  
更尋賢侯跡書上揭陽樓

送晏太祝之宣城監稅

每愛昭亭傍清灘石可數兩岸脩竹林孤城嚴  
晚鼓自辨越人言難度楚鄉語郭門春聚船江  
賈無多取

送張正臣赴泰州幕

敲冰冰未泮塞河流玉段輕舸莫言遲古城滄  
海畔春臯蘭蕙茁晚井魚鯁亂時平無羽書此  
樂異王桀

月下懷裴如晦宋中道

九陌無人行寒月淨如水洗然天宇空玉井東  
南起我馬卧我庭帖帖垂頸耳霜花滿黑鬣安  
欲致千里我僕寢我廐相背肖兩已夜深忽驚  
魘呼若中流矢是時興我懷顧影行月底唯影  
與月光舉止無猜毀吾文有裴宋心意月影比  
尋常同語默肯問世俗子

願噫上辛祈穀  
為獻官

猛虎不獨宿鴛鴦不雙棲虞舜游蒼梧帝子夜  
向瀟湘啼時既禪禹妃亦老老淚灑竹無高低  
流根及筍駸紅蘚此情乃與天地齊我今齋寢  
泰壇下佗際願噫朱顏妻

和司馬學士上辛祀事出郊寄馮學士

侵曉度南薰禁鐘猶可聞春郊微有霰上苑稍  
藏雲齋館人相望官橋路已分寧同鳥鳥樂翔  
集自成羣

同蔡君謨江鄰幾觀宋中道書畫

君謨善書能別書宣獻家藏天下無宣獻既歿  
二子立漆匣甲乙收盈厨鍾王真蹟尚可觀歐

褚遺墨非因模開元大曆名流駸一一手澤存  
有餘行草楷正大小異點畫勁宛精神殊坐中  
鄰幾素近視最辨纖悉時驚吁遂巡蔡侯得所  
得索研鋪紙纒湏臾一掃一幅太快捷檀溪躍  
過瘦的顧觀書已畢復觀畫數軸江吳種稻圖  
稻苗秧秧水拍拍羣鴛矯翼人荷鋤陂厓高下  
石籠密竹樹叅倚荆籬踈大車立輪轉流急小  
犢欺顧稚子驅令人頗有故鄉念春事况及蠶  
桑初虎頭將軍畫列女二十餘子拖裙裙許穆  
夫人尤窈窕因誦載馳誠起余余無善性無田  
區美人雖見身老癯舉頭事事不稱意不如倒  
盡君酒壺

上元夜雪有感

去年昭亭陽今夜苦風雪及雪在京城宵燈亦  
將滅石花廣袖輕梅蕊新粧絮忽忽競還家陌  
上亂車轍

上元雪

春雪如蝴蝶春燈如百花漫漫飛不已愁殺千

萬家我今無復夢擁被讀南華

送李才元學士知廣安軍

楊柳未堪折柔條時倚風朱輪過灞上杜宇響  
裊中危棧憎春雨晴林發曉紅不須言蜀政當  
自學文翁

送王推官宰上洛先歸關中

跨馬獨歸日春風隨度關客裘將欲綻社燕亦  
同還洛水源邊邑秦人隱處山君家有鳧舄切  
莫向雲間

送信安張從事吉甫兼寄白使君

西洛故人少世家今亦稀憐君能及祿過我苦  
言歸游宦長城下生涯舊國微使君應借問出  
處竟多違

送懷州張從事仲賓

行色在車馬西亭新雨過移家從上黨佐幙向  
三河皂莢林初暗黃梁酒未和七賢無復有舊  
迹尚應多

宛陵先生集卷第十三

宛陵先生集目錄卷第十四

和李廷老會飲 江隣幾邀飲定力院

送中道省親 寄西京宋學士

送晁殿丞 重送宋中道

送何鬲主簿 和永叔見寄

送馬察院 送和州杜駕部

送廣德劉郎中 送洛南周寺丞

賦石昌言括蒼石屏

代寄致仕張郎中 送錢駕部知邛州

文惠師贈新筍

目錄終

宛陵先生集卷第十四

宋宛陵梅堯臣聖俞著

和李廷老家會飲

四序豈常停寒革春寢和始愛衣裘輕相與車  
馬過車馬不畏遠風埃不畏多到門門有槐槐  
上時鳥歌時鳥歌猶澁主人當謂何南開石榴  
軒中置飲酒羸食校施黃金饌炙厭白鷺漢糟  
槎頭美吳羹成咄呵既醉或放言抉莊引駘它  
縱論或好辯排墨同孟軻日將薄虞淵執策相  
交摩欲去舉大白酌我苦大苛

正月二十七日江鄰幾柱挺之劉原甫

貢甫韓持國邀飲於定力院

昨日會飲我後至誰欲比我為王戎笑知卿輩  
意易敗起謂便與俗物同似過黃公酒壚下嵇  
阮不見脩竹中杳爾山河隔千里此心正有古  
人風

送宋中道朝陵仍於西都省親

西出虎牢關南瞻園廟戟漢殿拜衣冠魏臺嚴

帳帘春風石闕冷曉氣田塗白早晚下朱陵先  
過洛陽陌

寄西京通判宋次道學士

當時交友都無幾欲問歡娛亦異今花接上林  
新木變水分清洛舊池深峨嵋蒿色雲常在窈  
窕宮牆草又侵脩竹千竿白家寺昔年題處可  
能尋

送晁殿丞鄭州簽判

朝離沁水上夕去野亭賒走馬日銜樹度河風  
卷沙關雲來雨脚陂岸長蒲芽共被方為樂軍  
中莫摻搗

重送宋中道

隴草陳根發山櫻宿霧蒸將過周故宅先下漢  
諸陵穎道春經雨官溝暗溜冰純羹休定價羊  
酪易為勝

送涇州良原何鬲主簿

春風入邊磧二月沙草生胡馬自偷牧漢農寧  
廢耕薄田刈晚穀又餉防秋兵縣版固當重調

輕無與程

依韻和永叔見寄

春風約柳一片西欲託鳥翼傳音稽昨朝偶向  
東城去草草又逢驪馬蹄長鬣御史威正峭沙  
堤來坐氣吐霓我乘小駟雖甚瘦喜見驂馭猶  
解嘶適聞南都接大尹笑我出處今何迷耻趨  
捷徑身已老欲至何用頻吹蠶蛟龍失水等蚯蚓  
鱗角雖有辱在泥困居廢井誰引手豈得更  
望青雲梯筆鋒勁發若強努餘力曾徹七重扉  
倦禽雄雌不飽腹日暮徒念還巢棲大椿朝菌  
各有盡此物何怪莊叟齊誠知豪俠自快樂東  
郊南陌競鬪雞胷中有道無廣狹包括宇宙在  
一稊何時與公去穎尾湖水漫漫如玻璃世間  
會合固不易况乃仕宦多相睽正似郵亭戀行  
者未到止息空歌驪我貧尚不給朝夕焉得負  
郭置稻畦筋骸幸且稍輕健山水縱好無路躋  
儻公他時買田宅願以藜杖從招攜吾兒詩書  
不足教亦以助力於耕犁

東城送運判馬察院

春風驛巧如翦刀先裁楊柳後杏桃園尖作瓣  
得踈密顏色又染燕脂牢黃鸝未鳴鳩欲雨深  
園靜墅聲嗷嗷役徒開汗前日放亦將決水歸  
河槽都人傾望若焦渴寒食已近溝已洶何當  
黃流與雨至雨深一尺水一篙都水御史亦卽  
喜日夜順疾回輕舸頻年吳楚歲苦旱一稔未  
足生脂膏吾願取之勿求美窮鳥困獸易逃逃  
我今出城勤送子沽酒不惜典弊袍數途必向  
睢陽去太傅大尹皆英豪試乞二公評我說萬  
分豈不益一毛國給民蘇自有暇東園乃可資  
遊遨

送和州杜駕部

桐花欲開時羣囀爭哺兒但求黃口飮焉問丹  
穴饑常山有四鳥將飛昔已悲中間忽殞逝豈  
得安其枝一飲必屢顧每啄必遲遲今朝竟矯  
翼去向江之湄銜芹不自食欲遺孤與雌此義  
實已重莫爲臬所嗤世俗多嫌忌我胡爲此詩

此詩美孝悌持贈杜挺之

送劉郎中知廣德軍

昔在少年時辛勤事諸父諸父爲桃州物宜皆可數事君勤職貢采茗先穀雨劭農井田桑料薊重鋤斧城西大靈祠措意初似禹將通吳境河身自同豕伍期婦來餉時壇上必鳴鼓一爲烏所誤愧恨去不覩至今存遺堤五丈立堅土正如開轅轅黃熊慙啓姥功利欲及民血食宜簋簠祠後有高山山頭攢棟宇此實諸父爲禾麻可就俯歲登有樂事或亦作歌舞賦詩當清明解襖思洛浦其言在黑石往往被樂府于今三十年追想漸成古公將乘朱輪去問民疾苦治術自有具薄言無所補缺將陳迹書又且劇莽鹵

送洛南周寺丞

政家在華山

將去洛南宰日聞庭下松亂山歸四隱舊墅隔三峰狹谷車能入春林雨易逢地多椒與漆貨必厚於農

賦石昌言括蒼石屏

括蒼黃石屏樹如濃墨寫根深稱條葉生意絕蕭灑或聞造物手立意先真假指是龜溲摹能同自然者天下莫復言物亦逢知寡

寄致仕張郎中

代人

門榮世美高天下身退心閒住洛陽畫鶴能同薛少保愛書還比蔡中郎花陰小酌呼隣父月下清唫掃石床不問從來生計薄題籤盈閣是家藏

送錢駕部知邛州

細雨梅初熟輕寒麥已秋路危趨劔道夢穩過刀州秦粟非吳食巴粳類越疇當墟無復舊試似長卿求

文惠師贈新筍

劉累死龍不馴世間士不識真有真物實去人或在山亦隱鱗或多孫出水濱奮雷轟轟萬里春厚土坼裂窮蟄振牙甲戢戢不可數削掘誰怕天公噴奠之按酒美如玉甘脆入齒饒流津

荆吳易得梁宋少二年不食思無因豈意今朝  
忽有遺不忍獨饗呼吾鄰

宛陵先生集目錄卷第十五

觀何君寶書 送任太博歸省

送張學士知洪州 觀楊之美書

李審言遺酒 送邵郎中知潭州

送楊叔恬 送洪州倅何太博

見賣瓠者 和鄰幾景德避暑

送趙諫議知徐州 送邵戶曹隨侍

哭韓舍人五首 高平公挽歌三首

歐陽郡太君挽歌 和石昌言求筆

邃隱堂 讀求叔撰薛雲衢碣

和昌言蜀牋答松管

送楊叔武廣南招安

走筆戲邵興宗 送李中舍宰南鄭

送王察推之鄧州 戲酬高員外鯽魚

送何學士知漢州 和達觀師聞蟬

和杜相公謝蔡君謨茶

和接花 送石昌言學士

書南事 送吳都官還江南

宛陵先生集卷第十四



馮子都詩

并序

赴庾直有懷

采芡

史氏南軒

送陳脩撰

和寄宣州廣教文鑒師

送陸學士泰州倅

送徐祕丞知梁州軍

和秋夕對月

宛陵先生集卷第十五

宋宛陵梅堯臣聖俞著

觀何君寶書

燕馬易畫吳牛難圖馬骨隱細牛骨麤馬毛要  
密牛毛踈麤踈必辨別細密多模胡乃知戴嵩  
筆能出韓幹徒幹馬精神在韁勒嵩牛怒聞無  
牽拘昨日何家觀小軸綃雖破爛色不渝二頭  
相觸角競倚前脚如跪後脚舒尾株榻直脊脊  
蹙筋力寫盡蹄腕殊一勝一敗又苦似勝者狼  
逐敗者趨卷窮赤印置小字置字乃是陶尚書  
尚書國初人愛畫收幾厨買時不惜金與帛帛  
載羊車錢載驢後世兒孫不能保賣人窮市無  
須史凡目矜新不重故千錢酬直皆咲愚四牛  
遂爲何氏有裝背入眼天下無坐中吾儕趣已  
異又喜玄女傳兵符此本實稱閭令畫下筆簡  
細容顏姝三人鬼狀一牛首八女二十美丈夫  
黃帝中間陰施蓋霞扇錯玳旌擁朱冠服難知  
歲月遠但見儀衛森清都復觀鹿臺獨夫受妲

目錄終

已不笑何由娛酒池肉林騎行銜剖心斲脛堪  
悲吁數幅吳王宴西子綵舟張樂當姑蘇宮娥  
數百簇高下鬢髻一一紅芙蓉危峰細浪得平  
遠前對洞庭傍大湖商紂夫差可垂誠歷世傳  
玩叅盤盂鵬鷹草木不足記特詠此事心何如

送任太博歸省西都

人言少保持家謹載見西京萬石君子舍今歸  
浣裙切里門重戒下車勤田園一一能爲計僮  
僕訥訥亦有聞我負洛陽山水久試因行色寄  
嵩雲

送少卿張學士知洪州

朱旗畫舸一百尺五月長江水拍天穩去先應  
望廬岳暫來誰復見龍泉閣經吏部重爲記山  
識吳王舊鑄錢往迹可尋軍士少贖書遺逸附  
青編

觀楊之美畫

天官乘車建朱旗赤幡前亞風卷披二龍緩駕  
蒼髯垂印箱傍挈文籍隨雙膝推輓如畏遲行

從冠服多威儀水官自有真龍騎兩佐並跨鯨  
尾螭步趨羣吏怪眼眉雲生海面無端滄雷部  
處上相與期人身獸爪負鼓馳後有同類挾且  
搥次執電鏡風囊吹青蛇有角魚足鬢上下引  
導神所施地官旣失不可知此畫傳是閻令爲  
設色鮮潤筆法奇綃理膩滑雞子皮吳生龍王  
多裂隳八軸展玩忘晨炊李成山水曉景移黃  
荃花竹雀擁枝韓幹馬本摸搭時神駿都失存  
毫釐日高腹枵眼背睽避迨獲見何言疲厚謝  
主翁意不衰他日飽目看無遺

李審言遺酒

大梁美酒斗千錢欲飲常被饑窘煎經時一滴  
不入口漱齒費盡華池泉昨日靈昌兵吏至跪  
壺曾不候報箋赤泥坵封傾瓦盎母妻共嘗婢  
流涎隣家葡萄未結子引蔓垂過高牆巔當街  
賣杏已黃熟獨堆百顆充盤筵老年牙疎不喜  
肉况乃下箸無腥膻空腸易醉忽酩酊倒頭夢  
到上帝前賜臣蒼龍跨入月不意正值姮娥眠

無人采顧傍玉兔便取作腊下九天拔毛爲筆  
筆如椽狂吟一掃一百篇其間長句寄東郡東  
郡太守終始賢切莫汲竭滑公井留釀此醕時  
我傳

送邵郎中知潭州

張鏡疊吹洞庭外綠虎帶刀蠻帥迎且諭漢家  
綬撫厚莫言湘守事權輕木奴洲近霜包熟斑  
竹林昏野鳥鳴賈誼宅邊寒井在暫留千騎漱  
餘清

送楊叔恬應北京辟

昔時見子宛丘下丞相待子知子賢子於文字  
實廣博海客謾估珠盈船欲賣明月一寸魄雖  
豪未有售以錢通都大邑忽辨寶直取不犯驪  
龍涎遂作照乘物矜夸魏人前從茲十二車光  
彩生從先

送洪州通判何太博若谷先歸新淦

拜官江上客乘馬不乘船獨畏蛟龍浪將歸風  
雨天葛花侵野徑源水入腴田君住巴丘下西

山道路連

五月七日見賣瓠者

老圃奪天時馬通爲煦嫗四月彼種瓜五月此  
賣瓠陽陂與糞壤功力且異趣瓜遲瓠何早豈  
不同雨露速利乃在人爭先無晚暮

和江鄰幾景德寺避暑

埤蟻不應雨鳴鳶不生風鬱氣若飢炊初陽如  
火紅裸膚汗交流脂體膏將鎔龍頭費挹酌憤  
鼻強遮蒙常畏俗物來去避青蓮宮廣堂鋪琉  
璃高簷蔭梧桐廊壁畫地獄獄具鏤鋸舂鐵城  
何焰焰鐵床亦形形誰知炮烙死活間傳自西  
域黃面翁正類人世苦此熱聲利役使亡西東  
京師貴貨幾椽舍窮煎相似聒欲聾屋頭朝曷  
作飲食枕底夕艾驅蚊蟲宜爾近巷江夫子賦  
詩特壓塵土中

送趙諫議知徐州及

鹿車幾兩馬幾匹軫建朱幡騎轂弓雨過短亭  
雲斷續鶯啼高柳路西東呂梁水注千尋險大

澤龍歸萬古空莫問前朝張僕射毬場細草綠  
蒙蒙

送邵戶曹隨侍之長沙

青袍會稽掾采服湘江行水館魚方美犀舟枕  
自清鷓鴣啼欲雨蟬見還晴風土雖卑濕醇  
醪可養生

晨起裴吳二直講過門云鳳閣韓舍人

物故作五章以哭之

平生交友淚又哭寢門前魯叟不言命楚人空  
問天月沉滄海底星隕太微邊莫怪終埋沒文  
章自可傳

使虜嘗專對江湖謫幾年始看還近侍遽此隔  
重泉沃酒酒空滿託詞詞謾傳視予猶手足莫  
怪獨潛然

算數曾無據仁人亦莫聞恨愚多至老蘭桂苦  
先焚不竟千秋恨還如萬里分臨風一號慟易  
散日邊雲

昔時賓宴地今見總幃遮樓室那因鵬從孟不

為蛇曾無越人術竟起漢臣嗟明日東城陌悲  
涼後部笳

曉陌行車過交相歎且驚荀龍聞一蛻穆駿失  
全鳴不復中書直空餘左史成緒言猶在耳尚  
想見平生

聞高平公殂謝述哀感舊以助挽歌三

首

文章與功業有志不能成嘗以躋高位終然屈  
大名遺風猶可見逝水更無情歸上青烏壠韓  
城苦霧平

京洛同逃酒單袍跨馬歸明朝各相笑此分不  
為稀公既叅鑪冶予將事厥被悲哀無以報有  
涕向風揮

一出屢更郡人皆望酒壺俗情難可學奏記向  
來無貧賤常甘分崇高不解諛雖然門館隔泣  
與衆人俱

歐陽郡太君挽歌二首

夫人有賢子往歲謫夷陵欲使無愁鬱怡然見

寢典外詞陽磊磊內畏實兢兢濟壽復終貴共  
爲時所稱

當時丈人歿雖少守孤兒以及成名譽何嘗厭  
疾藜暮年終饗福陰隲不應欺莫使碧江上獨  
傳陶母碑

依韻和石昌言學士求鼠鬚筆之什鼠  
鬚鼠尾者前遺君謨今以松管代贈

江南飛鼠拔長尾勁健頗勝中山毫其間又有  
蒼鼠鬚入用不數南雞毛二物緩急豈常獲捕  
刺徒爾操蠻刀舊藏已贈蔡夫子報君松管何  
蕭騷

遂隱堂

大梁車馬地塵土飛百尺賢愚走其間朝暮不  
見迹北望天波門垣垣宗室宅宗室令王孫愛  
書輕玉帛華宇何深沉但聞列圖籍曲房有窈  
窕空自事眉額體胖生粹和安石處巖石古來  
爲善樂豈以歌鍾適

讀永叔所撰薛雲衛碣

文章如塗金光彩發美器所宜玉石間模寫傳  
千祀堅堅孝子心森森栢庭闕豈與石麒麟原  
傍闢蒼翠

和石昌言以蜀牋南牋答松管之什

蠻牋抽轉龍鱗細秋兔束毫雞距尖楊子校經  
聊以贈蜀麻江楮報何嫌

赤蟻辭送楊叔武廣南招安

南方赤蟻大若象潛荒穴洞人莫逢天公合雨  
不決雨從橫亂出將自封侵壇凌壞壞城市戰  
鬪億倍南柯雄嘗聞穿山食此物此物既大非  
常凶張舌流涎莫可餌枉啄不怕長戈春今令  
智者以智取卽見蟻醢傳太宮因而使知禍福  
理天子下令雲從龍

走筆戲邵興宗

子魚一尾不曾有又諾毗陵蒼鼠毫細粒吳粳  
誰下咽尖頭越管底能操

送李中舍襲之宰南鄭

莫問襄中道路難襄陽直上幾重灘蒼煙古栢

漢高廟落日荒茅韓信壇出水槎頭一絲挂穿  
虹雨脚兩橋殘土風大抵如南國期會先時俗  
自安

送王察推績之鄧州

昔向南陽憶洛陽秋橙初熟半林黃車過白水  
沙痕濶鴈落鉗盧稻穠長廢墨漢碑金刻字古  
原秦冢石爲羊太平羽檄何曾有賓主相歡菊  
薦觴

戲酬高負外鯽魚

天池鯽魚長一尺鱗光鬣動楊枝磔西城隱吏  
江東客晝日馳來奪炎赫冷氣射屋汗收額便  
教斫膾傾大白我所共樂仲與伯羨君赴約笑  
啞啞持扇已見飛鸞翮欲往從之雲霧隔

送何濟川學士知漢州

丞相初得君有志重儒術乃言天下士徒此占  
清秩遂懲術鬻人忝冒十八七進君天祿閣此  
衆爲第一又薦王張韓恬可與君匹吾儕宜慙  
羞空自預朝鞞欲歸無田園強住枉歲日值君

乘高軒西望函谷出當時迎長卿書史傳未悉  
車馳及穉負千萬今可詰老農喜君來田租不  
妄率織婦喜君來縑機當俟畢府胥喜君來督  
責去暴扶疾苦無不求前人唯法律晝錦榮旣  
浮康民美方溢真爲丈夫志豈是名過實

依韻和達觀師聞蟬

飲餘晨露吸餘風噪遍高枝爲俗聾欲比伯夷  
清已甚不餐周粟腹常空

依韻和杜相公謝蔡君謨寄茶

天子歲嘗龍焙茶茶官催摘雨前茅團香已入  
中都府鬪品爭傳太傅家小石冷泉留早味紫  
泥新品泛春華吳中內史才多少從此薤羹不  
足誇

依韻和接花

唯是圃人巧非關元化偏折條違物理遷艷得  
花權美女嫁寒婿醜株生極妍世間多妄合吾  
不謂之然

送石昌言學士

混混拍堤瓜蔓水軒軒銜尾挂橋船使君東下  
只朝夕父老走迎無後先古堞秋耕拾銅鏃長  
淮瀑雨入壕蓮鳴猿舞鶴仍持去不憶承明夜  
直眠

書南事

大梁國南門驛騎方騰趨波波一何急蠻寇圍  
番禺番禺本無備前賴魏大夫大夫築子城今  
得守以須兵雖不滿萬閉壁堪指呼老幼轉木  
石壯健操矛孤廩庫得以完日月不易圖城中  
舊無井魏鑿安鞭韁魏由飛語去不使立外郭  
古稱時有待淺薄皆謂紆曲突與爛額看取報  
功殊

送吳照鄰都官還江南

霜前江水磨碧銅岸背菱葉翹赤蟲吳郎鬢絲  
蒼幾縷不差月上扶桑東羞見清波照人影去  
時黑髮吹春風五年歸來婦應喜從此不問西  
飛鴻

馮子都詩 并序

漢霍光愛幸監奴馮子都與梁冀嬖奴秦宮事  
相對唐李賀作秦宮長辭亦云子都當時已有  
詩予因補之

黃金畫車屋韋絮綠車輪牽以五采絲藉以刺  
繡茵出入長信宮晝夜將誰親所親美且少玉  
頰丹砂唇殷羅縫輕襦明珠攢緇巾半醉臥車  
中侍婢躡行塵憶昔廣明亭將軍愛憐頗便房  
不使殉易寵在茲辰嗣侯喜驅逐平樂多從賓  
青絲穿五銖累室貯百珍歡與子都異矯與子  
都均用財糞土擲吐氣日月踐天地可齊久禍  
患豈有因秋風茂陵下蒼蘚上騏驎

七月十六日赴庾直有懷

白日落我前明月隨我後流光如有情徘徊上  
高柳高柳對寢亭風影亂牖我馬卧其傍我  
僕倦攀肘寂寂重門扃獨念家中婦乳下兩小  
兒夜夜啼向母問爺若箇邊天性已見厚不嗟  
羈枕孤不愧棲禽偶內有子相憶外有月相守  
何似長征人沙塵聽刁斗

采芡

蝟毛蒼蒼磔不死銅盤蝨蝨釘頭生吳雞鬪敗  
絳憤碎海蚌吐出真珠明磨沙澆水苾葢滑斫  
桂煮釜風波聲齒如編貝嚼明月曼倩不復饑  
腸鳴莫論一斛貴與賤堂上狼籍無由行

史氏南軒

庭中碧玉盃上結三重山飛光入酒盃舞翠生  
髻鬟竹林眠黃塵莎徑欠白鷗主人無倦情窻  
戶不須關

送河北轉運使陳侑撰學士

河隍多宿兵兵食固所須幸時不戰鬪畜養安  
可無古典十萬師七十萬家輟耕鋤今來歲調  
餉且與往昔殊不使民轉輓但使民歸租急緩  
實塞下商賈以利趨關西河東亦如此軍食雖  
足民實虛公乎抱長才當有所畫謨應不貸內  
府重錦象牙明月珠邊城預自足寧待臨帑輸  
莫令稱庭臣為言桑大夫

奉和寄宣州廣教文鑒師

秋池對門蓮子枯野壁剝月蝸涎塗庭中兩株  
古楠樹上有山鳥長相呼當時聯巢接飛者一  
落梁宋一海隅扶桑日枝幾千尺光彩不獨生  
陽鳥

送陸介夫學士通判泰州

從來戎馬地饗士日推牛介胄奉儒服詩書叅  
將謀隴雲連塞起渭水入關流豈似瀛洲下窮  
年事校讎

送徐君章秘丞知梁州軍

蒼壁束江流孤軍水上頭蛟龍驚鼓角雲霧裏  
衣裘午市巴姑集危灘楚客愁使君才筆健當  
似白忠州

依韻和秋夜對月

陳王苑裏望空虛吳客風前憶具區橫閣漸看  
河影轉繞枝還見鵲驚無蟲催織婦機成素露  
逼鮫人淚作珠才比陶潛無用處紗巾時任酒  
沾濡

宛陵先生集卷第十五



宛陵先生集目錄卷第十六

和曹光道風拔檜 飲劉原甫家

送監押曹供奉 答仲源遺酒

送張生還和州 李少傅夫人挽詞

送韓寺丞宰蕭山 蔡君謨示弩牙

和原甫省中新菊 和仲源獨夜吟

寄題琨瑤洞 許生南歸

得榼梓戲酬 寄題杭州法喜堂

題滿僧錄西明軒 寄題撫州息心亭

送李太博 送道損司門

送雪竇穎長老 送襄邑杜太博

送晉原喬主簿 病後宿倉

閔尚衣盜袴 胡夫人挽歌

裴直講遺賊政 贈答如晦水梨

送樂職方知泗州 和劉原甫試墨

喜雪 送劉職方知汾州

雪後晚過天漢橋 送崔殿丞知廬州

見水牛拽車 吳太博遺柑子

和普公東園十題

目錄終

宛陵先生集卷第十六

宋宛陵梅堯臣聖俞著

和曹光道風拔三檜

飄風西北至樹苦萬絳牽君家三古檜繁根龍地纏其固謂不拔未欄擁青塼今同秀林木摧倒誰復憐安得百力士扶持尚可全慎勿伐作新豈無庭燎然

飲劉原甫家原甫懷二古錢勸酒其一

齊之大刀長五寸半其一王莽時金錯

刀長二寸半

主人勸客飲勸客無天妍欲出古時物先請射以年我料孔子履久化武庫煙固知陶氏梭飛朱風雨天世無軒轅鏡百怪爭後先復聞豐城劍已入平津淵聊讎二百載儻有書畫傳嗚呼纔十一便可傾航船探懷發二寶太公新室錢獨行齊大刀鐮形末環連文存半辨齊背有模法圓次觀金錯刀一刀平五千其文如此精銅不蠹蝕肉好鈎碗全為君舉酒盡跨馬月娟娟

送嘉州監押曹供奉測

舊友尹師魯嘗作送子文文存人已歿行復我何云平時為郡尉邀方宜撫軍定過揚雄宅野鶴自成羣

答仲源太傅八日遺酒

陶潛九月九無酒望白朮何言先一日雙榼忽我歸借問遺酒誰天宗分日暉明當酌大斗黃菊羔醅肥李賀諸王孫作詩字欲飛聞多錦囊句將報慙才微

送張生還和州

山頭孤石望來久天外行人今獨歸藥囊自有留生術不管淮南木葉飛

李康靖少傅夫人挽詞二首

九月秋風急三川苦霧迷卜邛新隧啓度輦短簫齊寶劍知終合靈蟾已殞西松門來會葬車馬幾千蹄

板輿曾至鄭靈輅此歸周行哭人增慕凝笳月正秋九原開附穴故土覆新立歲晏寒松下茅

苦孝子留

送韓文饒寺丞宰蕭山

吳會未探冗廣陵先看潮橫江百馬怒卷海萬  
華巖舟楫凌湍發魚龍接浪跳薄言增勇氣少  
當舉山瓢

蔡君謨示古大弩牙

黃銅弩牙金錯花銀闌線齒如排沙上立準度  
可省括箭溝三道前直窻其度四寸寸五刻蓋  
光歷歷無纖差蔡侯出此問誰得往年客遺來  
琅琊琅琊築城穿厚壤既獲磨洗爭傳誇莫知  
歲月孰製作精妙近世應難加發機高下在分  
刻今人妄射功仍賒願侯擬之起新法勿使邊  
兵死似麻

和劉原甫省中新菊

華省切星斗沉沉嚴燕房秋風茂陵孫種菊爛  
生光天晴蝴蝶飛上下舞雙黃劉郎才筆豪移  
榻吟在傍日晚吏已散殘景上粉墻有酒無飲  
伴掇英襟裾香還思陶淵明弃官歸柴桑東籬

獨此物盈把恨無觴賴有白衣來好事遺壺漿  
適意各一時豈乏同舍郎

依韻和仲源獨夜吟

秋鴻聲澀秋絃苦塗金博山煙夜吐寂歷虛堂  
燈暈生誰人共聽西窻雨

寄題周敦美現瑤洞

僊人采玉驅雄龍列山剖璞青腔空因邃為堂  
曲為室石乳溜壁光玲瓏僊歸龍去草樹長蔽  
翳不復人蹤通指壘買墅下峯下洗斲務欲險  
怪窮地鱗鹿跡尚莫到安問樵老諸牛童古人  
未得今已得萬景付與由天公何當歸來歛頭  
角任從實我生白虹陰溪淺水菖蒲綠下有蝦  
蟇雙眼紅及時佐酒斫兩股勿使更入明月中

許生南歸

大盤小盤堆明珠海估眩目迷精麤斗量入貢  
由掇拾未必一一疵類無不貢亦自有光價此  
等固知魚目殊許生懷文頗所似暫抑安用頻  
增吁倚門老母應日望霜前稻熟春紅稔歸來

爛炊多釀酒洗蕩幽憤傾盆孟九卿有命不愁  
晚朱邑當年是喬夫

得沙苑楹梓戲酬

蒺藜已枯天馬歸嫩蠟籠黃霜冒幹不比江南  
檳柚酸索馳載與吳人看

寄題杭州廣公法喜堂

淘青研朱畫屋梁黃漆栢障連曲房日暉月色  
不須照了了自可窺毫芒夕陰花歛似欲病飛  
鳥不驚烏帽郎深山窮谷謾幽僻喜得吳儂是  
藥囊

題滿公僧錄西明軒

赤萍纔落鄧林外青銅半磨傍露明飛光斜入  
了不隔坐卧一榻琉璃平西方古胡黃金質貝  
葉傳寫烏行橫謂曉此教居此軒滿壁圖畫遂  
峯生

寄題撫州戴秀才息心亭

蒼蒼開幽林峯嶺日相對雲歸垂衣纓泉落嚮  
環珮仕宦雖有負耳目得以貸俯仰宇宙中吳

然維進退

送臨江軍監酒李太博

三江卑濕地北客宦游稀霧氣多成雨雲蒸易  
損衣白醪燒甕美黃雀下田肥未辨殊方語山  
歌半是非

道損司門前日過訪別且云計程二月

到郡正看暗惡海棠頗見太守風味因  
為詩以送行

蜀州海棠勝兩川使君欲賞意已猛春露洗開  
千萬株燕脂點素攢細梗朝看不足暮秉燭何  
暇更尋桃與杏青泥劔棧將度時跨馬莫辭霜  
氣冷

送雪竇長老雲頰

朝從雪竇請暮卷雲衲輕莫問居士病自從他  
方行吳霜點鬢根海鳥隨衆迎安隱彼道場萬  
事都忘情

送襄邑知縣杜君懿太博

霜落水未落令君將度河農耕休叱耒女織罷

鳴梭赤幘驅亭長丹砂挈印窠無慙浚儀政才  
比陸雲多

送晉原喬主簿

太守登車時我病不能出遙期玩海棠度險馬  
屢叱唯畏行邁遲惡欲及春日何爲愛此花曾  
非桃李匹生紅濃復淺瘦帶脩且密湖傍幾十  
樹雕盤擁新漆酒傾瑠璃盆月上歡未畢縣官  
同遠宦簿領無督詰刻意誅芳菲追補李杜失  
十一月十三日病後始入倉

曾非雀與鼠何彼大倉爲狐裘破不温黃狗補  
其皮霜花逐落月綴在枯槁枝予年過五十瘦  
寢冰生肌

閔尚衣盜袴

昔聞廉叔度能使民多袴多袴非或貪持新不  
忘故嗟嗟亦王官奚自門閭汗中府中紋綾袖  
之呼馬去左右卽其私邀索乃就捕三公出死  
狗訓導能有素今同竊鉄者見爾皆此趣

胡夫人挽歌

子哲

已哉胡夫人其壽七十餘其子哀母死一夕髭  
皓如髭白髮亦白長號守茅廬扶棺埋吳雲來  
會傾市墟誰復向寒月卧冰求鯉魚

小餅

裴直講得潤州通判周仲章賊政遣一  
金山寺僧作賊政南徐別乘馬不肥大梁貴人  
與年少紅泥鑿盜烏歸飛我今老病寡肉食廣  
文先生分遺微

贈裴直講水梨二顆言太鈔魯吳甘三

顆以爲多走筆呈之  
綠橘似甘來太學大梨如水出咸陽莫將多少  
爲輕重試擘霜包幾瓣香

送樂職方知泗州

長堤凍柳不堪折窮臘使君單騎行蘇合輕裘  
霜莫犯銅牙大弩吏先迎山旁楚賈連檣泊水  
上禹書寒磬清試向郡樓東北望煙波千里月  
臨城

和劉原甫十二月十日試墨

海神不朝雪不作大梁塵土蔽天高道傍牛喘  
復誰問佛寺吹螺空唱豪相公跪香恬且佚  
陛下減膳心焦勞因君試墨偶有激勇辭壯筆  
揮長刀予無奈何亦思飲渴甕甕從鋪糟

十二月十三日喜雪

三日朔風吹暗沙蛟龍卷起噴成花花飛萬里  
奪曉月白石爛堆愁女媧大明廣庭踏朝駕雉  
尾不掃粘官靴官中才人承聖顏捧觴稱壽呼  
南山三公免責百姓喜斗酒十千誰復愷

送劉職方知汾州

西河風俗厚尚翹古所聞子夏有遺廟千木有  
遺墳太守下車日當先此二君不必汾水上秋  
風看鴈羣

十三日雷後晚過天漢橋堤上行

堤上殘風雪橋邊盛酒樓據鞍衰意盡倚檻艷  
歌留海月開金鑑河冰卧玉虬當年洛陽醉偏  
憶董糟丘

送崔黃臣殿丞之任廬山

驛駒西行四千里直度經橋百尋水石上菖蒲  
未見花蒙頂茶牙初似菁采時應憶故園春故  
園開焙亦思人其間杜鵑不中聽掩耳聊看錦  
雉馴青崖鞭垂瘦虵尾僂人搯節隨鱗起斫取  
他年跨馬歸劔棧秦山多折箠

十九日出曹門見水牛拽車

只見吳牛事水田只見黃犂負車輓今牽大車  
同一羣又與驟驢走長陌叩頭闊步塵蒙蒙不  
似綏耕泥汨汨一夜眠頭向南越烏心腸誰  
辨白

吳太博遺柑子

太學先生欺綠橘裝如鴨近有贈吳興才士與黃柑黃  
柑似日勝崖蜜帶葉初擎翠竹籃還料楚王曾  
未識徒將萍實詫江南

和普公賦東園十題

頰芳亭

結宇東園中種花待春風口歌金縷衣手折枝  
上紅今日映綠髮他年羞青銅

清心堂

寂寞外物亂境清心亦清彼皆居深谷此獨處  
重城夷齊食薇蕨千古首陽名

石筍

削出青山根峭立碧玉圭不作湘竹老不染帝  
子啼不為盤中蔬豈與煙苗齊

待月亭

明月過三五飛出滄海遙佳人望清夜隔樹光  
離離不瀕磔蝦蟇寒魄自有虧

虛白堂

空堂絕纖塵虛靜自生長風吹月東牕戶如  
不隔漆園茲趣深赤水珠難索

假山

太山不可歷石齒齧人足聊集怪與奇蒼蒼都  
在目何須引寒流平地作溪谷

書齋

聖賢有事業皆在經籍中已愛牙作籤可輕山  
賜銅還來讀詩禮不用辨魚蟲

小池

小池依小山山晴光翠入無容羣蛙鳴間有孤  
鶴立曾不起波瀾石郵風自急

紫竹

西南產脩竹色異東筠綠裁蕭映檀脣引枝宜  
鳳宿移從幾千里不改生幽谷

山茶

紅鶴勝朱槿越丹看更大臘月冒寒開楚梅猶  
不柰曾非中土有流落思江外

宛陵先生集卷第十六

宛陵先生集目錄卷第十七

除夜雪

和吳冲卿元日

元日

和仲源暮冬見寄

送韓寺丞

和原甫風花

貽妄怒

十六日會靈火

送潘司封知解州

飲酒呈鄰幾原甫

寄渭州王龍圖

雪中赴宿懷鄰幾

送薛虞部

送宣倅馬屯田

觀拽龍舟

二月四日雪

荅劉原甫

聞語十方璉長老

垂拱殿起居聞捷

十五日雪三首

聞蜜賜

送晏寺丞

江鄰幾饌鱗

淘渠

蓬生麻中

賣鹿角魚

夜與原甫步歸

高陽關射亭

京師逢賣梅花

欲訪宋中道

丁右丞挽詞二首

廷老傳沛語戲作

送胥寺丞赴洛

送徐殿丞發州倅

燕

雨

晴

送胡公疎之金陵

送虞部知信州

送李推官之岳州

和南齋畫壁歌

媽媽

送端式歸漳州

送黃殿丞潤倅

棟花

和端式見贈

楊公蘊華亭宰

保之遺水墨扇

送汝陰宰孫寺丞

和曇穎四明十題

目錄終



宛陵先生集卷第十七

宋宛陵梅堯臣聖俞著

除夜雪

擊鼓人驅鬼漫天雪送寒臘從今日盡花作舊  
年看著樹多還墮隨風積更乾明朝預王會畏  
濕兩梁冠

和吳冲卿元會

千官車馬閭闔來晝漏始上閭闔開峨峨左右  
升龍進昨夜雪飛雲作堆殿前冠劍魚鱗立東  
風入仗旗脚迴黃鍾一奏寶扇掩玳簾捲起香  
霧排鳴梢未盡霹靂響翠輦已退黃金階聖人  
端冕御法座大樂旅作聲和諧群公并蹈丹墀  
下尚書奏瑞四夷懷乘輿却入更衣閣通天絳  
袍陞玉榻百拜稱觴萬歲聞兩廊賜食簪裾匝  
典傳太定舞綴踈波旋烟歛飭宮車衛官解嚴  
多士退日光停午氣象舒吳君才華天下傑歸  
來作詩傳石渠石渠秘邃無凡愚石渠酬唱皆  
嚴徐我慙短學復在後收餘掇棄聊以書

元日

頻年無入關今日預朝元丹陛發金奏侍臣稱  
玉鐔旗旌搖細仗雲霧啓千門却出蒼龍闕衣  
冠萬馬屯

依韻和仲源暮冬

曾未學黃庭衰顏已可驚詩能如阮籍評不愧  
鍾嶸玉軫調初美冰壺想更清兔園風雪甚還  
聽鴈來聲

送韓子文寺丞通判瀛州

嘗聞河間守介直天下無選才才且殊鐵網收  
珊瑚珊瑚得亦難鐵網取亦劬况茲戎馬郊爲  
貳維多謨新春度滹池冰上少馳驅

十七日和原甫風花偶書

風花不戀枝脫萼亂翻飛自學空中雪寧同垣  
上衣繞庭面旋久無著衆鳥爭御何處歸

貽妄怒

飲食無遠近所美貴甘輒南方食蝦蟇密捕向  
清吠齒咀口且諱聞語輒忿喘此物何醜惡猶

勝螺螭覬西蜀亦取之水田名穀犬彼士不爲  
慙吳人休獨恟豈須若中州牛羊烹大臠

十六日會靈火

章聖皇帝興三宮三宮鼎峙何崇崇天聖七年  
六月尾玉清始災壇宇空于今二十有五載上  
元後夜星軫中乃聞會靈五殿火丹焰徹天明  
月紅千楹萬棟一夕盡赤烟奔突西南風先時  
二日車駕幸爲民祈福輪清衷大臣驕蹇不從  
祀岳靈不歆爲不恭若此示變猶影響宜鑒陛  
下無惰容神非怒乙遂及甲天意警聖不警凶  
不獨洪水累堯德堯仁未及流驩共

送潘司封知解州

鹽池暗湧蚩尤血紅波爛爛陽烏熱岸旁遺老  
記南風五月滿畦吹作雪白徑嶺上橐駝鳴太  
行山中騏驎茱古人射利今人同行商不困何  
由設朱轡太守自東來先世大夫留故轍是非  
取與應不移秦人休衙張儀舌

飲酒呈鄰幾原甫

天地不爭行日月不爭明晝夜自顯晦冬春自  
枯榮夸父逐日死共工觸天傾二子不量力空  
有千古名寄語賢與愚何嘗見長生我願會良  
友醉顏日常頰東海爲酒罇五湖爲杯羹海壑  
湖且竭盡倒爲解醒苟死不復知苟生徒牽情  
項籍乘牛車馳上廣武城強梁取秦鹿慷慨猶  
爲輕歸來卧酒家豈得慙公卿樂亦但如此舉  
世任營營

寄渭州經略王龍圖

西城索馳來賀蘭入貢美玉天可汗蕭關夜開  
月團團彈筆古峽鳴哀湍前將軍不擐甲取大  
官今將軍能撫士尙盤桓河西五郡兵氣完駿  
馬躍棧無箭廠我嗟乘劣不受鞍馬得乞與都  
人看

二十一日雪中赴宿懷鄰幾原甫

正月東都雪多於舊臘時酒賓臨迥閣野雀集  
枯枝馬向西城度花從上苑遲劉郎與江叟相  
對定爭棊

送永興通判薛虞部

灰宮盜玉秦樓空南山不老天無窮  
薛碑剝爛少文字雨耕拾寶牛蹄中  
其旁築城聚貔虎黃土爰業如削  
銅西州吏人氣吐虹摧鱗斂角聽  
相公少年別乘勤爾躬幙府甚盛  
瓊瑤叢

送宣州簽判馬屯田兼寄知州邵司勳

寒溪翠拖碧玉帶蒼山晴卧蛻骨  
龍水邊苦竹抽肥笋石上老蕨拳  
紫茸泊船繫纜宿明鏡昭亭廟古  
攢瘦松陰風雨電潭心起雲遮北  
嶺如墨濃田秧浸綠白鷺立內史  
出喜嘉賓從昔時謝公來賽神蘭  
肴作椒金作鍾聯詩姓何名已失  
板蠹粉落蟲鳥蹤我鄉復傳召南  
化磨鏤黑石君亦逢

觀拽龍舟懷裴宋韓李

截春流築沙坻拽龍舟過天池尾  
矯矯角岐岐千夫推萬鱗隨驚鴻  
鵠沉魚龜春三月輕服時薄水殿  
習水嬉馬特特來者誰魏公子人  
不窺車鞿轉集其涯邨鄆倡士交  
馳銀餅索酒傾玻

璪用錢如水贈舞兒却入上苑看  
闔雞擊毬彈金無不爲適聞天子  
降玉輦當門虎脚看大旗春風吹  
花入行輶紅錦百尺爭蛟螭雲  
蓋迴綵纜維明年結客觀未遲

二月四日雪

前日春風初擺條昨夜雪飛深一  
尺北帝及臘不行今東皇發煦  
遭爾厄侵時奪氣四時錯歡問  
上天何不責天高地厚語難通  
俛首下土徒叩額或言莫信難可  
聞鶴鳴至微猶不隔休問天問  
顏躡休看花看壟麥

荅劉原甫

生平多交友常恨會遇稀每念相  
笑語昨是今或非重惜向時游出  
處若乖違從今儻有酒莫問梨栗  
微前夕呼我飲遣奴來扣扉暗犯  
風雪往醉脫冠服歸夜來新霽月  
清吐萬里輝劉郎戴幅巾江叟披  
褐衣相過無百步誰虞竊訶譏  
三家若循環但知具甘肥

聞語十方璉長老

舊居廬嶽寺新化給孤園還享國人供應無塵  
事喧有來聽喻笈一悟見吹幡不憶爐峰下臨  
溪看飲猿

十一日垂拱殿起居閩南捷

二月雪飛雞狗狂錦衣走馬回大梁入奏邕州  
破蠻賊絳袍王座開明堂腰佩金魚服金帶榻  
前拜跪稱聖皇一朝嚴氣變和氣初令漏泄飛  
四方將軍曰青才且武先斬逗撓兵後強從來  
儒帥空賣舌未到已愁茆葉黃徘徊嶺下自稱  
疾詔書切責仍勉當因人成功喜受賞親戚便  
擬封侯王昔日苦病今不病銅鼓弃擲無鏢鎗

十五日雪三首

寒令奪春令六花侵百花塘水膠燕紫野水濕  
芹牙擁柱輕於絮吹堦淨若沙乳禽饑啄木誰

悞撥琵琶

新雷奮虵甲密雪鬪鵝毛正欲裁輕穀重令著  
弊袍沙泉流復凍烟萼坼還韜只待隣醅熟微

聲聽酒槽

春風九十日一半已銷磨率擬看花少依稀詠  
雪多官車猶載炭拖鵲不離窠向此興都盡戴  
家誰復過

聞密賜

朝開政府賀捷回夕賜明月五千枚魏魏聖皇  
德所該廟略付與何有哉况未覆穴翦渠魁宜  
先戰士老與孩傾肝瀝膽謝不敏豈可便恃張  
良才

送衛真宰晏寺丞罷長安

捨琴辭苦縣解劔入函關鵲報遠人至馬衝春  
雨還荒榛郊北園葱翠國南山歸見蕭何政條  
今舊錦間

江鄰幾饌鱸

泥鱸魚之下曾不享嘉賓又嫌太健滑治洗煩  
庖人煎炙亦苦腥未嘗輒向脣江侯昔南官家  
膳無此珍昨日邀我餐下筋勝紫鱗乃知至賤  
品唯在調甘辛

淘渠

開春溝吠春泥五步掘一塹當塗如壞堤車無  
行轍馬無蹊遮截門戶雞犬迷屈曲措足高復  
低芒鞋苔滑雨淒淒老翁夜行無子携眼昏失  
脚非有擠明日尋者爾瘦妻手提幼女哭嘶嘶  
金吾司街務欲齊不管人死獸顛啼

蓬生麻中

麻畦無曲本蓬質有稂莠所托修仍直安能縱  
復橫擇鄰聞舊毋益友記諸生蕭艾從茲遠蒿  
萊不可并何嗟蔣詔逕孰念衛人行儻匪緣其  
地秋風廣漠驚

賣鹿角魚

水中龍角而足海小魚角蠹蠹不擬龍乃擬鹿  
譬彼蝸抗蟹積漬以醜幽久且醜特賣都市叅  
鬪餽此人何苦狀猪羊其爾臭味不飽腹

夜與原甫江家步歸 二十三日

丹砂漆盤盛井水冷浸半坊山櫻花始見春色  
不柰喜黃昏招飲夜還家劉郎居南我居北陌  
上泥開天正黑風吹蠟燭燒未明素絲作履惜

不得

高陽關射亭

星弧射狼夜夜張角弓備寇不可忘將軍屯師  
古關下不尙武力何由強日與兵官來會此弓  
須射硬箭射長更如羿中九烏斃獨見杲杲明  
扶桑

京師逢賣梅花五首

此土只知看杏藥大梁亦復賣梅花此心還似  
庾開府不惜金錢買取誇  
驛使前時走馬廻北人初識越人梅清香莫把  
茶蘼比只欠溪頭月下杯

憶在都君舊國傍馬穿脩竹忽聞香偶將眼趁  
蝴蝶去隔水深深幾樹芳

曾見竹籬和樹夾高枝斜引過柴扉對門獨木  
危橋上少婦髻髮猶戴歸

此去吾鄉二千里不看素萼兩三年移根種子  
誰辛苦上苑偷來直幾錢

三月五日欲訪宋中道遇雪而止

蝴蝶飛時雪鬪輕  
滿街掩亂得人驚  
欲尋宋子東城去  
馬畏春泥不敢行

觀文丁右丞挽詞二首

預政公槐亞談經  
帝席陳儉恭齊國  
相清淨漢廷人去  
夢嘗為蝶遺文不  
解麟一聞車馬幸  
豐賜及孤臣

春風百花發露挽  
九原歸白馬悲鳴  
駐黃鸝下上飛墮  
邊新栢盛門外弔  
人稀獨見東牀客  
攀車淚濕衣

廷老傳沛語戲作

夷門市裏侯羸老  
公子時能釋禮過  
莫問孟嘗招致客  
薛中遺俗尚應多

送胥平叔寺丞赴洛

單車細馬出虎牢  
春雲黯黯百舌噤  
穀雨已近花欲盡  
秉燭夜飲朝坐曹  
因君重思昔日歡  
醉筆狂掃嵩丘高  
于今零落二十載  
縱在各各歎二毛  
試採上陽何首烏  
刮切仍致苦竹刀  
俗情相望亦異此  
競欲折筭籠含桃

送婺州通判徐殿丞赴上當在後年夏  
疾湍怒蛟龍不畏東風逆  
法法奔長淮千里在咫尺  
辭梁始及晨過宋尚未夕  
南州豈難到何處淹行迹

三月十日韓子華招飲歸成

清明曉赴韓侯家  
自買白杏丁香花  
雀眼塗金銀茂籠貯在  
當筵呼舞娃舞娃取  
捧笑向客不顧挿壞  
新烏紗朝來我舍報  
生子賀勸大白浮紅  
霞酒狂有持梧桐板  
暴謔一似鄱陽槎  
袒裼擊鼓禰處士  
當時偶脫猛虎牙  
禰衷不容又何益  
鸚鵡洲上空蒹葭

送下第親舊

花開風雨惡坐見紛紛  
落明日結子時又復有  
脫萼莫嗟樹漸老樹  
老子亦著共愛西枝  
繁不數東枝弱他年  
會有春却看西枝薄

鷺

一避吳宮火千年楚屋  
春翅逆風雨健聲入  
戶庭頻掠水過長渚  
嘶蟲落覆塵休將漢  
皇后故

故比輕身

雨

春雲易成雨一日幾迴陰  
燕濕飛猶快花寒色更深  
邀車愁客遠盤馬畏泥侵  
向晚晴光吐西

應綠影臨

晴

風掃天如鑑雲開日似萍  
死花猶帶濕蔬甲已微青  
蝶翅粉應薄塘潏波更渟  
尋春不惜醉莫笑髮星星

送胡公疎之金陵

綠蒲作帆一百尺波浪疾飛輕  
鳥翻瓜步山傍夜泊人石頭  
城邊舊游客月如冰輪出海來  
江波千里無物隔自古有恨洗  
不盡于今萬事何由白依稀可  
記鮑家詩寂寞休尋江令宅楊  
花正飛鮒魚多食膾舉酒謝河  
伯但令其肥日飽腹誰用麒麟  
刻青石去舸已快風亦便寧同  
步兵哭車輓

送裴虞部知信州

攢青歷歷正面山刺史日坐雲屏間  
楚人竟握水精璞漢女買作月珮環  
時惟產寶不重穀願當化俗無棄管  
往辭丞相相有言物景清絕何由攀

送李推官之岳州

崑崙燕子五兩竿霧露薄水平湖寒風帆美滿  
八百里夕從岳陽樓上看魚跳鷺立月鉤下星  
斗爛爛垂欄干羽書不到罇俎裏蠻兵况去荆  
楚安試尋燕公舊賦筆磨圭刻碧獨可完

和和之南齋畫壁歌

終南下臨長安城峻欄高檻黃金羸嵩山亦近  
洛陽陌鮮車怒馬一日程大梁平廣匝千里不  
見雲峰來眼底其間自有高趣人掃室呼工崑  
壑啓初疑巨靈勇孽華不比將軍能聚米暗雨  
輕烟滿室中塵事如脂一朝洗又將餘力作脩  
竹石上數莖風撼王葉斜枝亞寒聲盡節老根  
孳生意足何須踐苔眼綠陰然後始為嵇阮公  
三賢歌詠已見意舞女不看頻整簪

嬌婦

黃金一九入雲端群貧望逐滿長安眾人為貴  
媽不惜弃擲如泥資彈射藏身葉底有能鳴辜  
負春風拖雨翻不飛上天訴至珍幾人辛勤揀  
砂石

送端式歸漳州

來居天王都常夢苦竹溪乃識高僧趣不為利  
物迷海燕乘華屋區區竟啣泥安知矯翼鷗豈  
類斷尾雞性同而質殊何必莊指齊

送黃殿丞通判潤州

前年江州飛火龍樓殿化盡山將鏐今聞棖棟  
復華壯大閣渠渠出波上南徐別乘簡且聞下  
馬岸傍呼畫舫末日江風不畏人檝師孫獯欺  
白浪衣上京塵莫獸多斗擲中流雲在望

揀花

紫絲暈粉綴薜花綠羅布葉攢飛霞鶯舌未調  
香萼醉柔風細吹銅梗斜金鞍結束果下馬低  
枝不礙無闌遮長陵小市見阿姊濃熏馥郁并

鈿車真輕貧賤出閭巷迺入漢宮人自誇

次韻和端式見贈

不為阮步兵發詠怨朝陽不學屈大夫行吟思  
塞芳其雨豈無時細佩空自香吾道不苟合我  
懷固有常江南一畝宅近在句溪旁仕官且如  
此夢寐安敢忘以子論言多重歌木桃章

楊公蘊之華亭宰

月徑千里大中有神娥官宮旁種玉桂柯葉垂  
瓏瓏蝦蟇穴其根出輒氣墨蒙光魄縱復吐血  
赤如頑銅不知從何時更使人蹤通年年折桂  
枝寬少尚易充今年柳都盡秃株立童童株秃  
莫爾攀墮雲雙手空歸來走海上買鶴問吳翁  
端午前保之太傅遺水墨扇及酒

畫扇雙酒壺置前兵吏立言將國匠奇重以風  
義執樹石冰上看山河月中入便持菖蒲飲不  
畏青蠅及

送汝陰宰孫寺丞

觸郎唱榜鷺尾下穎水落日虵鱗生綠蒲破岸



漁網舉黃鳥啄甚縲車鳴吏無詬租官正來不  
借魴鱖與吏烹饋吏人情見里黨官非喜慢知  
官清

和曇穎師四明十題

雪竇山

重雲不蔽春深竇常有雪曉月號松猿晴壁挂  
海覓終恍無心人區區佩環玦

龍隱潭

老龍戀潭窟不雨亦不雲吐涎出溪滑吹腥隔  
林聞疾雷驅未去魚鱉競紛紛

含珠林

山爲驪龍蟠谷作驪龍頤珠樹存其間誰採明  
月來何須循海隅笑蚌未成胎

偃蓋亭

既將茅覆簷復有松爲蓋五里入山時憇此得  
寒籟曾無康樂游但見雲衲會

雲外菴

山僧好寂靜入雲恨不深峰間一雨昏林表孤

燈沉往來有猿狖呼嘯自成音

石筍峰

巨石如龍孫聳聳烟霧裏明明落落溪口納納喧  
灘齒何當助齋孟菌蕃徒爲美

宴坐巖

智覺禪師  
於此不睡

心危身亦危衽席尚顛墜如何崑石上來坐自  
安意能喻死生間無論寤與寐

三層瀑

山頭出飛瀑落落鳴寒玉再落至山腰三落至  
山足欲引煮春山僧房架剝竹

丹山洞

山無鳳皇飛洞有僊人跡蝙蝠大如鴉莓苔偏  
上屐自慙無道骨安問綠雲客

獅子巖

崑形若狻猊不能千里走豈無鳥獸群當假風  
雷吼寄謝棲息人想像真妄有

宛陵先生集卷第十七

宛陵先生集目錄卷第十八

和原甫省中盡壁 和原甫山水

和原甫見寄 醉和范景仁東軒

與子華自內中歸 送傅都官待闕

吳冲卿出飲鼎 江鄰幾邀觀書

和冲卿秘閣觀墨蹟

同鄰幾登吹臺 逢羊

和張寺丞見贈 和原甫對月見邀

和原甫月夜獨酌 和原甫早赴朝

和原甫盆池 送提點施屯田

和鄰幾晚赴館宿 送蒙城宰林寺丞

和原甫曉雨 送余中舍知德陽

勉裴如晦 送謝寺丞知餘姚

與蔣秘校久別復見

別弟彥臣 和穎老見寄

送余中舍韶州錢監

七夕詠懷 送弟禹臣

送叔昭上人 山茶樹贈李廷老

送吳都官成都倅 和原甫昭君辭

再依韻 飲劉原甫舍人家

和求叔退朝見寄 劉涇州硯

送劉秘校赴婺源 送閻郎知磁州

和景彝冒雪晚歸 和景彝赴鄰幾飲

和冲卿傷何濟川 和景彝赴省宿

送李獻甫 送周諫議知襄陽

和原甫畫蟹

目錄終

宛陵先生集卷第十八

宋宛陵梅堯臣聖俞著

依韻和原甫省中松石畫壁富彦國爲省判日令

許道寧畫

山林與城闕事物不相對唯聞秉道義所處無  
內外趨煩而毀靜此理乃俗輩昔有天下賢喜  
得名筆會買粉塗南墻松石生屋內石怪如春  
濤松偃如起籟畫來二十年數偶未輒愛罕親  
憑按顏但覩抱犢背雖當省闈嚴晦昧欲何賴  
今逢茂陵人獨唱亦豪邁

依韻和原甫廳壁許道寧山水云是富

彥國作判官時畫

山情水思半軒間試問來居有底間唯有才高  
方暇佚無論歲月自能攀

依韻和劉原甫見寄

憶昔游臨汝于時太守賢山尋順風處城得峯  
龍遷民頸纍纍大池荷一一圓周碑嗟缺矣少  
室望蕲然羸馬居人後歸禽落我先事還如響

蒼老去若波旋賦分都應定元功豈得偏不須  
天以問自可鑒於前王粲今方樂邊韶舊好眠  
漢宮聊擲彩梵學競通禪語道滔滔是論情往  
徃牽平生二三友南睇不勝恡

醉和范景仁賦子華東軒樹次其韻五月

日十

樹影落東墻影微人已醉休看枝上綠但對眉  
間翠

五月十四日與子華自內中歸

君注起居同左史我爲委吏退延和共經南陌  
東風急側帽偷看意已多

送傅越石都官歸越州待闕

越客舟從真定至夜夜鏡湖生夢寐曉度吳江  
百尺船洗眼重看會稽翠賈臣負薪樵徑荒伯  
鸞賃春苔白棄綠橘黃柑帶葉收白粳紫蟹侵  
霜飲食蟹易美粳易飽綠橘佐酒柑佐醉莫論  
仕官遠與近布被練袍何所利君恬不忍乞丐  
爲且返故廬聊以遲

吳冲卿出古飲器

精銅作鼎土不蝕地下千年薛花暴腹空鳳卵  
雷藻文足立三刀乃微直左耳可執口可斟其  
上兩柱何對植從誰發掘歸吳侯來助雅飲歡  
莫極又荷君家主母賢翠羽胡琴今奏側絲聲  
不斷王筆繁繞樹黃鸝鳴不得我雖衰芥爲之  
醉玩古樂今人未識

二十四日江鄰幾邀觀三館書畫錄其所見

五月秘府始暴書一日江君來約予世間難有  
古畫筆可往共觀臨石渠我時跨馬冒熱去開  
厨發匣鳴鑰魚義獻墨迹十一卷水玉作軸光  
疏疏最奇小楷樂毅論永和題尾付官奴又看  
四本絕品畫戴嵩吳牛望青蕪李成寒林樹半  
枯黃荃工妙白兔圖不知名姓貌人物二公對  
奕旁觀俱黃金錯鏤爲投壺粉障復畫一病夫  
後有女子執巾裾牀前紅氍毹平圍爐牀上二姝  
展氍毹繞牀屏風山有無畫中見畫三重鋪此

幅巧甚意思殊孰真孰假丹青模世事若此還  
可吁

依韻吳冲卿秘閣觀逸少墨蹟

奇哉王右軍下筆若神聖長戈與伏弩無不從  
號令賢豪雖林立帖欽孰敢競師徒氣揚揚龍  
虎旗正正勝聲塞宇宙自昔無此盛赫赫猶至  
今瑰瓚曷云並崇崇中秘書濟濟士游沫墨寶  
收盈厨來觀遇已橫始知前人蹟鑄多自失勁  
紙素儻未壞萬古傳莫竟一從歸人間夢寐不  
能更但媿將短才輒爾接高詠何羞趙壹窮自  
有鍾嶸評嘗聞曹將軍尚請賦競病我生群俊  
末貧賤亦足慶文成終愧君鉛刀值枯梗

同江鄰幾龔輔之陳和叔登臺有感

在昔梁惠王築臺聚歌吹笙簫無復聞黃土化  
珠翠當時秦兵強今亦歸厚地我與諸賢良舉  
酒莫言醉曾誰問孟軻空自有仁義

逢羊

予晨過北郭見群羊有羶處前其首叩然而偉

膺其角拱然而聳其毛茸然而長自膊至腕  
綖與纓胡相若其群狼逐而擁趨如奉焉及其  
宰也羝存而群死之予歸作詩示諸友云

牧人垂長髯驅羊從北道老羝壓大群毛比長  
髯好暮歸同一欄朝出不擇草旣肥當用烹從  
羝羝獨保狡誘以全軀角尾徒爲老

依韻和張中樂寺丞見贈

胡車走鞚轡暮車走碌碌黃埃蔽車輪赤日爍  
車屋靡論遠與近安問踈與孰賢愚各有求徃  
返相磨穀我馬不出門我蹟亦以跼心幕中樂  
賢道義聞且宿其言清而新其貌古不俗書可  
到二王辯可折五鹿徃見未爲勞定交然後篤  
惠詩何勁敏對敵射銅鏃穿楊有舊手驚雀無  
全目強酬非所當宜將弓矢速

依韻和原甫對月見還不至

每愛孔北海罇中常不空今無酒與客唯有月  
兼風遠色曾何隔微涼亦已同更期三五夕靜

坐接談叢

依韻和原甫月夜獨酌

月下馬蹄休擾擾夜涼蟲響競囂囂一杯獨飲  
愁何有孤榻無人膝自搖北斗柄高天漸轉小  
冠簪冷髮微凋誰知靜對頽然影竟夕幽懷豈  
易聊

依韻和原甫早起紫宸朝待旦假寐

月落西樓露氣寒大明將謁望清斑燭房猶照  
衣冠上漏舍欲爲魚鳥間入仗采旗開日月在  
庭公衮儼雲山我慙一似朝宗水亦得隨流到  
海還

依韻和原甫新置盆池種蓮花菖蒲養  
小魚數十頭之什

瓦盆貯斗斛何必問尺尋菖蒲未見花蓮子未  
見心小鮮不足烹安用芎餌沉戶庭雖云窄江  
海趣已深襲香而玩芳嘉賓會如林寧思千里  
游鳴櫓上清泠

送施屯田提點銅場兼相度嶺外鹽入

虔吉

江西采銅山未竭南越熬海波海將結主人貪利  
不畏刑白日持兵逾盜竊銅私鑄器鹽奪商死  
共吏爭蛇閹穴姦豪乘勢倚蠻陬劫掠聚徒成  
蟻垤今雖驛翦嶺下平尙恐根存更生孽因擇  
健才通便民付職與權將有設秋香亭上共爲  
賓却作主人殊少悅徂東走北十五年只有山  
川看不別

依韻和江鄰幾癸巳六月十日同刁吳

韓楊飲范景仁家晚赴館宿觀吳興太

守章伯鎮題壁記辛卯仲秋初吉九月

十一日十月二十二日十二月十一日

壬辰二月一日館直慨然有感

江翁多感槩飲散來直廬題跋有舊友連蹇常  
與渠昨歸天祿下念昔悲有餘未久復外補安  
能戀清虛得請向若霄幽懷寄禽魚高城浸湖  
光面面當紅蕖晚乘畫舫游四坐羅輕裾數杯  
已酩酊萬事應破除不受趨時近不恤與世疎  
百歲且過半冉冉將焉如誰慕八十叟猶在磻

溪漁嗟哉再宿夕乃自仲秋初清談固隔絕可  
見壁上書

送林大年寺丞宰蒙城先歸餘杭逋之

姪孫

東方有奇士隱德珠在淵川壑爲之媚草樹爲  
之妍歿來十五載獨見諸孫賢煌煌出仕塗皎  
皎如淮蠙今爲蒙城宰歸問浙江船何時度楊  
子夜入明月邊有烏不化鳧有琴何用絃真趣  
還自得治民唯力田

依韻和原甫六月八日曉雨

侵曉忽飛雨颯然戶庭涼滴階初聞聲濯樹暗  
有香吹燭焰閃閃鳴雞濕昂昂稍已便衣冠喜  
氣眉宇翔安然如酒魚响沫久已望塵纓自可  
潔何必念滄浪

送余中舍知漢州德陽

匹馬易爲秣單車長是輕秋風來棧道宿雨度  
關城石上樹林暗山根江水明桐花鳳何似歸  
日爲將行

勉裴如晦

裴侯失嬰兒心腸如焚更愛玩白玉玦墜地不復全收拾見顏色瑩徹猶自妍鳳皇生九雛一卵破易捐况多令男子拭淚慰目前

送謝寺丞知餘姚

其姓師厚嘗宰此邑

姚江千里海汐應山井亦與江湖通秋來魚蟹不知數日日舉案將無窮高堂有親甘可養下舍有弟樂可同縣民舊喜諸郎政努力莫媿今為翁

與蔣祕別二十六年田棐二十年羅拯

十年始見之

我今五十二常苦離別煎屈指數離別正去一半年三君異出處相見有後先蔣最會遇早羅倍晚於田仕宦比我遲官資居我前此亦漫輕量無限歸荒埏所喜笑語同各驚顏貌遷髮有霜華侵目有蜘蛛懸有酒易以醉有奚徒用妍醒來念功名病螻希蛻安得有園廬寬間近林泉養魚數千頭種蔗三四屢餘蔬皆稱此嘉

果植亦然既無俗造請窮冬事高眠困貯白粳稻酒沽青銅錢飯過引數杯令兒誦嘉篇仰首看赤日區區隨天旋朝見出滄海暮見入虞淵畢竟將何窮磨滅愚與賢億億萬萬載筋骨非王堅桐棺三寸厚在昔誰免焉去去欲及時嗟嗟無由緣

別三十第彥臣二十八日

朝辭都城裏暮止汴堤頭滿目非相親寂默對河流

依韻和雪竇山曇穎長老見寄

虞山無獸山林鳥正關關月入潭心白花明谷口間采薪能自至流水不知還聞欲觀滄海高峰峻亦攀

送余中舍監韶州錢監

孤青水中石片白蒼梧雲虞舜不可見蕭韶不可聞君為漢錢官鑿山取銅鑛韶石不生銅雷為千古景

七夕詠懷

織女無耻羞年年嫁牽牛牽牛苦娶婦娶婦不解留來往一夕光奕奕河漢秋輕傳人世巧未知何時休喜鵲頭無毛截雲駕車輶老鴉少斟酌死欲同造舟明月不到曉是夜曲如鈞天意與物理注錯將何求嘗聞阮家兒犢鼻竹竿頭人生自有分豈媿曝衣樓

送弟禹臣

王都寓居樹陰少惟有墻隅兩株棗去年相見棗花開今年相別棗實好棗實未剝風莫吹我鬢愁多似蓬葆淮南到時何所逢秋葉蕭蕭蟹應老憶昔共歸江上初對飲蘆洲月如縞半夜魚跳鏡破光萬事觸然何足道自此重經二十秋不改青青岸旁草

送叔昭上人附施屯田歸宣城

瓶巾過江去遠託故人船借問風濤勢何如杯度年

山茶花樹子贈李廷老

南國有嘉樹華若赤玉杯曾無冬春改常冒嚴

雪開客從天目來移比瓊與瑰贈我君大梁蓬門方塵埃舉武尚有礙何地可以栽每游平棘侯大第夾青槐朱欄植奇卉磨碧爲壘臺於此豈不宜亟致勿徘徊將看榮茂時莫嗤寒園梅

送吳照鄰都官通判成都

君家婦何賢捨舟具車轍五年夢在梁三年行向蜀迢遞今日同辛勤昔時獨看花久莫留買錦慰不足歸來兒女大婚嫁應相續

依韻和原甫昭君辭

武帝常勒兵北登單于臺始欲以威伏竟亦慙懷來徒令出塞師萬里求龍媒未弭後世患王顏困黃埃丹青不足恨謀慮少徘徊月如漢官見心向胡地摧在昔李少卿聽笳動悲衰壯士尚如此娥眉安得閒情語既不通豈止腸九回初冬誠難保死不如草萊

再依韻

一嫁異域去不復臨鏡臺念昔辭家時豈爲單于來適遐固亦命配醜非由媒始欲並日月今



嗟隨風埃僕侍共慘戚山川空徘徊鴻鴈爲之  
悲肝腸爲之摧寧聞琵琶樂但聞琵琶哀休言  
羊酪甘誰喜蘆開故國萬餘里此生那得回  
乃知女子薄莫比原上萊

飲劉原甫舍人家同江鄰幾陳和叔學

士觀白鵝孔雀鳧鴨周亞夫印鈿王寶

赫連勃勃龍雀刀

主人鳳皇池二客天祿閣共來東軒飲高論雜  
談譎南籠養白鵝北籠養孔雀素質水紋織翠  
毛金縷薄大誇鳧柄鴨不比龍頭杓王印傳條  
侯字辯亞與惡鈿劔刻辟邪符寶殊制作未觀  
赫連刀龍雀鑄鏤鏐每出一物玩必勸衆賓酌  
又令三雲髻行酒何婢約固非世俗驩自得閱  
古樂聖賢浪浪去安有不死藥竟知不免此烏  
用強檢縛開目卽是今轉目已成昨歸時見月  
上酒醒見月落恍然如夢寐前語誠不錯

次韻和永叔退朝馬上見寄兼呈子華

原甫

公歸初退內朝班馳道南頭躡錦鞍欲雨浮雲  
猶復暗背陰殘雪愈生寒穿槐已覺春禽語載  
酒重思結客驢吟寄侍臣知有意翠鬢爭唱口  
應乾

劉涇州以所得李士衡觀察家號蟾蜍

硯其下刻云天寶八年冬端州刺史李

元德靈卵石造示劉原甫原甫方與予

飲辨云天寶稱載此稱年僞也遂作詩

予與江鄰幾諸君和之

硯如剗摹腹如月又若剖瓢萌強發鑄題天寶  
年造之刺史李元傳自越剗摹剖瓢我莫分稱  
載作年初辯君君雖能辯猶曰寶原甫詩云李  
侯寶硯對侯  
僞休開口願封漆匣還與侯請共江翁獨持守  
江詩云劉侯寶此處勿  
忘慎勿將心逐名轉

送劉敬秘校赴婺源

雲木葱蘢處雞鳴古縣城山高地多險源近水  
偏清斫漆資商貨栽茶雜賦征案頭龍尾硯切

莫苦求精

送閻中孚郎中知磁州

蕭管梁王臺風雪邯鄲道君行守趙城我向夷  
門老持麾邦寄重歌禱民欣早重岡古獵場驚  
兔離衰草

次韻和王景彝十四日冒雪晚歸

子猷多興憐飛雪向晚歸時又見飄拂馬隨人  
如着莫舞空吹面亦勝消閉門我作袁安睡呵  
筆君為謝客誰記取明朝朝謁去毳裘重戴冷  
寥寥

和王景彝晚逢赴江鄰幾飲

殘雪晚生寒良朋邀我飲逢君三省歸交響一  
相審乘興與未盡既杯杯太甚夜闌踏月迴火  
冷人已寢

次韻和吳中卿傷何濟川

生愛虛名苦辯亡淪精竭智可哀傷誰將事附  
三公傳自有文誇古戰場墳土未乾還下穴挽  
聲繞絕又新章是非從此方應定弟子猶爭左

氏長

次韻景彝赴省宿馬上

烏紗帽底青眸轉朱雀街頭玉轡搖燈火高樓  
吹短笛簾櫳斜巷隘初宵身歸蘭省唯看月心  
在天津欲倚橋枕上夜深應不寐羨他年少酒  
微銷

送李獻甫

覽君南來詩如對江上景今忽告我歸東風生  
馬頸馬行日幾里到家梅萼遲重登石頭城為  
我一引領

送周諫議知襄陽

藹藹荊州幾萬家竟持壺酒望高牙兒尚唱  
銅鞮曲耆舊爭隨畫鹿車雄鴨綠頭看漢水肥  
編縮項出漁查鄉人應笑張平子只有歸田賦  
可誇

依韻和原甫廳壁錢諫議畫蟹

諫議吳王孫特畫水物具至今圖寫名不減南  
朝顧濃淡一以墨齏殼自有度意將輕蔡謨殆

被螻蛄誤

宛陵先生集卷第十八

宛陵先生集目錄卷第十九

和景彝喜子修書

送趙虞部

月蝕

和刁景純春雪

和揚待制詠雪

和景彝宿省

姪與甥下第

次韻和永叔

和范舍人對雪

歲旦呈永叔

和冲卿歲暮有懷

和冲卿元日

和景仁對雪

三和景仁對雪

和永叔新歲書事

送辛都官知鄂州

和景彝過景靈街

送韓王汝知洋州首三

李祠部寄荆柝

韻語蒼水叔內翰

和子華移紅薇

和吳舍人卽事

和長文社日出郊

和長文禋祀郊外

送馬都官

和景彝詠薜荔

和鄰幾賞小桃

長歌行

和長文春雨二首

送滕寺丞歸蘇

和酬永叔

和鄰幾同過金明池

目錄終

宛陵先生集卷第十九

宋宛陵梅堯臣聖俞著

次韻和酬裴寺丞喜子修書

唐宋典冊竟駢羅漢詔重令與削磨古聖規模  
猶可法衆賢馳騁必無蹉既除太史來爲尹遂  
用非才往補訛代匠只憂傷手甚君宜憐我不  
違他

送趙虞部士宏知蜀州

春風跨臙至雪作蝴蝶飛偏知蜀太守撩亂撲  
行衣何當海棠下歌管紅袖圍一飲一斗酒決  
訟如發機洛陽花自好聽從杜鵑啼

月蝕

有婢上堂來白我事可驚天如青玻璃月若黑  
水精時當十分圓只見一寸明主婦煎餅去小  
兒敲鏡聲此雖淺近意乃重補救情夜深桂兔  
出衆星隨西傾

次韻和彌刁景純春雪戲意

雪與春歸落歲前曉開庭樹有餘妍楊花撲撲

白漫地蛟蝶紛紛飛滿天胡馬嘶風思塞草吳  
牛喘月困沙田我貧始覺今朝富大片如錢不  
解穿

次韻和楊樂道待制詠雪

梁花孝王跡灞陵游客心牧羊來海上泛棹向  
山陰興賞曾何淺羈棲亦以深穆歌猶在竹郢  
曲自傳琴旗凍霑天仗槍寒拂羽林且爲豐歲  
慶休作苦寒吟掩帙都忘慮焚香靜擁衾晴明  
一登閣暮色徧高岑

次韻和景彝閏臘二十五日省宿

君嘗納史似吳兢又直甘泉馬踏冰重臘雪花  
方漫漫宿廳書架自層層按頭美酒初温火簾  
底微風欲動燈永夜未眠鍾已發此心間寂是  
高僧

姪宰與外甥蔡駟下第東歸

事莫必有勝必勝難可持迺來罕相見世上多  
誇馳黃金鑄佩印白玉刻佩龜朝見恃赫赫夕  
見同蚩蚩方得靡不美既處焉所施此理非一

日更後當應知志士無終窮斯言非爾欺

次韻和永叔

省樹高槐雪墜條沉沉古屋蔽疏寮每嗟守印  
如枯木欲棄明珠學緯蕭漸老但知貧賤樂向  
來徒用歲時銷新年不管魚龍躍安得乘風入  
剡樵

次韻和范景仁舍人對雪

三尺沒腰雪京華頻歲無高低相掩覆竅隙似  
封糊帖缺都迷醜增妍不問枯因時混貧富遇  
物得圓觚眩目曾何數流風不可圖冥冥山霧  
合浩浩海雲舖未覺花飛葉先看霰集珠落機  
裁扇素獵野割膚腴粲爾娥奔月蟠然叟赴醺  
薄才今揣稱小巧媿非夫

嘉祐己亥歲旦永叔內翰

塔前去年雪鏡裏舊時人不覺應銷盡相看只  
似新屠酥先尙幼綵勝又宜春獨愛開封尹鍾  
陵請去頻

次韻和吳冲卿歲暮有懷

舊曆卷將盡慨然增永懷唯希步兵醉莫作大

常齋孟浪從人笑踈愚共世乖定知當汨沒名  
不與功偕

次韻和冲卿元日

天心欲銷變元會罷來朝新歲起今日舊年猶  
昨宵凍雲低覆闕殘雪稍封條又聽驅儻鼓群  
邪不可饒

次韻和景仁對雪

北風吹雪至浩蕩地疑無弈弈將如舞漫漫欲  
似糊沙場行不盡銀漢落應枯興發詩千首豪  
吞酒百觚山川容可改圭璧巧能圖花竟因酥  
點砧爭以練舖未煇調鴨鵠全混蔽旒珠懷昔  
褻衣絮誰今食黍腴善歌知寡和醺飲遂成醺  
衆筆排堅陣多多困老夫

次韻三和景仁對雪

北度龍沙遠南來狗犬無玉階三尺峻粉壁萬  
重糊獸餒行迷穴禽寒立並枯長川平界限大  
屋棟稜觚稍見蓬萊闕初張雲霧圖受降整甲

積罷獵羽毛鋪被褐思懷寶游都學賣珠車皆  
陳銜響人盡得瓊腴縞已贈吳札席將開漢醕  
鳳池批詔手特地逞工夫

次韻和末叔新歲書事見寄

尖風細細欲穿簾殘雪微銷凍結簷盞裏醇醪  
無限滿鏡中白髮不知添妍童喜舞開羅幕小  
吏愁嘶入硯蟾幸得從公持直筆定應無復歎  
齏鹽

送辛都官 有終 知鄂州

衣上大梁雪門前武昌車使君行有期將逢鳥  
隼旗車動自輕輓旗輕自舒舒去都越千里城  
在江上居黃鶴有高樓樓頭挂蟾蜍下見鴛鴦  
洲葭菼可以道為弔福處土沉蹤異三閭憶昔  
我仲父五馬來躊躇願君訪舊跡因報八行書

次韻王景彝正月十六夜省宿過景靈街

宮街不閉東城月圓影纔虧夜色春自躍金羈  
來宿省從他錦帳欲誇人燈光遠近疑爭晝歌

韻高低競起塵我老都無游樂意似君清枕睡  
侵晨

送韓王汝太傅知洋州三首

函關見殘雪褒谷聞春禽禽響通朱輪馬嘶入  
青林花明亂石路雲抱寒泉岑天外漢江來城  
下漁網沉庖供縮項鯪坐使宮娥斟農桑不須  
教古俗自通今

渭入秦宮古褒分蜀道難泉聲春雨後月色曉  
程寒蠶浴桑牙短禽啼杏萼丹從來稱召杜民  
俗在君安

春風東來幾萬里相送入關如有情灞陵原邊  
柳條暗咸陽橋畔桃花明自古恨別此兩處十  
千美酒瑠璃傾日落未落車馬動子規滴血壯  
士驚行哉使君負膽氣蜀道雖險心常輕是時  
門前大桐樹爛漫紫萼啼流鶯弟兄同懷不可  
見應亦夢覺嗟遠程太白山前一尺雨桑下問  
蠶田問耕郡城夜開百姓喜喜從迢遞壺漿迎  
李廷老祠部寄荆柑子

踏雪衝風馳小吏帶霜連葉寄黃柑穉包欲咀  
才全動舉蓋逢衰酒易酣書尾自題知遠意筆  
頭親蒼獸多談故人莫覓新詩卷都似嵇康七  
不堪

韻語荅未叔內翰

世人作肥字正如論饒頭厚皮雖然佳俗物已  
可羞字添歎中絕今將五十秋近日稍稍貴追  
躡慕前流曾未三數人得與古昔儔古人皆能  
書獨其賢者留後世不推此但務於書求不知  
前日工隨紙泐已休顏書苟不佳世豈不寶收  
設如楊疑式言且直節修又若李廷中清慎實  
罕侔乃知愛其書兼取爲人優豈書能存久賢  
哲人馬廋非賢必能此惟賢乃爲尤其餘皆泐  
泐死去同馬牛大尹歐陽公昨日喜疾廖信筆  
寫此語謂可忘病憂黃昏走小校寄我東郭陬  
綴之輒成篇聊以助吟詠

次韻和韓子華內翰於李右丞家移紅  
菽子種學士院

紅薇花樹小扶疎春種秋芳賞愛餘丞相舊園  
移帶土侍臣清暑看臨除薄膚痒不勝輕爪嫩  
翰生宜近禁廬此地結根千萬歲聯華榮莫比  
茅茹

次韻和吳長文舍人卽事見寄

莫問春風有後先但逢佳處去揚鞭桃花洞遠  
迷應久杏樹壇荒迹自傳放與曉寒能幾許卽  
看芳意不多偏古來間氣爭強弱謾費黃金拋  
楚權

次韻和長文社日禠祀出城

曉出春風已擺條應逢社伯馬蹄驕壇邊宿雨  
微霑麥水上殘冰壅過橋燕子飛來依約近鴈  
行歸去試教調北扉西掖多才思相與飄飄在  
沈寥

次韻和長文禠祀郊外見寄并呈韓子  
華

鶉鴝知雨在桑中雄逐鷗飛自不同胡粉未生  
輕蝶白燕脂先綻野櫻紅高高樹裏鞦韆月獵

獵墻頭借舊風曉下祠壇多寄詠衣冠方侍大明宮

送馬行之都官

昭亭山下送君時不畏西行劍機危  
竿馬跨來身更健吳船乘去計非遲  
錢塘湖上尋雲屋巾子峰前種檜籬  
此趣已高天下士不須功業似鴟夷

和王景彝詠薜荔

植物有薜荔足物有蜥蜴固知不同類  
亦各善緣壁根隨枝蔓生葉侵苔蘚  
碧後凋雖可嘉勁挺異松栢

和江鄰幾省中賞小桃

年年二月賣花天唯有小桃偏占先  
初見嫩紅無不喜終知俗艷幾多妍  
鄰翁已折郊園裏貴客爭誇粉署邊  
可惜工夫吟向此會須畱醉壯丹前

長歌行

世人何惡死死必勝在生勞勞塵土中役役歲

月更大寒求以暝大暑求以清維餒求以飽維渴求以飮其少慾所惑其老病所嬰富貴拘法律貪賤畏笞榜生既若此苦死當一切平釋子外形骸道士完髓精二皆趨死徒足以見其情遺形得極樂昇僊上王京是乃等爲死安有蛻骨輕日中不見影陽魂與鬼并莊周謂之息漏泄理甚明仲尼曰焉知不使人道傾此論吾得之曷要世間行

依韻和長文紫微春雨二首

年年潑火雨苦作清明寒梨花猶半綻塘水已迷漫愁看日更永冷漏夜未闌酒沫起王蒸燭淚生銅盤春衣向來脫帶眼斗覺寬試問彼俠少何處跨金鞍  
春雨固多喜雖多安得愁既能勒花苞又解滋耕疇池添痕痕漲渠有細細流不同離婦怨一落不可收定知矜有年豈似斗粟賙西掖吳夫子吟觀意遲畱正聲濟雅頌高論等陽秋我慙才甚薄難繼東山謳



送滕寺丞歸蘇州

驅車入蜀時有弟毋不往留婦侍毋傍以子囑  
婦養昨得闔門書婦子死泉壤此心那得安弃  
官提轡鞅東馳三千里鬻馬求吳漿吳漿速如  
飛歸來拜堂上堂前去時樹已覺枝條長豈無  
懷抱感爲壽酌春醴

次韻和疇永叔

春候倏已和林上鳴鳥譁前日是清明驟雨霑  
梨花初開結客游愛此物景嘉歌舞未終宴夕  
暮各興嗟所嗟歸路暗嘶馬自知家公家八九  
姝鬢髮如盤鴉朱脣白玉膚參年始破瓜幾日  
苦霖霑當道跳魚蝦閉門飲濁醪鞅韉繫樹丫  
群姝莫要劇爲公歌啞啞公當是日醉歡適不  
可涯孔氏有高第內自戰紛華我公豈其然秉  
直異蓬麻果效歸田去願從招轅車

次韻和江鄰幾送客回同過金明池

送別西亭車馬塵天池回傍欲迷津盡船龍尾  
何時發丹杏梢頭漏泄春

風光猶未老於人獸口泉聲瀉碧津一洗塵襟  
無俗慮柳條開眼共看春

宛陵先生集卷第十九